

TULAFONO TAU FAAOFI O MAVAEGA TAUSI 2014**SAMOA**

Faamatalaga e Faamalamalama ai

Faatomuaga

O le faamoemoe autu o leni Tulafono Tau Faaofi o le faaaogāina faaonaponei o tulafono o mavaega tausī Samoa o i ai nei ina ia sili atu ona lelei ma talafeagai e faatosina mai i ai le tagata e teufaafaigaluega ana tupe i tulaga faava o malo.

O le Tulafono Tau Faaofi ua faamoemoe faapitoa lava mo le soloaiga tau le tagata lava ia ma mo le puipuiga o meatotino e ala i se mavaega tausī. O le a soloia ai le Tulafono Tausī Mavaega 1975 ma le Tulafono o Mavaega Faa-va-o-malo 1988.

Fuaiupu:**VAEGA 1 - FAATOMUAGA**

- Fuaiupu 1:** - ua taua ai e faapea, afai e pasia, o le a taua loa le Tulafono Tau Faaofi o le Tulafono o Mavaega Tausī 2014, ma o le a amata faamamaluina i le aso e tuuina i ai le maliega a Le Ao o le Malo.
- Fuaiupu 2:** - ua aiaia ai mo le faamatalaina o fuaitau i totonu o le Tulafono.
- Fuaiupu 3:** - ua aiaia ai e faapea, e faaaogā le Tulafono i mavaega tausī na faia a o lumanai ai po o i le tuanai ai o lona amata faamamaluina, seia vagana ai ua aiaia e le Tulafono se isi faiga e ese ai.

VAEGA 2 - O LE FAAVAEINA
MA LE UIGA MONI O MAVAEGA TAUSI

- Fuaiupu 4:** - ua faatulaga atu ai le uiga moni e faia ai ma tulai mai ai se mavaega tausī.
- Fuaiupu 5:** - ua faatulaga atu ai manaoga talafeagai o le faia ai o se mavaega tausī.
- Fuaiupu 6:** - ua faatulaga atu ai faatulagaga eseese e faia ai o se mavaega tausī.
- Fuaiupu 7:** - ua aiaia ai e faapea, e mafai ona umia e, pe faaee atu se meatotino i se tausī mavaega i luga o se mavaega tausī.
- Fuaiupu 8:** - ua aiaia ai mo le tulafono talafeagai lea o lo o pulea ai se mavaega tausī ma le malosīaga e suia ai.
- Fuaiupu 9:** - ua aiaia ai e faapea o le tulafono a Samoa e faia ai faaiuga o fesili ma mataupu uma e tulai mai e faasino i le mavaega tausī Samoa.
- Fuaiupu 10:** - ua faatulaga atu ai mea e tulai mai pe afai e aloaia, ma faamalosia, lē aloaia ma e le o faamalosia po o le lē aloaia o se vaega o le mavaega tausī.
- Fuaiupu 11:** - ua aiaia ai mo le puleaga faa-faamasinoga a le Faamasinoga Sili (“Faamasinoga”) e tagofia ai mavaega tausī Samoa ma mavaega tausī a atunuu i fafo, pe afai o lo o i Samoa le tausī mavaega po o le meatotino.
- Fuaiupu 12:** - ua aiaia ai le auala e tagofia ai mavaega tausī tau faasese po o se faataapeina o meatotino i se mavaega tausī Samoa, ma le faamoemoe e faasese tagata o lo o nofo aitalafu i le tagata e faatulagaina meatotino e faaliliuina atu.
- Fuaiupu 13:** - ua aiaia ai e faapea so o se tagi po o se faaiuga a se atunuu i fafo e uiga i mataupu ua taua i lalo o lenei fuaiupu, e lē mafai ona faamalosia pe afai na faia aloaia se mavaega tausī Samoa i lalo o le Tulafono.

**VAEGA 3 - UMI O LE VAITAIMI
MA LE FAATUPULAIA**

- Fuaiupu 14:** - ua aiaia ai mo le umi o le vaitaimi o se mavaega tausī Samoa.
- Fuaiupu 15:** - ua aiaia ai mo le malosiaga o se tausī mavaega e faatupulaia ai ma le faamatuuina atu o tupe maua o le mavaega tausī, a o le i ausia taimi faatulagaina.

**VAEGA 4 - VAEGA AUAI
O SE MAVAEGA TAUSI**

- Fuaiupu 16:** - ua faatulaga atu ai i latou e mafai ona faamanuiaina ai ma le auala e iloagofie ai i latou.
- Fuaiupu 17:** - ua aiaia ai mo malosiaga o le tagata e faatulagaina meatotino e faaliliuina atu po o le tagata e puipuia po o le tausī mavaega po o so o se isi lava tagata (e pei ona faatonuina i le mavaega tausī) ina ia faaopoopo atu i ai ma aveesea mai tagata e faamanuiaina ai, ma faatulaga tagata e lē aofia ai.
- Fuaiupu 18:** - ua aiaia ai e faapea, e mafai e se tagata ua faamanuiaina ai ona faamatuu ese atoa po o le faamatuu ese i se vaega i se tulaga tumau pe lē tumau foi o a latou tupe tului. Ua faapea foi ona faatulaga atu ai le auala e ao ona faamatuu ese atu ai.
- Fuaiupu 19:** - ua aiaia ai tulafono faafoe (i le noatia ma le fai fuafua i aiaiga o le mavaega tausī) e faasino i se vasega o tagata o i latou ia e mafai ona avea ma tagata e faamanuiaina ai, pe afai ua faamutaina sea vasega ma pe afai ua le o toe i ai se sui auai o sea vasega.
- Fuaiupu 20:** - ua tagofia ai le uiga moni o se aia a le tagata ua faamanuiaina ai.
- Fuaiupu 21:** - ua aiaia ai mo le tofiga ma matafai oi a se tagata e puipuia.

- Fuaiupu 22:** - ua manaomia ai se mavaega tausi mo se faamoemoe ina ia i ai se tagata e faamalosia. Ua aiaia ai foi mo le tofiaina o se tagata fou e faamalosia (pe afai e leai se tagata e faamalosia), so latou sui e suitulaga, o latou tiute ma aia tatau.

VAEGA 5 - TAUSI MAVAEGA

- Fuaiupu 23:** - ua aiaia ai mo le aofai o tausi mavaega o se mavaega.
- Fuaiupu 24:** - ua aiaia ai mo le tofiaina o tausi mavaega.
- Fuaiupu 25:** - ua aiaia ai mo le taliaina o le faiga faa-tausi mavaega e se tausi mavaega.
- Fuaiupu 26:** - ua aiaia ai mo mafuaaga o avanoa i le faiga faa-tausi mavaega, le malosiaga o le Faamasinoga, e aveesea ai ma tofia ai se tausi mavaega fou.
- Fuaiupu 27:** - ua aiaia ai mo le faagasologa mo le faamavae mai le tofi ma le aveesea o tausi mavaega.
- Fuaiupu 28:** - ua aiaia ai mo matafaioi ma tuutuuga o se tausi mavaega ua tuua le galuega.
- Fuaiupu 29:** - ua aiaia ai mo tiute tauave o tausi mavaega.
- Fuaiupu 30:** - ua aiaia ai mo le tiute tauave o se tausi mavaega e faatino ai le tausiga ma tulaga agavaa pe a tauaveina o latou tiute tauave i lalo o le Tulafono.
- Fuaiupu 31:** - ua aiaia ai mo le malosiaga o tupe teufaafaigaluega a se tausi mavaega.
- Fuaiupu 32:** - ua aiaia ai mo le malosiaga o tausi mavaega e faamatuu atu ai le faatinoga o so o se galuega faatino po o galuega faatino uma e faamatuu atu i sooupu.
- Fuaiupu 33:** - ua aiaia ai mo malosiaga o tausi mavaega e tofia ai sui filifilia ma tagata e vaavaaia meatotino o mavaega tausi.
- Fuaiupu 34:** - ua aiaia ai mo tuutuuga o tofiga o sui filifilia ma tagata e vaavaaia e tausi mavaega tausi.

- Fuaiupu 35:** - ua aofia ai le iloiloga o faatulagaga ma maliega e tofia ai sooupu, sui filifilia ma tagata e vaavaaia. Ua faapea foi ona aofia ai noataga a tausi mavaega mo tulaga faaletonu o latou sui faatutu (o i latou ia o sooupu, sui filifilia po o tagata e vaavaaia) ma tagata o lo o fai ma o latou sui ma faapea, ua lē mafai ona tausisia e le tausi mavaega tiute tauave o le tausia lelei e faasino ia te ia.
- Fuaiupu 36:** - ua aiaia ai mo le aafiaga o tausi mavaega ua sili atu o latou malosiaga o i ai i lalo o le fuaiupu 32 e oo atu i le 39.
- Fuaiupu 37:** - ua aiaia ai le auala e faaaogāina i malosiaga tuuina atu i se tausi mavaega ua na o ia lava.
- Fuaiupu 38:** - ua aiaia ai mo tapulaa po o le aofia ai o malosiaga ua faaee atu e le fuaiupu 32 e oo i le 36 ma faapea foi ma le fuaiupu 40 e oo i le 42.
- Fuaiupu 39:** - ua aiaia ai e faapea e faaaogā malosiaga o se tausi mavaega i lalo o le fuaiupu 32 e oo i le 42 i mavaega tausi tusa lava pe na faia i le lumanai ai po o le tuanai ai o le amata faamamaluina o le Tulafono ua fuafuaina.
- Fuaiupu 40:** - ua aiaia ai mo totogi ma tupe faaalu a tausi mavaega.
- Fuaiupu 41:** - ua aiaia ai mo totogi ma tupe faaalu a sooupu, sui filifilia ma tagata e vaavaaia.
- Fuaiupu 42:** - ua aiaia ai mo le malosiaga o le tausi mavaega e inisiua ai so o se meatotino faasaga i so o se tulaga lamatia ma ia totogiina saofaga totogi faavaitaimi mai tupe o le mavaega tausi. Ua faapea foi ona aofia ai le malosiaga e inisiua ai se meatotino o lo o umia i luga o se mavaega tausi faaletulafono.
- Fuaiupu 43:** - ua aiaia ai mo tusi po o tusi faalotoifale o manaoga o le tagata e faatulagaina meatotino e faaliliuina

atu ma tagata e faamanuiaina ai ma se tagata e puipuia se mavaega tausī. O sea tusi po o tusi faalotoifale o manaoga o le a lē faaeeina atu ai se tiute faaletulafono o le tausiga o mavaega i le tagata tausī mavaega.

Fuaiupu 44: - ua aofia ai le tulaga gafatia o tausī mavaega faaletulafono e galulue ai e ala i faaiuga.

VAEGA 6 - MALOSIAGA FAAAGAAGA

Fuaiupu 45: - ua aiaia ai mo malosiaga faaagaaga o se tagata e faatulagaina meatotino e faaliliuina atu.

Fuaiupu 46: - ua aiaia ai mo malosiaga faaagaaga o se tagata e puipuia.

Fuaiupu 47: - ua aiaia ai mo le malosiaga e tuuina atu ai faatonuga faatonuina ua faatagaina i lalo o le mavaega tausī.

Fuaiupu 48: - ua aiaia ai e faapea e faaaogā le fuaiupu 49 e oo i le 62 i le na o se mavaega tausī lea ua faailoa manino o se Faatulagaga o Mavaega Tausī Faapitoa Faava o Malo a Samoa.

Fuaiupu 49: - ua aiaia ai mo le faamatalaina o nisi o fuaitau mo le Vaega 6.

Fuaiupu 50: - ua aiaia ai mo le uluai faamoemoe o le fuaiupu 51.

Fuaiupu 51: - ua aiaia ai mo sea filifilia.

Fuaiupu 52: - ua aiaia ai mo tiute tauave o tausī mavaega e faasino i sea filifilia.

Fuaiupu 53: - ua aiaia ai tapulaa o malosiaga o tausī mavaega (o sea filifilia) e palota ai ma faalavelaveina ai le faafoega o le kamupani.

Fuaiupu 54: - ua faatulaga atu ai aiaiga e faasino i tulafono faafoe mo le tofiga o faatonu.

Fuaiupu 55: - ua aiaia ai po o le a le taimi e mafai ai e tausī mavaega ona faauilavea i mataupu a le kamupani ma i lea tulaga, pe afai o lo o i ai se valaau e faauilavea ai mai se tagata e i ai se aia, o ia lea ua i ai se mafuaaga

- faatagaina o faasea e uiga i le faatautaiga o mataupu a le kamupani.
- Fuaiupu 56:** - ua aiaia ai mo le malosiaga o se tausī mavaega e faamatuu atu ai sea filifilia.
- Fuaiupu 57:** - ua aiaia ai mo le aia tatau e talosaga ai i le Faamasinoga mo se faamama avega pe afai ua solia e le tausī mavaega o se mavaega o sea filifilia, ona tiute po o noataga faa-tausī mavaega o sea.
- Fuaiupu 58:** - ua tuuina atu ai le malosiaga i le Faamasinoga e poloaiina ai le faamatuu atu o sea filifilia pe afai ua faamalieina ia e faapea ua lē toe ogatasi le puipuigamalu o sea filifilia ma manaoga o le tagata e faatulagaina meatotino e faaliliuina atu.
- Fuaiupu 59:** - ua puipuia ai (ia tausisia manaoga lē tumau e uiga i le faatinoga o se malosiaga) tagata e faamanuiaina ai mai le tapaina po o le faatonuina o le faaliliuina atu o sea filifilia po o le faamutaina po o le fesuiaiga o le mavaega tausī.
- Fuaiupu 60:** - ua faalēaogāina ai se tausī mavaega o sea filifilia mai le avega ai ma faatonu o le kamupani lea e tuuina atu sea filifilia.
- Fuaiupu 61:** - ua aiaia ai mo le auala e faamautinoa ai manaoga o le tagata e faatulagaina meatotino e faaliliuina atu.
- Fuaiupu 62:** - ua faatulaga atu ai tapulaa o tiute tauave o tausī mavaega.
- Fuaiupu 63:** - ua aiaia ai mo le tuufaatasia o se mavaega tausī o i ai se faiga faapaaga faatapulaaina, ma ua faapena foi ona aofia ai puipuiga faaletulafono o se tausī mavaega mo so o se mea ua leiloa o le mavaega tausī, e mafua mai i le faafoeina o le faiga faapaaga faatapulaaina e le paaga lautele.

**VAEGA 7 - O ITUAIGA O MAVAEGA
TAUSI FAAPITOA**

- Fuaiupu 64:** - ua aiaia ai mo mavaega tausī e puipuia, lea ua avea o se mavaega tausī e mafai ona faatapulaaina, faaitiitia po o le faamutaina ai, o le aia a le tagata e faamanuiaina ai.
- Fuaiupu 65:** - ua aiaia ai mo mavaega tausī faameaalofa.
- Fuaiupu 66:** - ua aiaia ai mo mavaega tausī o faamoemoega.

VAEGA 8 - NOATAGA MA FAIGA E FOIA AI

- Fuaiupu 67:** - ua aiaia ai mo noataga a tausī mavaega mo le solia o tulaga faatuatuaina. Ua faapea foi ona aiaia ai mo tulaga e tulai mai pe afai e lē noatia le tausī mavaega mo se soliga o le tulaga faatuatuaina.
- Fuaiupu 68:** - ua aiaia ai mo noataga a tausī mavaega mo le solia o tulaga faatuatuaina e tulai mai, mai le tau faasese o le tausī mavaega lava ia, e tusa lava pe ua faamaonia lona saoloto mai noataga i lalo o le mavaega tausī. Ua tuuina atu ai le malosiaga i le Faamasinoga e faasaoloto ai se tausī mavaega mai noataga mo so o se soliga o tulaga faatuatuaina e le i tulai mai ona o le tau faasese.
- Fuaiupu 69:** - ua aiaia ai tulaga aliae mai, ia e mafai ai e se tagata ua faamanuiaina ai ona faasaoloto po o le puipuia o se tausī mavaega mai noataga.
- Fuaiupu 70:** - ua tuuina ai i le Faamasinoga le malosiaga e faia ai poloaiga e puipui ai le solia o tulaga faatuatuaina.
- Fuaiupu 71:** - ua tuuina ai i le Faamasinoga le malosiaga e faia ai poloaiga e foia ai le solia o tulaga faatuatuaina.
- Fuaiupu 72:** - ua aiaia ai mo tauī pe afai e le o solia tulaga faatuatuaina.

- Fuaiupu 73:** - ua aiaia ai mo aiaiga ia e faaaogā i noataga ma puipuiga o le tagata e puipuia.
- Fuaiupu 74:** - ua aiaia ai e faapea e faaaogā foi le fuaiupu 73 i noataga ma puipuiga o le tagata e faamalosia.

VAEGA 9 - FETUUNAIGA, FAALĒAOGĀINA, TULAGA LĒ MAFAIA, FAAMUTAINA, FEAVEAIGA

- Fuaiupu 75:** - ua aiaia ai e faapea e mafai ona suia pe faalēaogāina se mavaega tausī i lalo o se poloaiga a le Faamasinoga.
- Fuaiupu 76:** - ua aiaia ai mo le lē mafai ona faatino po o le faalēaogāina o se meatotino o se mavaega tausī po o se aia i lalo o se mavaega tausī o lo o umia e le tausī mavaega, mo le tagata e faatulagaina meatotino e faaliliuina atu.
- Fuaiupu 77:** - ua faatulaga atu ai tulaga e tulai mai pe a faamutaina se mavaega tausī.
- Fuaiupu 78:** - ua aiaia ai e faapea o mavaega tausī mai atunuu i fafo ua faia i lalo o tulafono a atunuu i fafo, e mafai ona faamalosia i Samoa pe afai e faatagaina i lalo o le tulafono a atunuu i fafo po o le mavaega tausī i lalo o lana tulafono talafeagai.

VAEGA 10 - MAVAEGA TAUSI I ATUNUU I FAFO

- Fuaiupu 79:** - ua aiaia ai mo le tulafono lea e faatonutonu faalettulafono ai mavaega tausī a atunuu i fafo ma mataupu e lē faamalosia ai ia tulafono i totonu o Samoa.

VAEGA 11 – FAAMATALAGA TAU MAVAEGA TAUSI

- Fuaiupu 80:** - ua manaomia ai se tausī mavaega ina ia tagofia pepa faalettulafono ma faamatalaga uma e uiga i se mavaega tausī i se tulaga agatapuia. Ua faapea foi ona aiaia ai le taimi e manaomia ai

le tausī mavaega e tuuina atu faamatalaga e uiga i le mavaega tausī.

VAEGA 12 - MALOSIAGA O LE FAAMASINOAGA

- Fuaiupu 81:** - ua aiaia ai mo le aia tatau a se tausī mavaega e talosaga ai i le Faamasinoga mo so o se faatonuga ma malosiaga e faia ai so o se poloaiga e uiga i le talosaga e faia e le tausī mavaega.
- Fuaiupu 82:** - ua aiaia ai e faapea so o se tupe totogi ma tupe faaalu e faasino i so o se talosaga i le Faamasinoga, e ao ona totogi mai meatotino o le mavaega tausī.
- Fuaiupu 83:** - ua aiaia ai mo le uiga moni o le aia a le tausī mavaega i le mavaega tausī.
- Fuaiupu 84:** - ua aiaia ai e faapea e mafai ona mulimulitaia ma toe faaola mai se meatotino o mavaega tausī faatasi ai ma tuusaunoaga.
- Fuaiupu 85:** - ua aiaia ai mo aafiaga o le gaumativa o tausī mavaega i meatotino o mavaega tausī.
- Fuaiupu 86:** - ua aiaia ai mo le puipuiga o tagata o lo o feagai ma tausī mavaega.
- Fuaiupu 87:** - ua aiaia ai mo le vaitaimi faatapulaaina ma faatonuga o so o se gaoioiga e faia faasaga i se tausī mavaega i tulaga o le tau faasese.
- Fuaiupu 88:** - ua aiaia ai mo mavaega tausī faatulagaina lelei pe afai ua avea se tagata ma tausī mavaega o so o se tupe mama po o se meatotino e maua mai i lalo o se soliga o le tulaga faatuatuaina.

VAEGA 13 - AIAIGA ESEESE

- Fuaiupu 89:** - ua tuuina atu ai le malosiaga i Le Ao o le Malo e faia ai tulafono faatonutonu.
- Fuaiupu 90:** - ua aiaia ai mo teuteuga faatupulaia i le Tulafono o Lafoga o Tupe Maua 2012

ma le Tulafono o Kamupani Faava o Malo mo se Faamoemoega Faapitoa 2012.

Fuaiupu 91: - ua aiaia ai mo le soloia, aiaiga tau soloaiga ma aiaiga faasaoina.

Faamatalaga: - ua faatulaga atu ai le tiute tauave o le vaaiga e tausi mavaega o mavaega tausi.



(Hon FAUMUINA Tiatia Faaolatane Liuga)

MINISITA O TUPE

TULAFONO TAU FAAOFI O MAVAEGA TAUSI 2014

SAMOA

Faatulagaina o Aiaiga

VAEGA 1 FAATOMUAGA

1. Igoa puupuu ma le amataga
2. Faamatalaina o uiga o upu
3. Faaaogāina o le Tulafono

VAEGA 2 O LE FAAVAEINA MA LE UIGA MONI O MAVAEGA TAUSI

4. O le uiga moni ma le i ai o se mavaega tausi
5. O manaoga mo le faavaeina o se mavaega tausi
6. O le ituaiga mavaega tausi e mafai ona faia
7. Meatotino e mafai ona tausia i totonu o se mavaega tausi
8. O le tulafono talafeagai ma le malosiaga e suia ai lea tulafono
9. Mataupu e fuafuaina e le Tulafono ni faaiuga
10. Tulaga aloaia ma le mafai ona faamalosia o se mavaega tausi
11. Puleaga faa-faamasinoga a le Faamasinoga
12. Mavaega tausi tau faasese po o le faamaapeina
13. Tagi po o faaiuga tau faamasinoga mai atunuu i fafo e lē mafai ona faamalosia

VAEGA 3 UMI O LE VAITAIMI MA TULAGA FAATUPULAIA

14. Umi o le vaitaimi o se mavaega tausi
15. Malosiaga o le faatupulaia o tupe maua ma tupe faamatuuina atu muamua

VAEGA 4 VAEGA AUAI I SE MAVAEGA TAUSI

16. O tagata e mafai ona avea ma ē faamanuiaina ai ma le faamautinoaina o i latou
17. Malosiaga e faaopoopo i ma le aveesea ai mai tagata e faamanuiaina ai ma ia faatulaga tagata e le o aofia ai
18. Aiaiga e lē noatia ai
19. Aia a se vasega o tagata
20. Aia a se tagata e faamanuiaina ai ma le faafoeina o sea aia
21. Tagata e puipuia
22. Tagata e faamalosia

VAEGA 5 TAUSI MAVAEGA

23. Aofaiga o tausi mavaega
24. Tofiaina o tausi mavaega
25. Taliaina o le tulaga faa-tausi mavaega

26. Avanoa i tulaga tofi faa-
tausi mavaega
27. Faamavaega po o le aveesea
o tausi mavaega
28. O le tulaga o le tausi
mavaega ua tuua le galuega
29. Tiute o tausi mavaega
30. Tiute ina ia faatino le vaauga
ma tulaga agavaa
31. Malosiaga o le
teufaafaigaluegaina
32. Sui sooupu
33. Sui filifilia ma tagata e
vaavaaia
34. Tuutuuga o le tofiaina o sui
filifilia ma tagata e vaavaaia
35. Iloiloga o sui sooupu, sui
filifilia ma tagata e vaavaaia
ma noataga mo le tofiaina o
i latou
36. Aafiaga o tausi mavaega ua
sili atu o latou malosiaga i
lo le tulaga e tatau ona i ai
37. O le tausi mavaega i o latou
tulaga faapitoa
38. Tapulaa po o tulaga e lē
aofia ai o malosiaga ua
faaee atu e le fuaiupu 32 i le
36 ma le fuaiupu 40 i le 42
39. Mavaega tausi o i ai i le
taimi nei
40. Totogi ma tupe faaalu a
tausi mavaega
41. Totogi ma tupe faaalu a sui
sooupu, sui filifilia ma
tagata e vaavaaia
42. Inisiua
43. Tusi po o faamatalaga
faaletulafono o manaoga
44. E mafai e le tausi mavaega
a se faalapopotoga ona
galue e ala i se faaiuga

**VAEGA 6
MALOSIAGA FAAAGAAGA**

45. Malosiaga faaagaaga i se
tagata e faatulagaina
meatotino e faaliliuina atu

46. Malosiaga faaagaaga e
tuuina atu i se tagata e
puipuia
47. Faatonuga ua faatonuina
48. Faatulagaga o Mavaega
Tausi Faapitoa Faava o
Malo a Samoa
49. Faamatalaina o uiga o upu
50. Faamoemoe atu o le
fuaiupu 51
51. O sea filifilia
52. O tiute tauave o le tausi
mavaega e faasino i sea
filifilia
53. Tapulaa o malosiaga o le
tausi mavaega
54. Aiaiga e faasino i faatonu
55. Faauilavea a se tausi
mavaega i le faafoega o
tulaga aliae mai faatonuina
56. Malosiaga e faamatuu atu ai
sea filifilia
57. Faamamaluina
58. Malosiaga o le Faamasinoga
e poloaia ai le faamatuu atu
59. E lē agavaa tagata e
faamanuiaina ai
60. O le tauleagavaaina o se
tausi mavaega i le ave a ai
ma faatonu
61. Faamautinoaina o manaoga
o le tagata e faatulagaina
meatotino e faaliliuina atu
62. Faatapulaaina o tiute tauave
o se tausi mavaega
63. Tuufaatasia o se mavaega
tausi o i ai se faiga faapaaga
faatapulaaina

**VAEGA 7
O ITUAIGA O MAVAEAGA
TAUSI FAAPITOA**

64. Mavaega tausi e puipuia
65. Mavaega tausi faameaalofa
66. Mavaega tausi mo
faamoemoega

**VAEGA 8
NOATAGA MA FAIGA
E FOIA AI**

67. Tausi Mavaega
68. Tapulaa i luga o noataga o le tausī mavaega - tulaga saoloto mai tuuaiga
69. Maliēga, faamatuū atu po o le faasilasilaga a tagata e faamanuiaina ai
70. Puiipuiga o le soliga o le tulaga faatuatuaina
71. Faiga e foia ai mo le soliga o le tulaga faatuatuaina
72. Tausi tau tupe pe afai e le o solia tulaga faatuatuaina
73. Tagata e puiipuia
74. Tagata e Faamamaluina

**VAEGA 9
FETUUNAIGA,
FAALĒAOGĀINA,
TULAGA LĒ MAFAIA,
FAAMUTAINA,
FEAVEAIGA**

75. Fetuunaiga ma le faalēaogāina
76. Lē mafaia po o le faalēaogāina o aia
77. Faamutaina
78. Feaveaiga

**VAEGA 10
MAVAEGA TAUSI
I ATUNUU I FAFO**

79. Mavaega Tausi i atunuu i fafo

**VAEGA 11
FAAMATALAGA
TAU MAVAEGA TAUSI**

80. Tulaga agatapuia ma le tuuina atu o faamatalaga

**VAEGA 12
MALOSIAGA O LE
FAAMASINOGA**

81. Talosaga i ma malosiaga o le Faamasinoga
82. Totogiina o tau
83. Uiga moni o aia a se tausī mavaega
84. Tulimataia o meatotino o se mavaega tausī
85. Gaumativa o tausī mavaega
86. Puiipuiga mo tagata e feutagai ma tausī mavaega
87. Tapulaa ma mea ua faatonuina
88. Mavaega tausī e faatulagaina lelei

**VAEGA 13
AIAIGA ESEESE**

89. Tulafono Faatonutonu
90. Teuteuga faatupulaia
91. Soloia, aiaiga tau soloaiga ma aiaiga faasaoina

Faamatalaga

2014, Nu.

O SE TULAFONO TAU FAAOFI UA TAUA

O SE TULAFONO e faatonutonuina ai faaletulafono mavaega tausī, tausī mavaega, meatotino o mavaega tausī ma tagata e faamanuiaina ai ma mo faamoemoega e fesootai i ai.

UA FAIA e le Fono Aoaō Faitulafono a Samoa i totonu o le Palemene ua potopoto e faapea:

**VAEGA 1
FAATOMUAGA**

1. Igoa puupuu ma le amataga-(1) E mafai ona taua lenei Tulafono o le Tulafono o Mavaega Tausi 2014.

(2) O lenei Tulafono e amata faamamaluina i le aso e tuuina i ai le maliega a Le Ao o le Malo.

2. Faamatalaina o uiga o upu - I totonu o lenei Tulafono, ae vagana ai ua manaomia e le mataupu se isi uiga e ese ai:

“galuega tauave a tausī mavaega o le puleaina o aseta”, mo le fuaiupu 32(12) e oo i le (14), o lona uiga:

(a) o le faafaigaluegaina o aseta o avea po o ua avea ma vaega o le meatotino o le mavaega tausī; ma

(b) le mauaina o le meatotino ua avea po o ua avea ma vaega o le meatotino o le mavaega tausī; ma

(c) le puleaina ma le faalēaogāina o meatotino o se mavaega tausī ma le faatulai mai po o le faalēaogāina o so o se aia i meatotino o se mavaega tausī.

“mavaega tausī faameaalofa”, o lona uiga o se mavaega tausī o lo o tausisia ai le fuaiupu 65;

“aia” o lona uiga o se mavaega tausī po o se aia i lalo o se mavaega tausī, lea e manuia ai se vasega o tagata;

“atunuu” e lē aofia ai Samoa;

“Faamasinoga” o lona uiga o le Faamasinoga Sili a Samoa;

“tagata e vaavaaia” mo meatotino o mavaega tausī, o lona uiga o se tagata o ia lea:

(a) ua tofia i se faiga tusitusia e tauaveina le malupuipua o meatotino uma po o se vaega o meatotino o se mavaega tausī po o so o se pepa aloaia po o faamaumauga e uiga i meatotino o se mavaega tausī; ma

(b) ua faamalieina o aiaiga ua faatulagaina atu i totonu o le fuaiupu 33(6).

“nofoaga o nofo ai” o lona uiga o le aiga tumau o se tagata soifua na uluai fuafuaina e ala i se faasinomaga i le aiga tumau o lona tama (po o pe afai

e le o iloa tonu le tama po o e le o mafai ona faamautinoa se faailoga e iloagofie ai e ala i se faasinomaga i le aiga tumau o lona tina) i le aso na fanau ai o lona tagata, soifua, lea e ono mafai ona suia mulimuli ane, pe a aulia e lona tagata soifua le 21 o ona tausaga, e ala i se faamoemoe o lona tagata soifua ua fuafuaina e ala i faamatalaga molimau i le leai o se tulaga masalomia talafeagai, e faasino i le ituaiga olaga o ola ai lona tagata soifua;

“tiute tauave o le vaaiga” o lona uiga o le tiute tauave o se tausī mavaega i lalo o le fuaiupu 30;

“tulafono faafoe o faamatalaga molimau” o lona uiga o le aia tatau i tulaga tutusa a le Faamasinoga e puipuia ai o se gaoioiga a so o se tagata;

“tagata ua le o aofia ai” o lona uiga o se tagata o ia lea e lē mafai lava ona faamanuiaina i se faiga tuusao po o se faiga lē tuusao mai se mavaega tausī Samoa;

“mavaega tausī i atunuu i fafo e faamanuiaina ai” o lona uiga o se mavaega tausī lea o lo o avea ai le tulafono talafeagai ma Tulafono ma o lo o avea ma tausī mavaega se kamupani o mavaega tausī ma e le o faatinoina e se tagatanuu o po o se tagata nofomau totogi lafoga a Samoa ma e leai foi ni tagatanuu moni o Samoa po o ni tagata nofomau totogi lafoga a Samoa o avea ma tagata e faamanuiaina ai;

“faamasinoga i atunuu i fafo” o lona uiga o le faamasinoga a se isi atunuu, e ese ai i lo Samoa;

“tulafono a se atunuu i fafo” o lona uiga o se tulafono a se isi atunuu, e ese ai i lo Samoa; po o se isi puleaga faa-faamasinoga e ese ai i lo Samoa, e tusa lava pe o i totonu o le isi lona atunuu pe leai foi;

“mavaega tausī i atunuu i fafo” o lona uiga o se mavaega tausī lea o lo o avea ai ma tulafono talafeagai tulafono a le atunuu i fafo;

“malosiaga lautele o tupe teufaafaigaluega” o lona uiga o le malosiaga o le tausī mavaega o tupe teufaafaigaluega i lalo o le fuaiupu 31;

“pepa faaletulafono tusitusia”:

(a) o lona uiga o se pepa aloaia faaletulafono ua faatinoina; ma

(b) e aofia ai -

(i) se pepa aloaia faaletulafono ua faatinoina i se faiga tusitusia ae le o se faamaufaaailoga;

(ii) se pepa faaletulafono e umia ai; ma

(iii) se mavaega ma se pepa e toe suia ai se mavaega.

“tagata e i ai aia” mo se mavaega tausi, o lona uiga o se tagata e faatulagaina meatotino e faaliliuina atu, tausi mavaega, tagata ua faamanuiaina ai, tagata e puipuia, tagata e faamalosia po o so o se isi lava tagata ua tuuina atu i ai le faatagaga a le Faamasinoga;

“Tulafono” o lona uiga o le tulafono a Samoa;

“faamatalaga o faiga faavae”, mo le fuaiupu 32(13), o lona uiga o se mataupu aloaia faaletulafono i se faiga tusitusia ua saunia e tausi mavaega o se mavaega tausi Samoa, po o ua saunia mo i latou ma faamaonia e i latou, ua tuuina atu ai se taiala i se sui sooupu o le a tofia e i latou e faatatau i le faatinoga o la latou galuega tauave tau le puleaina o aseta;

“fautuaga talafeagai”, mo le fuaiupu 31, o lona uiga o le fautuaga a se tagata o ia lea ua talitonuina i se tulaga talafeagai, e le tausi mavaega e faapea ua agavaa e tuuina atu i le tausi mavaega o le fautuaga tau tupe teufaafaigaluega, ona o le mafai gafatia o le tagata i ma le tomai masani i galuega faatino o mataupu tau tupe ma isi mataupu e faasino i tupe teufaafaigaluega ua fuafuaina mo le mavaega tausi lea o lo o avea ai le tausi mavaega ma tausi mavaega aloaia;

“tulafono talafeagai” o lona uiga o le tulafono a se puleaga faa-faamasinoga lea o lo o avea ma tulafono e puleaina ai se mavaega tausi;

“meatotino” o lona uiga o so o se meatotino feaveai pe lē feaveaiina, i so o se mea lava o i ai, ma e aofia ai aia tatau ma aia, e tusa lava po o i ai i le taimi nei po o le lumanai ma e tusa lava foi po o ua faaee atu po o i se tulaga faatuutuuga;

“mavaega tausi mo se faamoemoe” o lona uiga o se mavaega tausi mo se faamoemoe po o ni faamoemoega e lē mo foai faameaalofa, e tusa lava

pe o faia faatasi ma se faamoemoe po o ni faamoemoega tau foai faameaalofa ma se tagata po o ni tagata pe leai foi;

“meatotino tumau” o lona uiga o fanua ma fale ma isi meatotino e lē mafai ona feaveai ua fausia i luga po o ua faamautuina i se tulaga tumau i se fanua;

“totogi talafeagai”, mo auaunaga e tuuina atu e se tausi mavaega, o lona uiga o so o se totogi e pei ona talafeagai ai i tulaga aliae mai mo le tuuina atu o auaunaga i lena Tausi Mavaega, po o e aveai ai ma sui o lena mavaega tausi;

“tulafono faafoe a le kamupani” o lona uiga o tulafono faafoe a se kamupani ua faatulagaina mai i totonu o le Tulafono o Kamupani 2001, ma e aofia ai se mataupu o faavae o le tuufaatasia faalettulafono po o mataupu aloaia o le tuufaatasia faalettulafono o se kamupani;

“kamupani Samoa” o lona uiga o se kamupani ua tuufaatasia faalettulafono, i lalo o le Tulafono;

“mavaega tausi Samoa” o lona uiga o se mavaega tausi, o lona tulafono talafeagai lea ua po o ua aveai ma Tulafono;

“tagata e faatulagaina meatotino e faaliliuina atu” o lona uiga o se tagata, o ia lea na te aiaia meatotino o se mavaega tausi po o na te faia le faamaapeina faameaalofa o meatotino i luga o se tulaga faatuatuaina po o i se mavaega tausi;

“taiala faataatitia o tupe teufaafaigaluega”, mo se mavaega tausi Samoa, o lona uiga:

(a) o le tulaga talafeagai lelei i le mavaega tausi o tupe teufaafaigaluega o le ituaiga lava e tutusa e pei o so o se tupe teufaafaigaluega faapitoa ua fuafuaina e faia pe taofiofia ma o lena tupe teufaafaigaluega faapitoa, ia aveai o se tupe teufaafaigaluega o lena ituaiga; ma

(b) le manaoga mo le faeseeseina o tupe teufaafaigaluega a le mavaega tausi i le a lava le tulaga e talafeagai ai i tulaga aliae mai o le mavaega tausi.

“faalapotopotoga o mavaega tausi” o lona uiga o se kamupani ua faamauina po o ua laiseneina e tauaveina galuega e aveai ai o se kamupani tausi mavaega i lalo o le Tulafono;

“meatotino o se mavaega tausi” o lona uiga o meatotino o lo o umia i le taimi nei e se tausi mavaega i le noatia ma le fai fuafua i se mavaega tausi.

3. Faaaogāina o le Tulafono - Ae vagana ai ua aiaia i totonu o lenei Tulafono, e faaaogā le Tulafono i mavaega tausi ua faia a o lumanai ai po o i le tuanai ai o le aso e amata faamamaluina ai o lenei Tulafono.

VAEGA 2 O LE FAAVAEINA MA LE UIGA MONI O MAVAEGA TAUSI

4. O le uiga moni ma le i ai o se mavaega tausi - E faatulai mai se mavaega tausi pe afai o se tagata (“tausi mavaega”) o lo o umia po o sa ia faaee atu i le tausi mavaega, po o ua faatatauina e faapea ua ia faaee atu i le tausi mavaega, o meatotino, ia e le o le tausi mavaega e ona, i le tulaga o le aia tatau lava ia a le tausi mavaega:

- (a) mo le tulaga e manuia ai so o se isi lava tagata e ese ai i lo le tausi mavaega (“tagata e faamanuiaina ai”) tusa lava po o ua faamautinoaina pe leai foi po o lo o faatulai mai i lea taimi; po o
- (b) mo so o se faamoemoe lea e lē mo le manuia na o le tausi mavaega; po o
- (c) o tulaga uma e lua mo faamanuiaga ua taua i le parakalafa (a) ma le (b).

5. O manaoga mo le faavaeina o se mavaega tausi - O se mavaega tausi ua aloaia lelei ona faavaeina pe afai ua faamalieina o manaoga uma nei ua taua e faapea:

- (a) o le tagata e faatulagaina meatotino e faaliliuina atu e ia te ia le mafai gafatia e faia ai o se mavaega tausi;
- (b) ua faailoa mai e le tagata e faatulagaina meatotino e faaliliuina atu se faamoemoe e le o faia i lalo o se tulaga uunaia faamalosi ina ia faia o se mavaega tausi;
- (c) a le o se mavaega tausi -
 - (i) e i ai se tagata e faamanuiaina ai e mafai ona faamautinoaina i le taimi nei po o i se taimi lumanai; po o

- (ii) o se mavaega tausī faameaalofa; po o
- (iii) o se mavaega tausī o se faamoemoe taua; po o
- (iv) e mo le manuia o sea tagata e faamanuiaina ai ma e faapena foi mo se faamoemoe, e tusa lava pe mo galuega alofa pe leai foi;
- (d) o le tausī mavaega e i ai meatotino e mafai ona faamautinoaina ua taliaina e le tausī mavaega i le pule faitalia e lē ma fesiligia a le tausī mavaega ma ua faaee atu i le tausī mavaega mo le manuia o le tagata e faamanuiaina ai po o mo se faamoemoe o se galuega alofa pe leai foi po o mo ia itu uma po o so o se tasi o ia mea.

6. O le ituaiga mavaega tausī e mafai ona faia-(1) I le noatia ma le fai fuafua i faafuaiupu (2) e oo i le (4), e mafai ona faia o se mavaega tausī e ala i so o se tasi o auala nei ua taua e faapea:

- (a) faaaliga manino tuufofoga;
- (b) pepa faamaonia faaletulafono i se faiga tusitusia;
- (c) pulega faafoe;
- (d) i so o se isi lava faiga i le a lava le tulaga e mafai ai.

(2) E faatoa mafai lava ona faia o se mavaega tausī e ala i se pepa faamaonia faaletulafono i se faiga tusitusia.

(3) O fuaitau po o upu tau tomā faapitoa, e lē manaomia mo le faia o se mavaega tausī.

(4) E mafai ona faia o se mavaega tausī ma aloaia i le tulafono pe afai e faia i so o se gagana lava, peitai, afai o lena gagana, e le o le gagana faa-Peretania, o se faaliliuga faa-Peretania o le uluai pepa aloaia na faavaeina ai le mavaega tausī e tatau ona:

- (a) faia ma faamaonia e se tagata aloaia e faamaonia pepa faaletulafono; ma
- (b) taofia e le tausī mavaega.

7. Meatotino e mafai ona tausia i totonu o se mavaega tausia - I le noatia ma le fai fuafua i le fuaiupu 10:

- (a) o se meatotino e mafai ona tausia e, po o ua faaee atu i se tausia mavaega i luga o se tulaga faatuatuaina; ma
- (b) e mafai e se tausia mavaega, i lana pule faitalia e lē ma fesiligia, ona taliaina so o se meatotino mai so o se tagata ina ia faaopoopo atu i meatotino o le mavaega tausia.

8. O le tulafono talafeagai ma le malosiaga e suia ai lea tulafono-(1) E ao ona filifilia le tulafono talafeagai i le faasologa leni o tulaga faamuamua:

- (a) i le noatia ma le fai fuafua i le parakalafa (d), o le tulafono a le puleaga faa-faamasinoga ua filifilia e le tagata e faatulagaina meatotino e faaliliuina atu ma ua faaalina manino i aiaiga o le mavaega tausia e avea ma tulafono talafeagai; po o
- (b) i le noatia ma le fai fuafua i le parakalafa (d), o le tulafono o le puleaga faa-faamasinoga o le a faaataata mai i aiaiga o le mavaega tausia; po o
- (c) le tulafono o le puleaga faa-faamasinoga lea sa i ai le sootaga vavalalata a le mavaega tausia i le taimi na faatoa faavaeina ai; ma
- (d) pe afai o le tulafono o le puleaga faa-faamasinoga ua faaalina manino e faapea o le a, po o ua faaataata mai o le a avea ma tulafono talafeagai, peitai ane o lena tulafono e le o aiaia ai mo mavaega tausia po o mo le vasega faatulagaina o mavaega tausia ua taua, ona faaaoga lea o le parakalafa (c).

(2) Afai e talafeagai ona fuafuaina le tulafono o le puleaga faa-faamasinoga, lea sa i ai le sootaga vavalalata a le mavaega tausia i le taimi na faatoa faavaeina ai, e ao lava ona i ai, i se tulaga faapitoa, o itu taua nei ua taua e faapea:

- (a) le nofoaga o le puleaina o le mavaega tausia ua faatulagaina e le tagata e faatulagaina meatotino e faaliliuina atu;
- (b) le nofoaga o aseta o le mavaega tausia;
- (c) le nofoaga o nofomau ai po o o lo o i ai le pisinisi a le tausia mavaega; ma

- (d) sini autu faamoemoeina o le mavaega tausī ma nofoaga ia o le a faapea ona faataunuina ai.
- (3) O aiaiga nei e faaaogā i se suiga o le tulafono talafeagai:
- (a) afai ua faapea ona aiaia e se mavaega tausī, o le tulafono talafeagai e mafai ona suia i po o mai le Tulafono, i lalo o mavaega tausī; pe afai -
- (i) mo se suiga i le Tulafono, o le suiga ua aloaia e le tulafono talafeagai lea sa faamamaluina talu ai; po o
- (ii) mo se suiga mai le Tulafono, o le tulafono fou talafeagai o le a amanaia ai le tulaga aloaia o le mavaega tausī ma o mavaega tausī, malosiaga ma aiaiga o le mavaega, tausī e tumau pea ona faamamaluina ma e mafai lava ona faatinoia;
- (b) o se suiga i le tulafono talafeagai e lē aafia ai le tulaga faaletulafono faamamaluina po o le aloaia o, po o ua tuuina atu ai so o se tagata e noatia mo, so o se mea na faia a o lumanai ai le suiga.

9. Mataupu e fuafuaina e le Tulafono ni faaiuga-(1) I le noatia ma le fai fuafua i aiaiga o le mavaega tausī, o mataupu uma e faatulai mai e faasino i se mavaega tausī Samoa po o so o se faamaapeina o meatotino i po o i luga o sea mavaega tausī, e aofia ai (e aunoa ma le faatapulaaina) mataupu e uiga i:

- (a) le mafai gafatia o le tagata e faatulagaina meatotino e faaliliuina atu;
- (b) le tulaga aloaia, faauigaina po o le faamamaluina o le mavaega tausī po o le faamaapeina po o so o se fetuunaiga po o le faamutaina o le mavaega tausī;
- (c) le puleaina o le mavaega tausī, e tusa lava pe o faafoeina i totonu o Samoa po o se isi nofoaga, e aofia ai (e aunoa ma le faatapulaaina) o mataupu e faatatau i galuega tauave, le tofiaina ma le aveesea o tausī mavaega, tagata o puipuia ma tagata o faamalosiā;

- (d) le i ai ma le tulaga o so o se galuega tauave e tusa ai o le mavaega tausī, e aofia ai (e aunoa ma le faatapulaaina), o malosiaga e fetuunai ai, faalēaogāina ma le tofiaina, ma le aloaia o le faatinoga o so o sea lava galuega tauave; ma
- (e) le tufatufaina o meatotino o se mavaega tausī, o le a faapea ona fuafuaina e tusa ai ma le Tulafono, e aunoa ma le faasinomaga i le tulafono a atunuu i fafo.

(2) O le faafuaiupu (1):

- (a) e lē aloaia ai so o se faamaapeina o meatotino lea e lē gata ina e le o umia le pule e le tagata e faatulagaina meatotino e faaliliuina atu po o le avea ma mataupu autu o se malosiaga o le faamaapeina ua faaee atu i le tagata e faatulagaina meatotino e faaliliuina atu;
- (b) e lē aafia ai le tulaga aloaia o so o se tulafono a se atunuu i fafo, i le fuafuaina pe o le tagata e faatulagaina meatotino e faaliliuina atu, o ia lea e ona o so o se meatotino, po o o ia foi o lo o umia o so o sea malosiaga;
- (c) e noatia i so o se aiaiga ua faaalua manino i se tulaga e ese mai ai i totonu o le mavaega tausī po o le faamaapeina;
- (d) e lē mafai, i le fuafuaina o le mafai gafatia o le faalapotopotoga, ona aafia ai le tulaga aloaia o le tulafono i lena nofoaga na tuufaatasia ai faaletulafono;
- (e) e lē aafia ai le tulaga aloaia o so o se tulafono a se atunuu i fafo, o faatonuina ai faiga aloaia mo le faamaapeina o meatotino;
- (f) i le noatia ma le fai fuafua i le faafuaiupu (3), e lē aloaia ai so o se mavaega tausī po o se faamaapeina o meatotino tumau o lo o i ai i totonu o se puleaga faa-faamasinoga e ese mai ia Samoa, lea e le o aloaia i lalo o le tulafono a lena puleaga faa-faamasinoga; ma
- (g) i le noatia ma le fai fuafua i le faafuaiupu (3), e le o aloaia ai so o se tulaga o le faamaapeina faameaalofa o meatotino o se mavaega tausī lea e le o aloaia i lalo o le tulafono, e faasino i le nofoaga o nofomau ai lē e ona le mavaega tausī, i le taimi o lona maliu.

(3) E leai se mavaega tausi Samoa, ma e leai se faamaapeina o meatotino i po o i luga o sea mavaega tausi, ua faalēaogāina, pe mafai foi ona faalēaogāina, e noatia ina ia faataatia ese, lē aloaia pe noatia ma fai fuafua i so o se aiaiga ua faailoa, po o le fesiligia o le mafai gafatia o so o se tagata e faatulagaina meatotino e faaliliuina atu, tausi mavaega, tagata e puipuia, tagata e faamalasia po o le tagata e faamanuiaina ai, po o le noatia ai o so o se tagata e faatulagaina meatotino e faaliliuina atu, tausi mavaega, tagata e puipuia, tagata e faamalasia, tagata e faamanuiaina ai po o so o se isi lava tagata, i so o se noataga po o se aitalafu po o le taofia o so o se aia tatau, talosaga po o se aia, ona o mafuaaga e faapea:

(a) so o se tulafono a se atunuu i fafo o faasaina ai po o e le o amanaia ai le manatu lautele o se mavaega tausi; po o

(b) o le mavaega tausi po o le faamaapeina ua alofia ai po o ua faavaivaia ai po o o i ai le malosi e alofia pe faavaivaia ai o aia tatau, talosaga, aia, noataga po o aitalafu ua faaee atu po o ua tuuina atu e se tulafono a se atunuu i fafo i luga o so o se tagata -

(i) ona o se mafuaaga o se sootaga tau le tagata lava ia i le tagata e faatulagaina meatotino e faaliliuina atu po o so o se tagata e faamanuiaina ai; po o

(ii) e ala i aia tatau faa-suli moni i atunuu i fafo; po o

(c) ua solia ai pe o lo o i ai le malosi e solia ai le tulafono a se atunuu i fafo, faaiuga a se faamasinoga, poloaiga po o se gaoioiga i lalo o so o se tulafono a se atunuu i fafo ua faamoemoe ina ia amanaia ai, puipuia, faamalasia, po o le faamamaluina o so o se aia tatau, talosaga, aia, noataga po o aitalafu.

(4) E ui lava i se tulafono o i ai nei a se atunuu i fafo i le tulaga o le aloaia, po o le faamalasia o faaiuga, o se faaiuga po o se poloaiga ua faia i lalo o le tulafono a le atunuu i fafo, e lē tatau ona aloaia pe faamalasia po o e faatulai mai ai o so o se aia tatau, noataga po o se aitalafu po o le faatulai mai o so o se molimau faaletulafono e taofia ai, pe afai:

(a) e le o ogatasi ma lenei Tulafono; po o

(b) ua poloaiina e le Faamasinoga, mo faamoemoega o le puipuia o aia a tagata e faamanuiaina ai po o i le tulaga e manuia ai le puleaina lelei o le mavaega tausī.

(5) E ui lava i so o se isi lava aiaiga o lenei Tulafono, o lenei fuaiupu e faaogā i so o se taimi lava e tulai mai ai pe sa faia ai o se mavaega tausī po o se faamaapeina.

10. Tulaga aloaia ma le mafai ona faamalosiā o se mavaega tausī-(1) I le noatia ma le fai fuafua i faafuaiupu (2) ma le (3), e aloaia ma faamalosiā se mavaega tausī i lalo o ona aiaiga.

(2) O se mavaega tausī e lē aloaia ma e lē mafai ona faamalosiā pe afai:

(a) ua faamoemoe e faia o so o se mea e feteenai ai ma le Tulafono; po o

(b) ua tuuina atu po o ua faaee atu o so o se aia tatau po o galuega tauave o le faatinoga po o le faataunuaina o ia galuega e ono feteenai ai ma le tulafono; po o

(c) e leai se tagata e faamanuiaina ai o mafai ona faailoa mautinoa po o e mafai ona faamautuina i lalo o le fuaiupu 16, seia vagana ai -

(i) e mo se faamoemoe o se foai faameaalofa; po o

(ii) e mo se faamoemoe e le o se foai faameaalofa e faasino i lea itu le tulaga o lona aloaia ma le mafai ona faamalosiā e tusa ai ma le fuaiupu 66; po o

(d) ua faaalā manino e le Faamasinoga e faapea -

(i) sa faavaeina i se tulaga na uunaia faamalosi, faiga tau faasese, mea sese, se aafiaga e lē tatau ai po o faamatalaga sese po o ua solia ai tiute tauave faaletulafono;

(ii) ua o se amioga e lē tusa ai pe feteenai ma faiga faavae lautele;

(iii) o ona aiaiga ua lē mautinoa lelei ma ua faapea ai ona faigata lona faatinoga; po o

(iv) o le tagata e faatulagaina meatotino e faaliliuina atu, sa ia lē mafaia ona faia o sea mavaega tausī, i le taimi na faatoa faia ai.

(3) Afai o nisi o aiaiga o se mavaega tausī e aloaia, peitai o isi e lē aloaia:

- (a) pe afai e lē mafai ona tuueseeseina aiaiga, ona faalēaogāina lea o le mavaega tausī; ma
- (b) afai e mafai ona tuueseeseina aiaiga, e mafai e le Faamasinoga ona faaalā manino e faapea o le mavaega tausī e aloaia e tusa ma aiaiga ia ua aloaia.

(4) Afai ua faalēaogāina se vaega o se mavaega tausī, e mafai e le Faamasinoga ona faaalā manino po o a meatotino o, ae o a foi meatotino e le o umia, i le noatia ma le fai fuafua i le mavaega tausī.

(5) O meatotino ia e faalēaogāina ai o se mavaega tausī e ao ona, i le noatia ma le fai fuafua i so o se poloaiga a le Faamasinoga, tausī e tausī mavaega i tulaga faatuatuaina mo le tagata e faatulagaina meatotino e faaliliuina atu i se tulaga na o ia po o, pe afai ua maliu le tagata e faatulagaina meatotino e faaliliuina atu, mo lona sui.

(6) O se talosaga i le Faamasinoga i lalo o lenē fuaiupu e mafai ona faia e so o se tagata e i ai se aia.

11. Puleaga faa-faamasinoga a le Faamasinoga-(1) E i ai i le Faamasinoga le puleaga faa-faamasinoga pe afai:

- (a) o le mavaega tausī o se mavaega tausī Samoa; po o
- (b) o se tausī mavaega o se mavaega tausī mai se atunuu i fafo, o lo o nofomau i totonu o Samoa; po o
- (c) so o se meatotino o se mavaega tausī mai se atunuu i fafo o lo o i ai lea i totonu o Samoa; po o
- (d) o le puleaina o so o se meatotino o se mavaega tausī mai se atunuu i fafo, o lo o faatinoina lea i totonu o Samoa.

(2) E mafai e le Faamasinoga ona faalavelave i le puleaina o se mavaega tausī pe afai o lana puleaga faa-faamasinoga ua faalēaogāina e se tagata e i ai sana aia po o e pei ona aiaia e le tulafono.

(3) E lē noatia se mavaega tausī i le faaauauina o le vaavaaiga faa-faamasinoga e le Faamasinoga seia vagana ai ua faapea ona poloaiina e le Faamasinoga.

(4) O se taualumaga tau faamasinoga i luma o le Faamasinoga e uiga i po o e aafia ai se mavaega tausī, e mafai ona faasino i so o se mataupu e uiga i le puleaina o lena mavaega tausī, e aofia ai o se talosaga mo faatonuga, se talosaga mo se poloaiga mo faatonuga, ma se tagi e faaalua manino ai o aia tatau.

(5) E mafai e se tausī mavaega ona talosaga i le Faamasinoga mo faatonuga, manatu po o ni fautuaga e uiga i le faiga lea e ono mafai pe tatau ai i le tausī mavaega ona galue, e tusa ai ma so o se mataupu e faatatau i le mavaega tausī ma e mafai e le Faamasinoga ona faia so o se poloaiga e pei ona ia manatu ua talafeagai ai.

(6) E mafai e le Faamasinoga:

(a) ona faia o se poloaiga e uiga i -

(i) le faataunuina po o le puleaina o so o se mavaega tausī;

(ii) le tausī mavaega o so o se mavaega tausī, e aofia ai se poloaiga e faasino i le faatinoina o so o se malosiaga, pule faitalia po o tiute o le tausī mavaega, le tofiaina ma le aveesea o se tausī mavaega, le totogi o se tausī mavaega, le tuuina atu o faamatalaga tau tupe, o le amio e tatau ai a le tausī mavaega ma tupe e totogi atu, tusa lava pe totogiina atu tupe i le Faamasinoga po o i se isi faiga e ese ai;

(iii) le faaeeina atu o meatotino o se mavaega tausī;

(iv) se tagata e faamanuiaina ai po o so o se tagata e i ai se sootaga ma le mavaega tausī e pei ona mafai e le Faamasinoga ona fuafuaina; po o

(v) le tofiaina po o le aveesea o se tagata e faamalosia;

(b) faia o se faaaliga manino e uiga i le tulaga aloaia po o le mafai ona faamalosia o se mavaega tausī; po o

(c) le faalēaogāina po o le suia o so o se poloaiga po o se faaaliga manino ua faia i lalo o le Tulafono, po o le faia o so o se poloaiga fou po o se isi poloaiga po o se faaaliga manino.

(7) O totogi ma tupe faaalu o ma tulaga aliae mai i se talosaga i le Faamasinoga i lalo o lenei Tulafono e ao ona totogiina atu mai i meatotino o le mavaega tausī po o e tauaveina ma totogi i so o se isi lava faiga ma e so o se isi lava tagata e pei ona poloaia e le Faamasinoga.

12. Mavaega tausī tau faasese po o le faamaapeina-(1)

Afai ua faamaonia i se tulaga e lē toe masalomia ai, e se tagata nofo aitalafu o talosaga, e faapea o se mavaega tausī Samoa, po o meatotino ua faamatuu atu i se mavaega tausī Samoa:

(a) sa faavaeina pe sa faamatuu atu e po o e avea ai ma sui o le tagata e faatulagaina meatotino e faaliliuina atu ma le faamoemoe autu e faasese lea tagata nofo aitalafu i le tagata e faatulagaina meatotino e faaliliuina atu; ma

(b) faia, i le taimi na faavaeina ai, po o na faatino ai le faamaapeina, ua tuuina atu ai i le tagata e faatulagaina meatotino e faaliliuina atu, ua gaumativa po o ua aunoa ma ni meatotino lea e faia ai le tagi a lē o nofo aitalafu, pe afai e faamanuiaina, e ono mafai lava ona faamalieina,

o le tauaveina po o le faamaapeina, e le o faalēaogāina po o e ono mafai ona faalēaogāina, peitai o le meatotino tau mavaega tausī o le a faaavanoa pea e faamalieina ai lena talosaga a lē o nofo aitalafu, i le tulaga lea, peitai mo lea faavaeina po o le faamaapeina, sa tatau lava ona avanoa e faamalieina ai o lena tagi a lē o nofo aitalafu, i le taimi vave lava lea a o lumanai ai le faavaeina po o le faamaapeina o le mavaega tausī.

(2) I le fuafuaina i lalo o le faafuaiupu (1) pe o le faavaeina o se mavaega tausī Samoa po o se faamaapeina i se mavaega tausī Samoa ua tuuina atu ai i le tagata e faatulagaina meatotino e faaliliuina atu, le tulaga o le gaumativa po o ua aunoa ma ni meatotino, lea e faia ai le tagi a lē o nofo aitalafu, afai e faamanuiaina ai, o le a mafai ona faamalieina ai:

- (a) le tau aogā talafeagai faa-maketi o le meatotino a le tagata e faatulagaina meatotino e faaliliuina atu (ae le o aveva ma meatotino a lea mavaega tausī) e ao lava ona amanaia, i le taimi tonu lava lea a o tuanaī ai le faavaeina po o le faamaapeina; ma
- (b) afai o le tau aogā talafeagai faa-maketi o le meatotino e sili atu i lo le tau aogā o le tagi a lē o nofo aitalafu, i lea lava taimi, ona le aveva lea o le mavaega tausī Samoa ua faapea ona faavaeina i lea taimi, po o le faamaapeina, i, mo faamoemoega o lenei Tulafono, e faapea sa lē faavaeina, pe sa faia, ma le faamoemoe autu ia faaseseina ai lē o nofo aitalafu.

(3) O le faavaeina o se mavaega tausī Samoa ma se faamaapeina o meatotino i le mavaega tausī Samoa, e le o se faiga tau faasese e faasaga i lē o nofo aitalafu i se tagata e faatulagaina meatotino e faaliliuina atu:

- (a) pe afai o lona faavaeina po o le faamaapeina ua faatinoina i le tuanaī ai o le faamutaina o le vaitaimi e lua (2) tausaga, mai le aso na faatupulaia ai gaoioiga a lē o nofo aitalafu; po o
- (b) pe afai o le faavaeina po o le faamaapeina na faatino a o lumanai ai le vaitaimi e faamuta ai le lua (2) tausaga, mai le aso na faatupulaia ai gaoioiga a lē o nofo aitalafu, ma ua lē mafai e lē o nofo aitalafu, ona amataina lena gaoioiga, a o lumanai ai le faamutaina o le tasi (1) le tausaga mai le aso na faavaeina ai po o le aso na faamaapeina ai.

(4) O le faavaeina o se mavaega tausī Samoa ma se faamaapeina o meatotino i lea mavaega tausī Samoa, e le o se tulaga tau faasese, e faasaga i lē o nofo aitalafu i le tagata e faatulagaina meatotino e faaliliuina atu, pe afai o le faavaeina po o le faamaapeina o meatotino, sa faatinoina a o lumanai ai le faatupulaia po o le faatulai mai o gaoioiga a lē o nofo aitalafu e faasaga i le tagata e faatulagaina meatotino e faaliliuina atu.

(5) E lē tatau i se tagata e faatulagaina meatotino e faaliliuina atu ona tuuina atu ma le faamoemoe e tau faasese lē o nofo aitalafu, pe afai o le tagata e faatulagaina meatotino e faaliliuina atu:

(a) ua na faavaeina, o se mavaega tausī Samoa po o ua na faamatuū atu o meatotino i lea mavaega tausī Samoa i totonu o le lua (2) tausaga mai le aso o le gaoioiga ua faatupulaia a lē o nofo aitalafu; po o

(b) o ia o se tagata e faamanuiaina ai.

(6) Afai o le meatotino tau mavaega tausī a se mavaega tausī Samoa e noatia ina ia faamalieina ai se tagi a lē o nofo aitalafu, i le faiga e pei ona aiaia i totonu o le faafuaiupu (1), ae peitai e lē mafai ona faaogāina faapena, talu ai ona o le meatotino sa faamatuū atu, e ese mai ai i lo le tagata moni e faatauina mai mo le tau aogā, o le faamaapeina ua faalēaogāina.

(7) I totonu o lenei fuaiupu:

“lē o nofo aitalafu” e aofia ai se tagata o ia lea ua tuuaia i se faapogai o se gaoioiga;

“aso na afua ai ona faatupulaia o le gaoioiga a lē o nofo aitalafu”, o lona uiga:

(a) o le aso o lena gaoioiga po o se mea ua lē faia lea o le a faalagolago i ai le faavaeina o se mafuaaga o le gaoioiga i sona vaega po o i lona aotelega ma, pe afai e sili atu i lo le tasi (1) le gaoioiga po o se mea ua lē faia o lo o faaauau pea, o le aso o le gaoioiga muamua po o le aso na tulai muamua mai ai le mea ua lē faia; ma

(b) mo se faaiuga a le faamasinoga, o le aso o lena gaoioiga po o se mea ua lē faia, na faapogai i le faaiuga, po o pe afai e sili atu i lo le tasi (1) le gaoioiga po o le mea ua lē faia o lo o faaauau pea, o le aso o le gaoioiga muamua po o le aso lea na faatulai muamua mai ai le mea ua lē faia, i le a lava le tulaga e mafai ai, lea na faatulai mai ai le faaiuga faa-faamasinoga.

13. Tagi po o faaiuga tau faamasinoga mai atunuu i fafo e lē mafai ona faamalosia-(1) Afai o se mavaega tausī Samoa ua aloaia ona faatuina i lalo o lenei Tulafono, e lē tatau i le Faamasinoga ona suia lea mavaega tausī pe faataatia ese pe amanaia le tulaga aloaia faaletulafono o so o se tagi e faasaga i meatotino tau mavaega tausī e tusa ai

o so o se tulafono mai fafo po o se poloaiga a so o se faamasinoga mai fafo mo:

- (a) taunuuga tau le tagata lava ia ma tulaga talafeagai o faaiipoipoga po o le faamutaina o se faaiipoipoga;
- (b) o aia tatau tau soloaiga, e tusa lava pe ua tuua o se mavaega tausi aloaia ina ua maliu po o e le i faia o se mavaega tausi a o le i maliu e aofia ai o sea tumau po o aia a taitoalua po o tagata e aiga i ai;
- (c) so o se tagi po o poloaiga ua faia e se faamasinoga mai fafo e faatatau i mataupu ua faasinomia i totonu o le parakalafa (a) po o le (b) e uiga i le tulafono mai fafo e faasino i le tagata e faatulagaina meatotino e faaliliuina atu po o so o se tagata e faamanuiaina ai;
- (d) o tagi a tagata o lo o nofo aitalafu i se tulaga gaumativa o i ai, e noatia ma fai fuafua i le fuaiupu 12;
- (e) so o se tagi e faatatau i le tulaga aloaia faaetutulafono o so o se faaliliuina atu po o le faamaapeina o meatotino i se mavaega tausi Samoa;
- (f) so o se tagi e faatatau i le tulaga o le mafai gafatia o le tagata e faatulagaina meatotino e faaliliuina atu; po o
- (g) so o se tagi ona o le mafuaaga e faasaina e so o se tulafono mai fafo, po o e lē amanaia ai le manatu faatauaina o se mavaega tausi.

(2) Mo le alofia ai o ni masalosaloga, ua faaalua manino ai nei e faapea, pe a tulai mai o so o se itu e lē ogatasi i le va o le tulafono talafeagai o se mavaega tausi ma so o se isi tulafono mai fafo e faasino i le tagata e faatulagaina meatotino e faaliliuina atu po o so o se isi tagata e faamanuiaina ai, e tatau ona aloaia le tulaga muamua sa i ai.

VAEGA 3

UMI O LE VAITAIMI MA TULAGA FAATUPULAIA

14. Umi o le vaitaimi o se mavaega tausi-(1) E mafai ona faaalua manino se mavaega tausi Samoa ina ia faaauau pea mo se vaitaimi ua faatulagaina po o seia vagana ai ua tulai mai o se tulaga ua faamaotiina.

(2) Afai e le o faaalua i se mavaega tausī Samoa le tulaga e faaauau ai pea mo se vaitaimi faatulagaina po o seia vagana ua tulai mai o se tulaga ua faamaotiina, o lona uiga, i le noatia ma fai fuafua i isi aiaiga o lenei fuaiupu ma lenei Tulafono, o le mavaega tausī e faaauau pea mo se vaitaimi e lē mautinoa.

(3) E ui lava i faafuaiupu (1) ma le (2) ma le mavaega tausī, ma i le noatia ma fai fuafua i le faafuaiupu (4), e mafai e le tausī mavaega, e ala i se pepa aloaia faaletulafono e umia ai:

- (a) ona faaalua manino e faapea, o se mavaega tausī lea e faaauau mo se vaitaimi lē mautinoa, e faamutaina i le faaiuga o se vaitaimi ua faatulagaina po o i luga o le tulai mai o se tulaga faamaotiina; ma
- (b) ia faaalua manino ai e faapea, o se mavaega tausī lea e faamutaina i le faaiuga o se vaitaimi faatulagaina, po o i luga o le tulai mai o se tulaga faamaotiina, e faaauau pea mo se vaitaimi e lē mautinoa; ma
- (c) le suia o aiaiga o se mavaega tausī e ala i le faatupulaaina po o le toe faaopoopo o se vaitaimi faatulagaina lea pe a faagasolo, e faaauau ai pea po o le suia ai po o le faaalua manino ai o le tulaga ua faamaotiina ua tulai mai, ma i le tulai mai o lea itu o le a faapea ona faamutaina ai loa.

(4) E mafai ona aofia ai i le mavaega tausī so o se tasi o aiaiga i lalo o le faafuaiupu (3) ma, seia vagana ai ua aiaia e le mavaega tausī se isi faiga e ese ai, e mafai e le tausī mavaega, e ala i se pepa aloaia faaletulafono e umia ai, ona fetuunai, pe suia le mavaega tausī, ina ia avanoa ai o so o se mataupu i lalo o le faafuaiupu (3), ma i la lea tulaga, e ave le faamuamua i le mavaega tausī i lo le faafuaiupu (3).

15. Malosiaga o le faatupulaia o tupe maua ma tupe faamatuina atu muamua-(1) E mafai e se mavaega tausī ona faatonuina pe faatagaina, i le pule faitalia a le tausī mavaega, le faatupulaia o tupe maua uma po o so o se vaega o tupe maua o le mavaega tausī mo so o se vaitaimi po o seia oo ina tulai mai o so o se itu ua faamaotiina.

(2) Afai o se mavaega tausī e le o aofia ai ni aiaiga e tai tutusa ma aiaiga o i le faafuaiupu (1), o tupe maua o le mavaega tausī e mafai ona faatupulaia i lona atoaga po o i sona vaega, i le pule faitalia a le tausī mavaega, a o faagasolo pea le faaauauina o le mavaega tausī.

(3) I le noatia ma le fai fuafua i le faafuaiupu (4), o tupe maua o le mavaega tausī e le o faatupulaia i lalo o faafuaiupu (1) ma le (2), e ao lava ona tufatufaina atu.

(4) I le noatia ma le fai fuafua i le mavaega tausī ma i so o se uluai tului po o tau faaee atu o aafia ai meatotino tau mavaega tausī, pe afai o se tagata e faamanuiaina ai o se tamaitiiti, ma e tusa lava pe o le aia a le tagata e faamanuiaina ai pe leai foi:

(a) o se aia ua faaee atu faaletulafono; po o

(b) o se aia lea o le a faaee atu faaletulafono -

(i) ina ua ausia le tausaga o le tagata matua;

(ii) i so o se isi tausaga mulimuli ane; po o

(iii) i le tulai mai o so o se mea e tupu, e mafai e le Tausi Mavaega ona:

(A) faatupulaia le tupe maua e tatau ona faamanuiaina ai sea tagata e faamanuiaina ai, a o talia le ausia o le aso o lona matua faatagaina po o i se tausaga o le matua mulimuli ane po o le tulai mai o se mea ua tupu; po o

(B) faaaogā le tupe maua po o sona vaega i po o mo le tausiga, aoga po o isi faamanuiaga a le tagata e faamanuiaina ai; po o

(C) faamatuu atu muamua pe faatatauina i po o mo le manuia o le tagata e faamanuiaina ai, le tupe tului po o se vaega o le tupe tului.

(5) O le taliaina e se matua po o lē o vaia faaletulafono se tagata e faamanuiaina ai, o ia lea o se tamaitiiti, o se faatinoga ua lava lea a le tausī mavaega mo se tupe e totogi atu ua faia i lalo o le faafuaiupu (4).

(6) I le noatia ma le fai fuafua i le faafuaiupu (8), o le mavaega tausī ma so o se uluai tului po o tau faaee atu o aafia ai meatotino tau mavaega tausī, o le tausī mavaega e

mafai ona ia faamatuu atu muamua pe faaaogā meatotino tau mavaega tausī mo le manuia o le tagata e faamanuiaina ai.

(7) O le meatotino tau mavaega tausī ua faamatuu atu muamua pe faaaogāina i lalo o le faafuaiupu (6) e ao ona aofia ai pe a fuafuaina le sea o le tagata e faamanuiaina ai i le meatotino tau mavaega tausī.

(8) So o se vaega o le meatotino tau mavaega tausī ua faamatuu atu muamua po o ua faaaogāina i lalo o le faafuaiupu (6) e lē tatau ona sili atu i sea e le o mautu, tulaga faatuutuuga po o sea ua faaee atu faaletulafono a le tagata e faamanuiaina ai, i le meatotino tau mavaega tausī.

VAEGA 4 VAEGA AUAI I SE MAVAEGA TAUSI

16. O tagata e mafai ona avea ma ē faamanuiaina ai ma le faamautinoaina o i latou-(1) O se tagata e faamanuiaina ai e ao ona:

- (a) mafai ona faamautinoaina i lona igoa; po o
- (b) mafai ona faamaonia e ala i se faasinomaga i -
 - (i) se vasega o tagata; po o
 - (ii) se sootaga i se isi tagata e tusa lava pe o soifua mai pe leai foi, i le taimi o le faavaeina ai o le mavaega tausī po o i le taimi o fai ai se faasinomaga i ai, i lalo o aiaiga o le mavaega tausī, sui auai o se vasega o le a faapea ona fuafuaina.

(2) E mafai foi, e se tagata e faatulagaina meatotino e faaliliuina atu, po o se tausī mavaega po o se tagata e puipuia po o se tagata e faamalosiā, a se mavaega tausī ona avea ma se tagata e faamanuiaina ai o le mavaega tausī.

17. Malosiaga e faaopoopo i ma le aveesea ai mai tagata e faamanuiaina ai ma ia faatulaga tagata e le o aofia ai-(1) E mafai e se mavaega tausī Samoa ona aiaia ai mo malosiaga e mafai ona faatinoina e le tagata e faatulagaina meatotino e faaliliuina atu, po o le tagata e puipuia po o le tausī mavaega, po o so o se isi lava tagata po o tagata pe na o ia pe o soofaatasi po o i tulaga tau soloaiga ma e tusa ai ma le faasologa o tulaga faamuamua e ala i pepa aloaia faaletulafono e umia ai, e mafai ona faalēaogāina pe leai foi:

- (a) e faaopoopo i tagata e faamanuiaina ai;
- (b) e aveese mai tagata e faamanuiaina ai; ma

(c) e faatulaga tagata e lē aofia ai.

(2) Afai o se tagata e faamanuiaina ai o i ai nei a se mavaega tausī Samoa, ua faatulagaina o ia e avea o se tagata e le o aofia ai, o le gaoioiga o le a aloaia ai so o se uluai tufatufaga na faia i po o se faamanuiaga na tuuina atu i lena tagata ua faamanuiaina ai mai le mavaega tausī.

18. Aiaiga e lē noatia ai-(1) E ui lava i aiaiga o se mavaega tausī Samoa, o se tagata e faamanuiaina ai o le mavaega tausī Samoa e mafai ona ia faamatuu ese atu, i se tulaga tumau po o mo so o se vaitaimi ua faamaotiina e le tagata ua faamanuiaina ai, o le atoaga po o so o se vaega o le tupe tului a le tagata e faamanuiaina ai i lalo o le mavaega tausī Samoa, e tusa lava pe na mauaina e le tagata ua faamanuiaina ai so o se faamanuiaga mai le tupe tului, pe leai foi.

(2) O se aiaiga e lē noatia ai ua faia i lalo o le faafuaiupu (1):

- (a) e ao ona faia i se faiga tusitusia;
- (b) e mafai, i le noatia ma le fai fuafua i le mavaega tausī Samoa, ona faalēaogāina ma e mafai ona faatinoina i le faiga ma, i lalo o tulaga aliae mai ua faapea ona taua; ma
- (c) e lē aafia ai o aia tatau ma aia a le tagata ua faamanuiaina ai a o lumanai ai le aiaiga e lē noatia ai.

19. Aia a se vasega o tagata - I le noatia ma le fai fuafua i aiaiga o se mavaega tausī Samoa, o itu nei ua taua i lalo e faaaogā, pe afai o se mavaega tausī, po o se aia i lalo o se mavaega tausī, e manuia ai se vasega o tagata:

- (a) e faamutaina se vasega o tagata, pe afai ua lē toe mafai, mo so o se isi lava tagata ona avea ma sui auai o le vasega;
- (b) o se tamaitai ua silia i le 50 tausaga o lona soifua ua faatatauina e faapea ua lē toe mafai ona fanauina o se tamaitiiti;
- (c) afai o se aia a se vasega o tagata e faatatau i tupe maua ma mo so o se vaitaimi lava e leai se sui auai o le vasega o lo o i ai nei, o le tupe maua o le a -
 - (i) faatupulaia; ma

(ii) i le noatia ma le fai fuafua i le fuaiupu 15 e taofia seia i ai o se sui auai o le vasega o tagata o i ai nei po o le vasega ua faamutaina.

20. Aia a se tagata e faamanuiaina ai ma le faafoeina o sea aia - O le aia a le tagata e faamanuiaina ai:

- (a) o meatotino tau le tagata lava ia; ma
- (b) i le noatia ma le fai fuafua i aiaiga o le mavaega tausī, e mafai ona faaliliuina atu, tuuina atu, faaee atu po o le tagofia i se isi faiga e ese ai.

21. Tagata e puipuia-(1) E mafai ona aiaia e se mavaega tausī Samoa, le tofiaina o se tagata e puipuia i se tulaga e mafai ona faalēaogāina pe leai foi, e ala i se pepa aloaia faaletulafono e umia ai.

(2) I le noatia ma le fai fuafua i le mavaega tausī, o se tagata masani ua matua le soifua ma e lelei lona mafaufau po o se faalapotopotoga ua tuufaatasia faaletulafono po o so o se kamupani po o se faiga faapaaga po o se vaega po o se itutino o tagata, e tusa lava pe ua tuufaatasia faaletulafono pe leai foi, e ese ai i lo le tausī mavaega po o le tagata e faamalosia le mavaega tausī e mafai ona tofia o se tagata e puipuia, e aofia ai le tagata e faatulagaina meatotino e faaliliuina atu ma so o se tagata ua faamanuiaina ai.

(3) O le mavaega tausī po o se pepa aloaia faaletulafono e umia ai e ese ai, lea e avea ai ma vaega auai le tagata e faatulagaina meatotino e faaliliuina atu o le tausī mavaega ma le tagata e puipuia, (pe afai ua taua ai lona igoa i le pepa aloaia faaletulafono o faavaeina ai le mavaega tausī), e mafai ona aiaia ai mo mataupu e uiga i le tofiga ma le matafaioi a le tagata e puipuia, e aofia ai ae lē faatapulaaina i:

- (a) le taliaina e le tagata e puipuia, o le tofiga o le tagata e puipuia ma faamaonia, pe afai e talafeagai ai, e faapea ua loto lava i ai le tagata ma ua agavaa ina ia tofia ma sa faapea ona fautuaina i se tulaga na o ia, i le uiga o le matafaioi ma malosiaga o le tagata e puipuia, po o le lē manaomia o lena fautuaga faatino i se tulaga toatasi, ma taliaina ai le tofiga;

- (b) le tofiaina o ni tagata e puipuia i se tulaga soofaatasi, i se faiga e mafai ona faalēaogāina pe leai foi;
- (c) le tofiaina o tagata e puipuia e soloai ane i ai i se tulaga e mafai ona faalēaogāina pe leai foi, lea e mafai ona faia i se tulaga tau soloaiga mai le tasi tagata i le isi;
- (d) le tofiaina o se tagata e puipuia pe afai e leai se tagata e puipuia;
- (e) le faamatalaga e ao ona tuuina atu i le tagata e puipuia; ma
- (f) so o se isi lava mataupu ua tuuina atu mulimuli ane i totonu o lenei fuaiupu.

(4) E ao i le tagata e puipuia ona toe faaolaina atu o tupe faaalu uma e aloaia ma talafeagai mo le faatinoga o le tofi o le tagata e puipuia ma, i le noatia ma le fai fuafua i le mavaega tausī, e mafai e le tagata e puipuia ona faaee atu se totogi talafeagai mo le faatinoga o auaunaga i le avea ai ma tagata e puipuia a le mavaega tausī.

(5) E mafai e se tagata e puipuia, e ala i le mavaega tausī po o se pepa aloaia faaletulafono e umia ai, e ese ai, ona faamatuu atu so o se malosiaga e amatalia ai suiga po o e faapea o le faatinoga o so o se malosiaga e le tausī mavaega e manaomia ai le uluai maliega tusitusia a le tagata e puipuia.

(6) I le noatia ma le fai fuafua i le mavaega tausī, o le tagata e puipuia, e i ai malosiaga nei e muai galue ai:

- (a) e aveesea ma ia tofia o tausī mavaega fou po o tausī mavaega faaopoopo;
- (b) e faaopoopo so o se tagata e avea o se tagata e faamanuiaina ai a le mavaega tausī;
- (c) e aveesea so o se tagata o avea o se tagata e faamanuiaina ai a le mavaega tausī;
- (d) ina ia faatulaga so o se tagata e lē aofia ai;
- (e) ina ia suia le tulafono talafeagai o le mavaega tausī; ma
- (f) ia suia le fono e faafoeina le mavaega tausī.

(7) Afai e i ai tagata e puipuia o galulue soofaatasi o le mavaega tausī, i le noatia ma le fai fuafua i aiaiga feteenai i le mavaega tausī, so o se galuega tauave po o malosiaga ua faaee atu i tagata e puipuia, e mafai ona faatinoina e i latou, e ala i le vaega aupito toatele o tagata e puipuia.

(8) O se tagata e puipuia o ia lea e faatuiese mai se faaiuga a se vaega aupito toatele o tagata e puipuia, e mafai ona manaomia o lana tetee ina ia faamauina i se faiga tusitusia.

(9) O se tagata e puipuia o faatinoina so o se tasi (1) po o le sili atu o malosiaga ua faaee atu e le mavaega tausī po o e se pepa aloaia faaletulafono e ese e le o faaogāina, e tusa ai o lena faatinoga o malosiaga, e avea o se tausī mavaega.

(10) Afai:

(a) e manaomia le maliega a le tagata e puipuia i le faatinoga o se malosiaga e le tausī mavaega, o le maliega ia tuuina atu aloaia ma ia galue foi le tausī mavaega i le agaga lelei; po o

(b) ua galue le tausī mavaega i lalo o se faatonuga a le tagata e faatulagaina meatotino e faaliliuina atu po o le tagata e puipuia ua tuuina atu aloaia ma ua galue le tausī mavaega i le agaga lelei,

e lē noatia le tausī mavaega mo so o se mea ua leiloa i se ala tuusao pe leai foi, e faapogai mai so o se gaoioiga ua taunuu i ai po o se mea foi ua lē faia.

(11) E mafai e se tagata e puipuia, e ala i se pepa aloaia faaletulafono, ona faamatuu atu pe soloia uma po o so o se tasi o malosiaga ua tuuina atu i le tagata e puipuia.

22. Tagata e faamalosia-(1) O se mavaega tausī tau faamoemoega ua faatuina i lalo o le fuaiupu 66 e tatau ona aiaia ai mo le tofiaina o:

(a) se tagata e faamalosia; ma

(b) se tagata fou e faamalosia i so o se taimi pe afai ua leai se tagata e faamalosia,

ma e aloaia i lena lava tulaga.

(2) Ae vagana ai ua aiaia i totonu o le faafuaiupu (3), o se tausī mavaega o se mavaega tausī mo se faamoemoe po o se tagata o ia lea e i ai se aia feteenai i le galue ai o se tagata e faamalosia le mavaega tausī tau faamoemoega, e lē tatau ona tofia pe tumau ai ona avea ma tagata e faamalosia a se mavaega tausī tau faamoemoega.

(3) O le tagata e faatulagaina meatotino e faaliliuina atu, o lona sui i se faalapotopotoga po o so o se isi lava tagata, e mafai ona tofia e avea o se tagata e faamalosia se mavaega tausī tau faamoemoega.

(4) O le tiute o le tagata e faamalosia, o le faamalosia lea o faamoemoega e le o ni foai faameaalofa, o se mavaega tau faamoemoega.

(5) Ae vagana ai ua faatagaina e lenei Tulafono po o ua aiaia manino e le mavaega tausī, po o ua i ai faatasi ma le faamaoniga a le Faamasinoga, e lē tatau i le tagata e faamalosia ona:

- (a) maua o ni tupe faasili i se faiga tuusao pe lē tuusao foi, mai lona tofiga;
- (b) faia pe faatagaina so o se isi lava tagata ina ia maua o ni tupe faasili i se ala tuusao pe leai foi mai sea tofiga; po o
- (c) i lona lava manatu, ua ulufale ai i so o se feuaiga faapisinisi ma tausī mavaega po o e faasino i meatotino tau mavaega tausī lea e ono taunuu atu i ni tupe faasili mo ia lava po o le tausī mavaega.

(6) I le noatia ma le fai fuafua i le faafuaiupu (7):

- (a) e mafai e le tagata e faamalosia ona faamavae mai le tofi, e ala i se faasilasilaga tusitusia e faaoo atu i le tausī mavaega, e amata faamamaluina ina ua faaoo atu o le faasilasilaga; ma
- (b) o le faamavaega e lē faamatuuina atu ai le tagata e faamalosia mai noataga e uiga i le mavaega tausī tau faamoemoega lea sa avea ai o ia ma tagata e faamalosia na faatulai mai a o le i oo ina aloaia le faamavaega.

(7) O se faamavaega ua tuuina atu ina ia mafai ona faafaigofie ai le soliga o le tulaga faatuatuaina, e lē aloaia lea.

(8) O se tagata e faamalosia, e faamutaina le avea o ia ma tagata e faamalosia se mavaega tausī, e faasino i ona faamoemoega e lē mo ni foai faameaalofa, i le taimi lava e:

- (a) aveesea ai le tagata e faamalosia mai le tofi e le Faamasinoga;
- (b) aloaia ai le faamavaega a le tagata e faamalosia;
- (c) e faamamaluina aloaia ai se aiaiga i totonu o se mavaega tausī, lea ua aveesea ai le tagata e faamalosia mai le tofi po o ua taofia le umia o le tofi i se isi faiga e ese ai; po o
- (d) le tofiga o le tagata e faamalosia e avea o se tausī mavaega o le mavaega tausī.

(9) Afai ua leai se tagata e faamalosia a le mavaega tausī tau faamoemoega, e ao i le tausī mavaega o le mavaega tausī tau faamoemoega ona faia o ni laasaga talafeagai e faamautuina ai le tofiaina o se tagata fou e faamalosia.

(10) Afai ua i ai o se mafuaaga e talitonu ai le tausī mavaega o se mavaega tausī tau faamoemoega, e faapea e le o naunau pe ua teena le galue ai o le tagata e faamalosia, po o ua lē talafeagai ona galue po o ua lē mafaia ona galue, e ao i le tausī mavaega ona talosaga i le Faamasinoga mo le aveesea o le tagata e faamalosia ma le tofiaina o sona sui.

(11) O se tagata e faamalosia, e ao ona tuuina atu i ai:

- (a) o faamatalaga tau tupe, e aofia ai faamatalaga tau tupe faaletausaga o le mavaega tausī tau faamoemoega;
- (b) ata o pepa faamaonia faaletulafono o le mavaega tausī o faatulagaina ai le mavaega tausī tau faamoemoega ma so o se pepa aloaia faaletulafono e umia ai po o pepa aloaia ua faasinomia i totonu o pepa faamaonia faaletulafono po o pepa faaopoopo i ai;
- (c) so o se manatu ma fautuaga faaletulafono ua mauaina e le tausī mavaega; ma
- (d) so o se isi lava pepa aloaia po o faamatalaga lea e mafai ona agavaa i ai i lalo o aiaiga o le mavaega tausī tau faamoemoega.

(12) O se tagata e faamalosia e i ai:

- (a) o aia tatau tutusa ma se tagata e i ai se aia tau faamanuiaga, i lalo o se mavaega tausī masani, ina ia faatino o ni gaoioiga tau le faafoega ma isi gaoioiga, e aofia ai le faia o se talosaga i le Faamasinoga mo lana faatonuga, mo le manuia o le mavaega tausī;
- (b) o aia tatau a se tausī mavaega o se mavaega tausī masani e tusa ma le puipuiga, faamalumaluga ma le totogiina o tupe faaalu mai meatotino tau mavaega tausī, ma le faia o talosaga i le Faamasinoga i lalo o le fuaiupu 81; ma
- (c) i le aveai ai ma sui o le mavaega tausī, o tulaga tutusa e foia ai le soliga o le tulaga faatuatuaina, i le itu i le faale-tagata lava ia ma tulaga o le umia o se pisinisi, e faasaga

i se tausī mavaega ma e faasaga foi i isi vaega uai o aveā ma tagata e faamanuiaina ai o se mavaega tausī masani.

VAEGA 5 TAUSI MAVAEGA

23. Aofaiga o tausī mavaega-(1) O le aofaiga o tausī mavaega o se mavaega tausī e tataū, a itiiti mai o le toalua (2), seia vagana ai:

- (a) na o le toatasi (1) le tausī mavaega sa muai tofia;
- (b) o se faalapotopotoga o mavaega tausī ua tofia;
- (c) o lo o galue pea le Tausī Mavaega a le Malo; po o
- (d) ua aiaia i le mavaega tausī se isi faiga e ese ai.

(2) E lē faaletonu se mavaega tausī i luga o le mafuaaga e faapea e leai se tausī mavaega po o ua itiiti ifo i lo le aofaiga manaomia e le faafuaiupu (1).

(3) Afai e pau le aofaiga o tausī mavaega i lalo ifo o le aofaiga o le tapulaa maualalo o manaomia e le faafuaiupu (1), po o, pe afai e sili atu e ala i le mavaega tausī, o le aofaiga manaomia o tausī mavaega fou e ao ona tofia i se taimi vave lava e mafai ai.

(4) A o toaititi lava tausī mavaega i lo le aofaiga manaomia e le mavaega tausī, o tausī mavaega o i ai i le taimi nei, e faatoa mafai lava ona galulue mo le faamoemoe o le faasaoina o meatotino tau mavaega tausī.

24. Tofiaina o tausī mavaega-(1) Afai e tulai mai itu nei, e mafai ona tofia o se tausī mavaega fou po o se tausī mavaega faaopopo, i lalo o le faafuaiupu (2):

- (a) o se mavaega tausī a Samoa, e leai se aiaiga o aofia ai mo le tofiaina o se tausī mavaega fou po o se tausī mavaega faaopopo;
- (b) ua faalēaogāina po o ua faaletonu le aiaiga; po o
- (c) o le tagata o i ai le malosiaga e faia ai o se tofiga e lē mafai ona ia faatinoina le malosiaga.

(2) E mafai, ona tofia se tausī mavaega fou po o se tausī mavaega faaopopo e tagata ua taua i lalo i le faatulagaga e ave i ai le faamuamua:

- (a) le tausī mavaega o i ai i le taimi nei;

- (b) o le tausī mavaega mulimuli o lo o totoe;
- (c) o le sui tau le tagata lava ia po o le tagata e faamaapeina a le tausī mavaega mulimuli o lo o totoe; po o
- (d) le Faamasinoga.

(3) I le noatia ma le fai fuafua i le mavaega tausī, o se tausī mavaega ua tofia i lalo o lenei fuaiupu e i ai galuega tauave tutusa o galuega tauave, ma e mafai ona galue i tulaga uma lava, e peiseai ai o le tausī mavaega sa tofia muamua o se tausī mavaega.

(4) E mafai e le Faamasinoga ona aveesea se tausī mavaega e i ai le malosiaga e tofia ai se tausī mavaega fou po o se tausī mavaega faaopopo, o ia lea ua lē mafai ona ia faatinoina lena malosiaga.

(5) I le tofiaina o se tausī mavaega fou po o se tausī mavaega faaopopo, e ao lava ona faia o so o se mea talafeagai e faaee atu le meatotino tau mavaega tausī i le tausī mavaega o soofaatasi ma so o se tasi o ana tausī mavaega o galulue soofaatasi.

25. Taliaina o le tulaga faa-tausī mavaega-(1) I le noatia ma le fai fuafua i le faafuiaiupu (3), o se tagata ua tofia e avea ma tausī mavaega e lē manaomia ona taliaina le tofiga peitai ua avea lava e faapea ua faia e le tagata, pe afai na auai ma le iloa i, po o le faalavelave ma le iloa lelei e le tagata le mavaega tausī po o ana mataupu.

(2) E mafai e se tagata ua tofia e avea ma tausī mavaega, a o lumanai ai lona taliaina (i le tulaga moni po o ua faatatauina):

- (a) ona faamatuu atu le tofiga e ala i se faaaliga tusitusia i le tagata e faatulagaina meatotino e faaliliuina atu po o i isi tausī mavaega; po o
- (b) pe afai ua maliu le tagata e faatulagaina meatotino e faaliliuina atu po o ua lē mafai ona maua o ia, ma ua leai foi se isi lava tausī mavaega, ona talosaga i le Faamasinoga mo se faamamaavega mai le tofiga, la lea tulaga e mafai ai e le Faamasinoga ona faia o so o se poloaiga e pei ona ia manatu ua talafeagai ai.

(3) Afai o le tagata ua tofia e avea ma tausī mavaega ua lē galue i lalo o le faafuaiupu (2), i totonu o se taimi talafeagai i lona silafiaina o le tofiga, ua faatatauina lava lea tagata e faapea ua na taliaina le tofiga.

(4) O se tagata ua tofia e avea ma tausī mavaega, e aunoa ma lona taliaina o le tulaga faa-tausī mavaega, e mafai, i le aunoa ai ma noataga mo mea e leiloa:

- (a) ona galue e faasaoina meatotino tau mavaega tausī pe afai, i totonu o se taimi talafeagai i le tuanai ai ona galue, ua auina atu e le tagata o se tusitusiga e teena ai le tulaga faa-tausī mavaega i le tagata e faatulagaina meatotino e faaliliuina atu po o, pe afai ua maliu le tagata e faatulagaina meatotino e faaliliuina atu po o ua leai sona mafai gafatia, i se tagata e faamanuiaina ai ua taua lona igoa;
- (b) asiasia pe susesueina meatotino tau mavaega tausī e fuafuaina ai noataga e ono tulai mai i lalo o le tulafono talafeagai po o so o se tulafono mai fafo po o mo so o se isi lava faamoemoe; po o
- (c) le talosaga i le Faamasinoga mo faatonuga po o ni fautuaga.

26. Avanoa i tulaga tofi faa-tausī mavaega-(1) O se avanoa i se tulaga tofi faa-tausī mavaega e faatulai mai pe afai:

- (a) ua teena e se tagata ua tofia e avea ma tausī mavaega, le tulaga tofi faa-tausī mavaega;
- (b) ua lē mafai ona faailoa mautinoa po o e le o i ai, se tagata ua tofia e avea ma tausī mavaega;
- (c) o se tausī mavaega ua faamavae;
- (d) o se tausī mavaega ua aveesea;
- (e) o se tausī mavaega ua maliu; po o
- (f) o se tagata e vaavaaia faaletulafono ua tofia mo se tagata e toatasi o galue e avea o se tausī mavaega.

(2) O le fuaiupu 24(1) ma le (2) e faaaogā, pe afai e le o aiaia i se mavaega tausī le tofiaina o se tausī mavaega fou.

(3) I le noatia ma le fai fuafua i le mavaega tausī, o se tausī mavaega ua tofia i lalo o lenei fuaiupu e i ai malosiaga tutusa, pule faitalia ma tiute ma e mafai ona galue e peiseai o le tausī mavaega sa muai tofia e avea ma tausī mavaega.

(4) E mafai e le Faamasinoga ona:

(a) aveesea o se tausī mavaega na tuuina atu i ai le malosiaga e tofia ai se tausī mavaega fou, o ia lea ua lē mafai ona ia faatinoina o lena malosiaga; ma

(b) tofia se tausī mavaega fou.

(5) Afai e toatasi (1) po o le sili atu o tausī mavaega o galulue faatasi o i ai pea i le tofi, o se avanoa i le tulaga tofi faa-tausī mavaega o le a lē tatau ona faatumuina.

(6) O se avanoa i le tulaga tofi faa-tausī mavaega, e ao lava ona faatumu, pe afai ua leai se tausī mavaega o totoe o le mavaega tausī.

(7) E lē faalēaogāina se mavaega tausī pe afai e leai se tausī mavaega.

27. Faamavaega po o le aveesea o tausī mavaega-(1)

O se tausī mavaega, e ese ai i lo se tausī mavaega na o ia lava, e mafai ona faamavae mai le tofi, e ala i le faaooina atu o se faasilasilaga tusitusia o le faamavaega i na tausī mavaega o lo o latou galulue faatasi.

(2) I le noatia ma le fai fuafua i le faafuaiupu (3) ma le mavaega tausī, e aloaia se faamavaega:

(a) i le faaooina atu o le faasilasilaga; po o

(b) i so o se aso mulimuli ane po o i le tulai mai o so o se mea ua tupu mulimuli ane ua faamaotiina, i le faasilasilaga.

(3) E lē aloaia se faamavaega pe afai:

(a) na tuuina atu ina ia faafaigofie ai ona solia le tulaga faatuatuaina; po o

(b) o le a taunuu i le tulaga o le a leai se tausī mavaega po o o le a itiiti ifo i lo le aofaiga o manaomia e le fuaiupu 23.

(4) E mafai e le Faamasinoga, i ana lava fuafuaga po o i luga o se talosaga a le tagata e faatulagaina meatotino e faaliliuina atu, se tagata e puipuia, se tagata e faamalosia, se tausī mavaega o galulue faatasi, po o se tagata e faamanuiaina ai, ona aveesea se tausī mavaega pe afai:

(a) ua faia e le tausī mavaega se soliga o le tulaga faatuatuaina;

(b) le leai o se agaga galulue faatasi i le va o tausī mavaega o lo o soofaatasi i le galuega, ua afaina tele ai le puleaina o le mavaega tausī;

- (c) talu ai ona o le lē talafeagai, leai o se naunautai, po o le lē mafaia i se tulaga faifaipea e le tausī mavaega ona puleaina o le mavaega tausī, la lea ua faia ai e le Faamasinoga lana faaiuga e faapea o le aveesea o le tausī mavaega, e sili lea ona lelei mo le manuia o tagata e faamanuiaina ai; po o
- (d) sa tulai mai se suiga tele i tulaga aliae mai po o le aveesea ua talosagaina e tagata uma e faamanuiaina ai, ma ua manatu le Faamasinoga e faapea o le aveesea o le tausī mavaega o le a sili lea ona lelei mo le manuia o tagata uma e faamanuiaina ai ma e ogatasi ai ma le faamoemoe patino o le mavaega tausī, ma o se tausī mavaega e vaavaalua talafeagai po o se tausī mavaega e soloai ane i ai o lo o avanoa.

(5) A o talia se faaiuga mulimuli i se talosaga e aveesea ai se tausī mavaega, po o e suia ai o po o e faaopoopo i le aveesea o se tausī mavaega, e mafai e le Faamasinoga ona poloaiina o se faamama avega talafeagai i lalo o le fuaiupu 81.

28. O le tulaga o le tausī mavaega ua tuua le galuega-

(1) I le noatia ma le fai fuafua i le faafuaiupu (3), o se tausī mavaega e faamavae, po o ua aveesea, e tataua ona faagasolo i se tulaga mataalia ina ia faaoo atu meatotino tau mavaega tausī o lo o umia e le tausī mavaega i le tausī mavaega o la galulue faatasi, tausī mavaega o soloai ane po o se isi lava tagata ua agavaa i ai.

(2) Seia vagana ai o tumau pea i le tofi se tausī mavaega o galulue faatasi, po o ua poloaiina e le Faamasinoga i se isi faiga e ese ai, ma seia vagana ua faaoo atu meatotino tau mavaega tausī i se tausī mavaega o soloai ane i ai po o se isi lava tagata ua agavaa i ai, o se tausī mavaega, o ia lea ua faamavae po o ua aveesea, e i ai tiute o se tausī mavaega ma malosiaga talafeagai e puipuia ai meatotino.

(3) O se tausī mavaega ua faamavae po o ua aveesea e mafai ona manaomia ina ia tuuina atu i ai le faamalumaluga talafeagai mo noataga, e tusa lava pe o tulaga aliae mai i le lumanai o lo o i ai nei po o i se isi faiga e ese ai, a o lumanai ai le faaliliuina atu po o le toe faafoiina atu o meatotino tau mavaega tausī.

(4) O se tausī mavaega ua faamavae po o ua aveesea ma ua ia taussia le faafuaiupu (1) ua faasaoloto mai noataga i so o se tagata e faamanuiaina ai, tausī mavaega po o se tagata e i ai aia, i lalo o le mavaega tausī mo so o se gaoioiga po o se mea ua lē faia e faasino i le meatotino tau mavaega tausī poo tiute o le tausī mavaega i lona tulaga o le tausī mavaega, vagana ai noataga:

- (a) e faatulai mai i so o se soliga o le tulaga faatuatuaina lea sa avea ai le tausī mavaega ma vaega auai po o lea sa auai le tausī mavaega i le iloa o se mea faalilolilo; po o
- (b) mo tagi e toe faaola mai ai mai le tausī mavaega o meatotino tau mavaega tausī po o tupe maua o meatotino tau mavaega tausī o lo o umia e le tausī mavaega.

29. Tiute o tausī mavaega-(1) O tiute o tausī mavaega o:

- (a) mataupu ua faasinomia i totonu o faafuaiupu (2) ma le (3), e faalēaogāina ai aiaiga o se mavaega tausī Samoa; ma
- (b) mataupu ua faasinomia i totonu o faafuaiupu (4) e oo i le (9) ia e noatia i aiaiga o se mavaega tausī Samoa.

(2) O se tausī mavaega:

- (a) e mafai ona faia o se talosaga i le Faamasinoga mo faatonuga, manatu po o se fautuaga e uiga i le faiga lea e mafai ai e ia po o e tatau ai ona galue e fesootai ma so o se mataupu e uiga i le mavaega tausī ma e mafai e le Faamasinoga ona faia o sea poloaiga, pe afai e i ai, e pei ona ia manatu ua talafeagai ai; ma
- (b) i le noatia ma le fai fuafua i lenei Tulafono, e tatau ona tauaveina ma pulea le mavaega tausī e tusa ai ma ona aiaiga.

(3) O tiute e lē alofia ona faatino a se tausī mavaega, e aofia ai itu nei:

- (a) e tatau i se tausī mavaega ona tausīa faamatalaga tau tupe sao atoatoa ma faamaumauga o le tulaga tofi faa-tausī mavaega o se tausī mavaega;

(b) e ao i le tausī mavaega ona tausīa meatotino tau mavaega tausī e ese mai ana lava meatotino e patino ia te ia ma ia faailoagofie i se tulaga eseese, mai so o se isi lava meatotino ia o lo o avea ai o ia ma tausī mavaega;

(c) o se tausī mavaega o se mavaega tausī tau faamoemoega e tatau ona tausīsia o le fuaiupu 22(9) ma le (10).

(4) I le noatia ma le fai fuafua i le mavaega tausī, e tatau i se tausī mavaega:

(a) i le a lava le tulaga e talafeagai ai, ona faasaoina le tau aogā o le meatotino tau mavaega tausī; ma

(b) i le a lava le tulaga e talafeagai ai, ona faaleleia le tau aogā o le meatotino tau mavaega tausī.

(5) Ae vagana ai ua i ai faatasi ma le faamaoniga a le Faamasinoga, po o e pei ona faatagaina e lenei Tulafono, po o ua aiaia manino e aiaiga o le mavaega tausī, o se tausī mavaega e lē tatau ona:

(a) maua o ni tupe faasili i se faiga tuusao pe lē tuusao mai le tulaga tofi faa-tausī mavaega o le tausī mavaega;

(b) faia po o le faatagaina o so o se isi lava tagata ina ia maua o ni tupe faasili i se faiga tuusao pe leai foi mai le tulaga tofi faa-tausī mavaega o le tausī mavaega; po o

(c) i le faitalia lava a le tausī mavaega, ua faia ai o so o se feuiaiga faapisinisi ma tausī mavaega po o e faatatau i meatotino tau mavaega tausī ia e ono taunuu atu ai i se tupe faasili.

(6) I le noatia ma le fai fuafua i le mavaega tausī, afai e sili atu i le toatasi (1) le tausī mavaega, e tatau i tausī mavaega uma ona auai i le faatinoga o le mavaega tausī.

(7) I le noatia ma le fai fuafua i le faafuaiupu (8), afai e sili atu i le toatasi (1) tausī mavaega, o se malosiaga po o se pule faitalia ua tuuina atu i tausī mavaega e lē tatau ona faatinoina seia vagana ua tau fai malilie uma i ai tausī mavaega i lona faatinoga.

(8) E mafai e se mavaega tausī ona tuuina atu le malosiaga i tausī mavaega e galue ai e ala i se vaega toatele, peitai o se tausī mavaega o ia lea e faatuiese mai se faaiuga a le vaega toatele o tausī mavaega, e mafai ona manaomia le tetee a le tausī mavaega ina ia faamauina i se faiga tusitusia.

(9) I le noatia ma le fai fuafua i le mavaega tausī, afai e sili atu i le toatasi (1) tagata e faamanuiaina ai, po o le sili atu foi i lo le tasi (1) se faamoemoe, po o a itiiti mai e toatasi (1) le tagata e faamanuiaina ai ma a itiiti mai e tasi (1) le faamoemoe, e ao i le tausī mavaega ona lē faaituau ma e lē tatau ona ia faatinoina le mavaega tausī mo le manuia o le toatasi (1) i le tautiga o le isi.

30. Tiute ina ia faatino le vaaiga ma tulaga agavaa-(1)

I le noatia ma le fai fuafua i le faafuaiupu (2), pe afai o se tiute i lalo o lenei fuaiupu ma le fuaiupu 31 e oo atu i le 42, e faaaogā i se tausī mavaega, e ao lava i le tausī mavaega ona faatino lea vaaiga ma tulaga agavaa e pei ona talafeagai ai, i tulaga aliae mai, i le amanaia ai o itu taua nei:

- (a) i so o se tomā faapitoa po o le poto masani o le tausī mavaega po o ua ia taofi e faapea o ia te ia; ma
- (b) pe afai o le tausī mavaega ua galue e faapei o se tausī mavaega i le tulaga o se pisinisi po o se galuega, i so o se tomā faapitoa po o le poto masani lea e talafeagai ai ona mauaina e le tagata o lo o galue i le faagasologa o lea ituaiga pisinisi po o galuega.

(2) O le tiute tauave o lo o faasinomia i le faafuaiupu (1) e faaaogā i le tulaga lautele o lo o faamaoti mai i le Faamatalaga ma, aemaise lava i le parakalafa 4 o le Faamatalaga.

31. Malosiaga o le teufaafaigaluegaina-(1) I le noatia ma le fai fuafua i le faafuaiupu (5), e mafai e se tausī mavaega ona faia so o se ituaiga o meatotino e teufaafaigaluegaina lea e mafai e le tausī mavaega ona ia faia, pe afai ua matua agavaa le tausī mavaega i meatotino tau mavaega tausī.

(2) E le o faatagaina i le faafuaiupu (1) ona faia e se tausī mavaega ni meatotino e teufaafaigaluegaina i eleele e ese ai na i lo nogatupe o lo o faamauiina i luga o fanua.

(3) E teufaafaigaluega e se tagata i se nogatupe o lo o faamauiina i luga o se fanua, pe afai e i ai aia tatau a le tagata i lalo o so o se feagaiga lea e:

- (a) tuuina atu ai e le tasi (1) tagata i le isi tagata, tupe faaaitalafu; ma

(b) le noataga a le tagata e nonoina mai tupe e toe totogi ai, o lo o faamauina i luga o se fanua.

(4) I totonu o lenei fuaiupu:

“tupe faaaitalafu” e aofia ai so o se tinoitupe e nonoina mai po o isi fetuunaiga tau tupe;

“tinoitupe” e aofia ai tupe o so o se ituaiga.

(5) I le faatinoina ai o so o se malosiaga o meatotino e teufaafaigaluegaina, e tusa lava po o tulai mai i lalo o lenei fuaiupu po o se isi faiga e ese ai, e tatau i se tausī mavaega ona amanaia tulaga faataatitia o taiala faavae o le teufaafaigaluegaina o meatotino.

(6) E ao i se tausī mavaega, mai lea taimi i lea taimi, ona toe iloilo le teufaafaigaluegaina o meatotino o le mavaega tausī, ma toe iloilo pe o le amanaia ai o tulaga faataatitia o taiala faavae o le teufaafaigaluegaina o meatotino, o le a tatau loa ona fetuunai le teuina faafaigaluega o meatotino.

(7) I le noatia ma le fai fuafua i le faafuaiupu (9) a o lumanai ai le faatinoga o so o se malosiaga o le teufaafaigaluegaina, e tusa lava po o tulai mai i lalo o lenei fuaiupu po o i se isi faiga e ese ai, e ao i le tausī mavaega ona maua mai ma iloilo fautuaga talafeagai, i le amanaia ai o tulaga faataatitia o taiala faavae o le teufaafaigaluegaina o meatotino i le auala lea e tatau ona faatino ai malosiaga.

(8) I le noatia ma le fai fuafua i le faafuaiupu (9), i le toe iloiloga o le teufaafaigaluegaina o meatotino o le mavaega tausī, e ao i le tausī mavaega ona maua mai ma iloilo fautuaga talafeagai, i le amanaia ai o tulaga faataatitia o taiala faavae o le teufaafaigaluegaina o meatotino pe o le a tatau loa ona fetuunai le teufaafaigaluega o meatotino.

(9) E lē manaomia se tausī mavaega e na te mauaina mai fautuaga i lalo o le faafuaiupu (7) po o le (8) pe afai ua i ai le faaiuga a le mavaega tausī i luga o mafuaaga talafeagai e faapea, i tulaga uma ua aliae mai, e lē talafeagai po o e lē alagatatatau ona faia faapea.

(10) O le malosiaga lautele o le teufaafaigaluegaina o meatotino:

(a) e faaopoopo atu i malosiaga ua faaee atu i tausī mavaega i se isi faiga e ese ai na i lo lenei Tulafono; ae peitai

(b) e noatia i so o se tulaga faatapulaaina po o se tulaga e lē aofia ai ua faaee atu e le pepa faaletulafono o le mavaega tausī.

(11) E faaaogā le faafuaiupu (1) e faasino i mavaega tausi e tusa lava pe na faia a o lumanai ai po o le maea ai ona amata faamamaluina leni Tulafono.

32. Sui sooupu-(1) I le noatia ma le fai fuafua i isi aiaiga o leni fuaiupu, e mafai e tausi mavaega o se mavaega tausi ona faatagaina se tagata e faatino so o se galuega tauave po o, a latou galuega tauave e tuuina atu e ave a ai ma o latou sui sooupu.

(2) Mo se mavaega tausi, e ese ai na i lo se mavaega tausi faameaalofa, o galuega tauave a le tausi mavaega e mafai ona faamatuu atu e aofia ai so o se galuega tauave e ese ai na i lo:

- (a) se galuega tauave e faasino i le a lava le tulaga po o le a le auala e tatau ai ona tufatufaina so o se aseta o le mavaega tausi; po o
- (b) se malosiaga e filifili ai pe faapefea ona faia o so o se totogifuapauina po o isi tupe ua tatau ona totogi mai tupe o le mavaega tausi, e tatau ona faia i tupe maua po o tupe faavae; po o
- (c) se malosiaga e tofia ai se tagata e ave a o se tausi mavaega o le mavaega tausi; po o
- (d) se malosiaga e faaee atu e so o se isi lava tulafono po o le pepa faaletulafono o le mavaega tausi lea e faatagaina ai tausi mavaega e faamatuu atu so o se tasi o a latou galuega tauave po o, le tofia o se tagata e galue e ave a ma se sui filifilia po o se tagata e vaavaaia.

(3) Mo se mavaega tausi faameaalofa, o galuega tauave a tausi mavaega e mafai ona faamatuu atu o:

- (a) so o se galuega tauave e aofia ai le faatinoga o se faaiuga lea na faia e tausi mavaega;
- (b) so o se galuega tauave e faasino i le teufaafaigaluegaina o aseta i le noatia ma le fai fuafua i le mavaega tausi (e aofia ai, i le tulaga o se fanua o lo o umia e ave a o se fanua teufaafaigaluega, faafoeina o le fanua ma le faia po o le faatulagaga o se aia i le fanua);

(c) so o se galuega tauave e faasino i suegatupe mo le mavaega tausī e ese ai na i lo auala o tupe mama o se fefaatauaiga lea o se vaega taua o le faatinoga o le galuega fesoasoani faameaalofa o le mavaega tausī;

(d) so o se isi lava galuega tauave faatonuina.

(4) I totonu o le faafuaiupu (3)(c), o se fefaatauaiga ua o se vaega taua lea, o le faatinoga lea o se faamoemoe o galuega fesoasoani a se mavaega tausī faameaalofa pe afai e tusa lava po o lo o tauaveina i totonu o Samoa po o i se isi nofoaga, e faaaogāina tonu lava tupe mama i faamoemoe o le mavaega tausī ma a le o:

(a) le faatinoina o le fefaatauaiga i le faagasologa o le tauaveina tonu lava o se uluai faamoemoe o le mavaega tausī; po o

(b) o lo o tauaveina tonu le galuega e fesootai ai ma le fefaatauaiga e tagata e faamanuiaina ai i le mavaega tausī.

(5) I le noatia ma le fai fuafua i le faafuaiupu (6) ma le (7), o tagata ia e mafai ona faatagaina le tausī mavaega i lalo o lenei fuaiupu, e faatino galuega tauave e avea ai ma o latou sui sooupu, e aofia ai se toatasi (1) po o le sili atu o le latou faitau aofai.

(6) O tausī mavaega:

(a) e lē mafai ona latou faatagaina se toalua (2) po o le sili atu o tagata e faatinoina le galuega tauave lava lea seia vagana ai ua latou faatinoina le galuega tauave i se tulaga soofaatasi; ma

(b) e lē mafai i lalo o lenei fuaiupu ona faatagaina se tagata e faamanuiaina ai i se mavaega tausī na te faatino so o se galuega tauave e avea ai o se latou sui sooupu (e tusa lava pe o le tagata e faamanuiaina ai o se tasi foi o tausī mavaega); ma

(c) e mafai i lalo o lenei fuaiupu ona faatagaina se tagata e faatino galuega tauave e avea ai ma o latou sui sooupu, e ui lava ina faapea ua tofia foi le tagata e avea ma o latou sui filifilia po o le tagata e vaavaaia (e tusa lava po o lalo o le fuaiupu 33 po o so o se isi malosiaaga).

(7) I le noatia ma le fai fuafua i le faafuaiupu (8), o se tagata o ia lea ua faatagaina i lalo o lenei fuaiupu e faatino se galuega tauave e noatia i so o se tiute tauave faapitoa po o tapulaa ua faapipii atu i le galuega tauave (po o a lava tuutuuga a le lala sooupu).

(8) O se tagata o ia lea ua faatagaina i lalo o lenei fuaiupu e faatino se malosiaga lea e noatia i se manaoga e maua mai ai fautuaga, e lē noatia i se manaoga pe afai o le tagata o se ituaiga tagata o ia lea ua tatau ona mauaina o fautuaga mai tausī mavaega, e tausiona ai o lea manaoga.

(9) I le noatia ma le fai fuafua i isi aiaiga o lenei fuaiupu, e mafai e tausī mavaega ona faatagaina se tagata e faatino galuega tauave e avea ai ma o latou sui sooupu i luga o ia aiaiga, e uiga i totogi ma isi mataupu e pei ona mafai ona o latou fuafuaina.

(10) E lē mafai e tausī mavaega ona faatagaina se tagata e faatino galuega tauave e avea ai ma o latou sui sooupu i luga o so o se aiaiga ua taua i le faafuaiupu (11), seia vagana ai ua alagatau i luga o mafuaaga talafeagai mo i latou e faia ai faapea.

(11) O isi aiaiga ua faasinomia i le faafuaiupu (9) o:

- (a) se aiaiga ua faatagaina ai le sui sooupu e tofia ai se tagata e suitulaga;
- (b) se aiaiga e faatapulaa ai le noataga o le sui sooupu po o lona sui i tausī mavaega po o so o se tagata ua faamanuiaina ai;
- (c) se aiaiga e faatagaina ai le sui sooupu e faia ai o se gaoioiga i tulaga aliaē mai, ia e mafai ona tulai mai ai se aia feteenai.

(12) E lē tatau i tausī mavaega ona faataga se tagata e faatino so o se latou galuega tauave tau le faafoega o aseta e avea ai ma o latou sui sooupu, seia vagana ai e ala i se maliega o lo o i totonu po o ua molimauina i se faiga tusitusia.

(13) E lē mafai e tausī mavaega ona faatagaina se tagata e faatino so o se galuega tauave tau faafoega o aseta e avea ai ma o latou sui sooupu seia vagana ai:

- (a) ua maea ona latou saunia se faamatalaga tau faiga faavae; ma
- (b) o le maliega lea o le a faia i ai le gaoioiga a le sui sooupu e aofia ai se tuutuuga i le taunuuga e faapea, o le a ia faamautuina le tausiona o le

faamatalaga tau faiga faavae, po o, afai ua toe iloiloina le faamatalaga tau faiga faavae po o ua toe suia i lalo o le fuaiupu 35, o le faamatalaga tau faiga faavae ua toe iloiloina po o ua toe suia.

(14) E ao i tausī mavaega ona tuufaatasia so o se taiāla ua tuuina atu i le faamatalaga tau faiga faavae faatasi ai ma se manatu e faamautinoa ai e faapea, o le a faatino a latou galuega tauave tau faafoega o aseta mo le manuia o le mavaega tausī.

33. Sui filifilia ma tagata e vaavaaia-(1) I le noatia ma le fai fuafua i fuaiupu 32 e oo i le 39, e mafai e tausī mavaega o se mavaega tausī Samoa ona:

- (a) tofia e ala i se faiga tusitusia se tagata e galue e avea ma o latou sui filifilia mo meatotino uma po o se vaega o meatotino tau mavaega tausī e pei ona latou fuafuaina; ma
- (b) faia so o se laasaga talafeagai e faamaonia ai o ia aseta ua faaee atu i se tagata ua faapea ona tofiaina.

(2) O lenei fuaiupu e lē faaaogāina i so o se mavaega tausī e i ai se tausī mavaega o lo o vaaia po o, e faasino i so o se aseta ua faaee atu i le Tausī Mavaega.

(3) I le noatia ma le fai fuafua i le fuaiupu 30 ma le 31, e mafai e tausī mavaega o se mavaega tausī ona tofia se tagata e galue e avea ma se tagata e vaavaaia e faasino i meatotino uma tau mavaega tausī po o sona vaega e pei ona latou mafai ona fuafuaina.

(4) O le tofiaina o se tagata e vaavaaia i lalo o lenei fuaiupu e lē faaaogāina i so o se mavaega tausī o lo o i ai se tausī mavaega e vaavaaia po o, e faasino i so o se aseta ua faaee atu i le Tausī Mavaega.

(5) I le noatia ma le fai fuafua i le mavaega tausī, pe afai ua taofia e tausī mavaega po o ua teufaafaigaluega e ala i faamalumaluga e faamau ai aitalafu e totogi atu i le tagata e umia, e tatau ona latou tofia se tagata e galue e avea o se tagata e vaavaaia faamalumaluga e faamau ai aitalafu.

(6) E lē tatau ona tofia se tagata e avea o se sui filifilia po o se tagata e vaavaaia i lalo o lenei fuaiupu seia vagana ai ua faamalieina e le tagata se tasi o tuutuuga nei:

- (a) o lo o tauaveina e le tagata se pisinisi lea o lo o aofia ai po o, e aofia ai le galue e avea o se sui filifilia po o se tagata e vaavaaia; po o
- (b) le tagata o se faalapotopotoga ua tuufaatasia faaletulafono lea o lo o faafoeina e tausī mavaega.

(7) I le noatia ma le fai fuafua i le faafuaiupu (6), o le tagata lea e mafai e tausī mavaega ona tofia e avea o se sui filifilia po o se tagata e vaavaaia e aofia ai:

- (a) se toatasi (1) o le latou aofaiga, pe afai o lea toatasi (1) o se faalapotopotoga tau mavaega tausī; po o
- (b) le toalua (2) (pe sili atu) o le latou aofaiga pe afai o le a latou galulue e avea ma sui filifilia soofaatasi po o tagata e vaavaaia soofaatasi.

(8) E mafai e tausī mavaega i lalo o leni fuaiupu, ona tofia se tagata e galue e avea ma o latou:

- (a) sui filifilia e ui lava ina faapea o le tagata foi ua -
 - (i) tofia e galue e avea ma o latou tagata e vaavaaia; po o
 - (ii) ua faatagaina e faatino galuega tauave e avea ai ma o latou sui sooupu; po o
- (b) le tagata e vaavaaia e ui lava ina faapea o le tagata foi ua -
 - (i) tofia e galue e avea ma o latou sui filifilia; po o
 - (ii) ua faatagaina e faatino galuega tauave e avea ma a latou sui sooupu.

34. Tuutuuga o le tofiaina o sui filifilia ma tagata e vaavaaia-(1) I le noatia ma le fai fuafua i le faafuaiupu (2) ma le fuaiupu 40, e mafai e tausī mavaega i lalo o le fuaiupu 33 ona tofia se tagata e galue e avea ma sui filifilia po o se tagata e vaavaaia i luga o tuutuuga, e aofia ai tofogi ma isi mataupu e pei ona mafai ona fuafuaina e tausī mavaega.

(2) E lē mafai e tausī mavaega i lalo o le fuaiupu 33(1), (2), (3) ma le (8) ona tofia se tagata e galue e avea ma se sui filifilia po o se tagata e vaavaaia i luga o so o se tasi o tuutuuga ua taua i lalo, seia vagana ai ua talafeagai i luga o mafuaaga tatau mo i latou e faapea ai ona faia:

- (a) e faatagaina ai le sui filifilia po o le tagata e vaavaaia e tofia se tagata e suitulaga;
- (b) e faatapulaaina ai le noataga a le sui filifilia po o le tagata e vaavaaia po o lona sui i tausī mavaega po o, i so o se tasi o tagata e faamanuiaina ai;
- (c) e faatagaina ai le sui filifilia po o le tagata e vaavaaia e galue i tulaga aliae mai ia e mafai ona faatulai mai ai se aia feteenai.

35. Iloiloga o sui sooupu, sui filifilia ma tagata e vaavaaia ma noataga mo le tofiaina o i latou-(1) E faaaogāina le faafuaiupu (4) e oo atu i le (9) pe afai o tausī mavaega i lalo o le fuaiupu 32 po o le 33 ua:

- (a) faatagaina se tagata e faatino galuega tauave e avea ai ma o latou sui sooupu; po o
- (b) ua tofiaina se tagata e galue e avea o se sui filifilia po o se tagata e vaavaaia.

(2) I le noatia ma le fai fuafua i le faafuaiupu (3), e faaaogā foi le faafuaiupu (4) e oo atu i le (9) pe afai ua i ai i tausī mavaega, i lalo o so o se malosiaga ua faaee atu i ai latou e le pepa faaletulafono o le mavaega tausī po o e ala i so o se tulafono:

- (a) ua faatagaina ai se tagata e faatino galuega tauave e avea ma a latou sui sooupu; po o
- (b) le tofia o se tagata e galue e avea o se sui filifilia po o se tagata e vaavaaia.

(3) E lē faaaogāina le faafuaiupu (4) e oo atu i le (9) pe afai e lē ogatasi ma le pepa faaletulafono o le mavaega tausī po o so o se isi tulafono.

(4) A o faaauau ai pea le galulue ai o le sui sooupu, sui filifilia po o le tagata e vaavaaia mo le mavaega tausī, o tausī mavaega:

- (a) e ao ona faagasolo le iloiloga o faatulagaga lea o lo o galulue ai i lalo le sui sooupu, sui filifilia po o le tagata e vaavaaia ma le faiga e aloaia ai ia faatulagaga; ma
- (b) afai o tulaga aliae mai ua talafeagai ai ona faia faapea, e ao ona iloiloina pe o lo o i ai se manaoga e faatino ai so o se malosiaga e faalavelaveina ai lea o lo o ia i latou; ma

(c) afai ua manatu i latou o lo o i ai se manaoga e faatino ai sea malosiaga, e ao ona faia faapea.

(5) Afai ua faatagaina le sui sooupu e faatino galuega tauave tau le faafoega o aseta, o tiute tauave i lalo o le faafuaiupu (4) e aofia ai, i se tulaga faapitoa:

(a) se tiute tauave e iloilo ai pe o lo o i ai se manaoga e toe fetuunai ai po o e suia ai le faamatalaga tau faiga faavae ua faia mo faamoemoega o le fuaiupu 32(13); ma

(b) afai ua latou manatu e faapea o lo o i ai se manaoga e toe fetuunai ai pe suia le faamatalaga tau faiga faavae, o se tiute tauave le faia faapena; ma

(c) o se tiute tauave le fuafuaina pe o le faamatalaga tau faiga faavae (a o aloaia ai mo lea taimi) o lo o tausisia pea.

(6) E faaogāina le fuaiupu 32(13) i le toe fetuunaiga po o le suia o le faamatalaga tau faiga faavae i lalo o lenei fuaiupu e pei ona faaogāina i le faia o se faamatalaga tau faiga faavae i lalo o lea fuaiupu.

(7) I totonu o lenei fuaiupu, “o le malosiaga e faalavelaveina ai” e aofia ai:

(a) se malosiaga e tuuina atu ai faatonuga i le sui sooupu, sui filifilia po o le tagata e vaavaaia; ma

(b) se malosiaga e faalēaogāina ai le faatagaga po o le tofiga.

(8) E noatia se tausī mavaega mo so o se gaoioiga po o se faaletonu o le sui sooupu, le sui filifilia po o le tagata e vaavaaia, seia vagana ai ua lē mafai e le tausī mavaega ona tausisia le tiute tauave o le vaauga e talafeagai i le tausī mavaega:

(a) pe a sainia ni faatulagaga ia o lo o galue ai i lalo le tagata e avea o se sui sooupu, sui filifilia po o se tagata e vaavaaia; po o

(b) i le tauaveina ai o tiute tauave o le tausī mavaega i lalo o le faafuaiupu (4) e oo atu i le (7).

(9) Afai ua i ai le maliega a se tausī mavaega i se tuutuuga lea ua faatagaina ai le sui sooupu, sui filifilia po o le tagata e vaavaaia e tofia ai se tagata suitulaga, e lē noatia le tausī mavaega mo so o se gaoioiga po o se faaletonu o le

tagata suitulaga seia vagana ai ua lē mafai e le tausī mavaega ona usitaia le tiute tauave o le vaaiga e talafeagai ia te ia i lalo o le parakalafa 2 o le Faamatalaga:

- (a) pe a tuuina atu lana maliega i lea tuutuuga; po o
- (b) i le tauaveina ai o tiute tauave o le tausī mavaega i lalo o faafuaiupu (4) e oo atu i le (7) i le tulaga e faapea o ia tiute tauave e faasino i le faaaogāina o se tagata suitulaga.

36. Aafiaga o tausī mavaega ua sili atu o latou malosīaga i lo le tulaga e tatau ona i ai - O le lē mafai ai e tausī mavaega ona galulue i totonu o tapulaa o malosīaga ua faaee atu e fuaiupu 32 e oo atu i le 39:

- (a) i le faatagaina ai o se tagata e faatino se galuega tauave a se tausī mavaega e avea ai o se sui sooupu; po o
 - (b) i le tofia ai o se tagata e galue e avea o se sui filifilia po o se tagata e vaavaaia,
- o le a lē avea ma tulaga e lē aloaia ai le faatagaga po o le tofiga.

37. O tausī mavaega i o latou tulaga faapitoa-(1) I le noatia ma le fai fuafua i le faafuaiupu (2), e faaaogā le fuaiupu 32 e oo atu i le 39 i se mavaega tausī o lo o i ai se tausī mavaega i lona tulaga faapitoa e pei ona faaaogāina i isi mavaega tausī (ma faasinomaga i le fuaiupu 32 e oo atu i le 39 i tausī mavaega (seia vagana ai le fuaiupu 32(5), 32(6)(b) ma le 33(7)) e ao ona faitauina e tusa ai ma lea tulaga).

(2) E le o faaee atu e le fuaiupu 33(5) se tiute tauave i se tausī mavaega i lona tulaga faapitoa pe afai o lea tausī mavaega o se faalapotopotoga faa-tausī mavaega.

38. Tapulaa po o tulaga e lē aofia ai o malosīaga ua faaee atu e le fuaiupu 32 i le 36 ma le fuaiupu 40 i le 42 - O malosīaga ua faaee atu e le fuaiupu 32 e oo atu i le 36 ma le fuaiupu 40 i le 42 e:

- (a) faaopoopo atu i malosīaga ua faaee atu i tausī mavaega i se isi faiga e ese ai na i lo lenei Tulafono; ae peitai

- (b) e noatia ma fai fuafua i so o se tapulaa po o tulaga e le aofia ai ua faaee atu e le pepa aloaia faaletulafono o mavaega tausī po o so o se isi lava tulafono.

39. Mavaega tausī o i ai i le taimi nei - E faaaogāina le fuaiupu 32 e oo i le 42 i mavaega tausī tusa lava pe na faia a o lumanai ai po o le tuanai ai o lona faamamaluina.

40. Totogi ma tupe faaalu a tausī mavaega-(1) Ae vagana ai i le tulaga lautele (pe afai e i ai) lea ua faia ai ni aiaiga e lē ogatasi i le pepa aloaia faaletulafono o mavaega tausī, e faaaogāina le faafuaiupu (2) e oo atu i le (4) i se tausī mavaega pe afai:

- (a) o lo o i ai se aiaiga i le pepa aloaia faaletulafono o le mavaega tausī e agavaa ai le tausī mavaega e na te taliaina tupe totogi mai tupe o mavaega tausī e tusa ai o auunaga ua tuuina atu e ia i, po o, e avea ai ma sui o le mavaega tausī; ma

- (b) o le tausī mavaega o se faalapotopotoga faa-tausī mavaega po o lo o galue i se tulaga tau tomā faapitoa.

(2) O le tausī mavaega e ao ona faatatauina e agavaa i lalo o le pepa aloaia faaletulafono o mavaega tausī na te mauaina tupe totogi mo auunaga e tusa lava po o auunaga ia e mafai ona tuuina atu e se tausī mavaega e leai sona tomā faapitoa.

(3) E faaaogāina le faafuaiupu (1)(b) i se tausī mavaega o se mavaega tausī faameaalofa o ia lea e lē na o se faalapotopotoga faa-tausī mavaega:

- (a) pe afai o le tausī mavaega e le o se tausī mavaega i lona tulaga faapitoa; ma

- (b) i le tulaga lautele e faapea ua i ai le maliega a le vaega aupito toatele o isi tausī mavaega e faapea, e tatau ona faaaogāina i lea tausī mavaega.

(4) Mo lenē fuaiupu, e galue se tausī mavaega i se tulaga agavaa tau tomā faapitoa, pe afai e galue le tausī mavaega i le faagasologa o se galuega tau tomā faapitoa po o se pisinisi lea e aofia ai o po o e aofia ai le tuuina atu o auunaga e faasino i:

(a) le faafoega po o le puleaina o mavaega tausi i se tulaga lautele po o se ituaiga mavaega tausi faapitoa; po o

(b) so o se vaega faapitoa o le faafoega po o le puleaina o mavaega tausi i se tulaga lautele po o se ituaiga mavaega tausi faapitoa,

ma auaunaga e tuuina atu e le tausi mavaega i po o, e avea ai ma sui o le mavaega tausi e aofia ai i totonu o lea faamatalaga.

(5) Mo lenei fuaiupu, e galue se tagata e avea o se tausi mavaega e leai sona tomai faapitoa pe afai o le tausi mavaega:

(a) e le o se faalapotopotoga faa-tausi mavaega; ma

(b) e le o galue i se tulaga agavaa tau tomai faapitoa.

(6) I le noatia ma le fai fuafua i le faafuaiupu (9), e agavaa se tausi mavaega o se faalapotopotoga faa-tausi mavaega, e ese ai na i lo se tausi mavaega o se mavaega tausi faameaalofa, i totogi talafeagai mai tupe o mavaega tausi mo so o se auaunaga lea e tuuina atu e le faalapotopotoga faa-tausi mavaega i po o, e avea ai ma sui o le mavaega tausi.

(7) E agavaa se tausi mavaega o se mavaega tausi faameaalofa po o se tausi mavaega i lona tulaga faapitoa, o ia lea o lo o galue i se tulaga tau tomai faapitoa, e ese ai na i lo se faalapotopotoga tau mavaega tausi, e mauaina totogi talafeagai, mai tupe o mavaega tausi mo so o se auaunaga lea e tuuina atu e le tausi mavaega i, po i le avea ai ma sui o le mavaega tausi pe afai ua i ai le maliega tusitusia a isi tausi mavaega taitoatasi e faapea, ia totogiina le tausi mavaega mo auaunaga.

(8) E agavaa se tausi mavaega i totogi i lalo o lenei fuaiupu e tusa lava pe mafai ona tuuina atu auaunaga o lo o fesiligia e se tausi mavaega e leai sona tomai faapitoa.

(9) E lē agavaa se tausi mavaega i totogi i lalo o lenei fuaiupu pe afai ua maea ona faia so o se aiaiga e uiga i le agavaa o le tausi mavaega i totogi, i lalo o le pepa aloaia faaletulafono o mavaega tausi po o so o se isi lava tulafono.

(10) O lenei fuaiupu e faaaogā i se tausi mavaega ua faatagaina i lalo o le fuaiupu 32 e oo atu i le 39 po o le pepa aloaia faaletulafono o mavaega tausi:

(a) e faatino ai galuega tauave e avea ai o se sui sooupu o tausi mavaega; po o

(b) e galue e avea o se sui filifilia po o se tagata e vaavaaia,
e pei ona faaaogāina i so o se isi lava tausī mavaega.

(11) O se tausī mavaega:

(a) e agavaa ina ia toe faaolaina tupe mai tupe o le mavaega tausī; po o

(b) e mafai ona totogiina atu mai tupe o le mavaega tausī,

tupe faaalu talafeagai ua faatupulaia e le tausī mavaega a o galue e avea ai ma sui o le mavaega tausī.

41. Totogi ma tupe faaalu a sui sooupu, sui filifilia ma tagata e vaavaaia-(1) E faaaogā lenēi fuaiupu pe afai i lalo o le fuaiupu 32 e oo i le 39, o so o se isi lava tulafono po o le pepa aloaia faaletulafono o le mavaega tausī, o se tagata, e ese ai i lo se tausī mavaega:

(a) ua faatagaina e faatino galuega tauave e avea ai o se sui sooupu o tausī mavaega; po o

(b) na tofia e galue e avea ai o se sui filifilia po o se tagata e vaavaaia.

(2) E mafai e tausī mavaega ona totogi le sui sooupu, sui filifilia po o le tagata e vaavaaia, mai tupe o mavaega tausī mo auaunaga pe afai:

(a) o lo o galue o ia i luga o aiaiga e agavaa ai ina ia totogiina mo na auaunaga; ma

(b) o le aofaiga e lē sili atu i so o se totogi e pei ona talafeagai ai i tulaga aliae mai mo auaunaga ua tuuina atu i po o, e avea ai ma sui o lea mavaega tausī.

(3) E mafai e tausī mavaega ona toe faaola tupe i le sui sooupu, sui filifilia po o le tagata e vaavaaia, mai tupe o mavaega tausī mo so o se tupe faaalu ua talafeagai ona faatupulaia e ia i le faatinoga o galuega tauave e avea ai o se sui sooupu, sui filifilia po o le tagata e vaavaaia.

(4) O totogi ma tupe faaalu a sui sooupu, sui filifilia ma tagata e vaavaaia e faaaogā i auaunaga ua tuuina atu i, po o le avea ai ma sui o mavaega tausī i so o se taimi lava e faia ai ma tupe faaalu ua faatupulaia i luga o po o, le maea ai o le amata faamamaluina o mavaega tausī i so o se taimi lava e faia ai.

42. Inisiua-(1) E mafai e se tausī mavaega ona:

(a) inisiua so o se meatotino lea e noatia i le mavaega tausī e faasaga i tulaga lamatia o mea ua leiloa po o mea ua faatamaia ona o so o se mea e tupu mai, ma;

(b) totoi tupe faasaofaga mai tupe o mavaega tausī.

(2) Mo meatotino o lo o umia i luga o se mavaega tausī faaletulafono, o le malosiaga e inisiua ai, e noatia i so o se faatonuga e tuuina atu e le tagata ua faamanuiaina ai po o tagata taitoatasi uma e faamanuiaina ai:

(a) e faapea o so o se meatotino ua faamaoti mai i le faatonuga e lē inisiuaina; po o

(b) e faapea o so o se meatotino o lo o faamaoti mai i le faatonuga e lē inisiuaina seia vagana ai i luga o so o se tuutuuga faapitoa.

(3) E umia meatotino i luga o se mavaega tausī faaletulafono pe afai o lo o umia i luga o mavaega tausī mo:

(a) se tagata ua faamanuiaina ai o ia lea ua aulia le matua o tausaga ma ua i ai le mafai gafatia ma agavaa atoatoa i le meatotino, i le noatia ma le fai fuafua i le mavaega tausī; po o

(b) tagata ua faamanuiaina ai o i latou taitoatasi uma ua aulia le matua ma ua i ai le mafai gafatia ma, o i latou (i le tuufaatasia ai) ua agavaa atoatoa i le meatotino lea e noatia i le mavaega tausī.

(4) Afai ua tuuina atu se faatonuga i lalo o le faafuaiupu (2), o le malosiaga e inisiua ai, e tusa lava po o noatia i le faatonuga, ua muta ona avea ma se galuega tauave e mafai ona faamatuuina mo faamoemoega o le fuaiupu 32(1) e oo atu i le (4).

(5) I totonu o lenei fuaiupu, “tupe o mavaega tausī” o lona uiga o so o se tupe maua po o tupe faavae o le mavaega tausī.

43. Tusi po o faamatalaga faaletulafono o manaoga-

(1) E mafai e na o le tagata e faatulagaina meatotino e faaliliuina atu, se tagata ua faamanuiaina ai, e tusa lava pe mo ia lava po o le galue ai mo se vasega o tagata ia ua avea ai o ia ma sui auai, se tagata e puipuia mo i latou uma po o so o se tasi (1) po o le sili atu o tagata ua faamanuiaina ai, ona tuuina eseese atu i le tausī mavaega, se tusi o ona

manaoga po o, e mafai e le tausī mavaega ona saunia se tusi o manaoga o so o se tasi o i latou, i le amanaia ai o le faatinoga o so o se galuega tauave po o malosiaga ua faaee atu i ai i tausī mavaega e le mavaega tausī.

(2) Afai:

- (a) ua tuuina atu se tusi o manaoga i le tausī mavaega o se mavaega tausī; po o
- (b) ua tuuina atu se faamatalaga faaletulafono o manaoga i, po o ua saunia e le tausī mavaega o se mavaega tausī,

e mafai e le tausī mavaega ona amanaia lea tusi po o le faamatalaga faaletulafono i le faatinoina ai o so o se galuega tauave po o malosiaga ua faaee atu i ai i le tausī mavaega e le mavaega tausī, ae peitai e lē mafai ona tali atu i so o se auala mo lona lē mafaia po o le teena o le amanaia ai o lea tusi po o le faamatalaga faaletulafono.

(3) E lē faaeeina atu se tiute tauave faaletulafono po o noataga i luga o se tausī mavaega, i le na o le tuuina atu i le tausī mavaega o se tusi po o faamatalaga faaletulafono o manaoga po o le saunia e le tausī mavaega o se faamatalaga faaletulafono o manaoga.

44. E mafai e le tausī mavaega a se faalapotopotoga ona galue e ala i se faaiuga - E mafai e se tausī mavaega a se faalapotopotoga ona:

- (a) galue e tusa ai ma se mavaega tausī e ala i se faaiuga a le tausī mavaega a se faalapotopotoga po o lana komiti faatino o faatonu po o isi itutino tau pulega; po o
- (b) e ala i sea faaiuga ua tofia ai se tagata ofisa po o se tagata faigaluega, po o se komiti o tagata ofisa po o tagata faigaluega po o i latou uma, e galue e ave ma ona sui e faasino i le mavaega tausī.

VAEGA 6 MALOSIAGA FAAAGAAGA

45. Malosiaga faaagaaga i se tagata e faatulagaina meatotino e faaliliuina atu-(1) E lē aafia le aloaia o se mavaega tausī e ala i mataupu ua faatulaga atu i totonu o lenei fuaiupu seia vagana ai e faapea:

- (a) o le mavaega tausī e le o se mea tau faasese; po o
- (b) o lo o i ai sea tulaga o le sili atu o malosiaga faaagaaga i le tagata e faatulagaina meatotino e faaliliuina atu e faapea ai o le matafaioi a le tausī mavaega ma le uiga moni o le mavaega tausī e fetuutuunai.

(2) E mafai e le tagata e faatulagaina meatotino e faaliliuina atu ona faaagaaga mo ia lava i le taimi e faia ai le mavaega tausī, so o se aia tau faamanuiaga i po o aia tatau i luga o meatotino ia o le a avea ma meatotino tau mavaega tausī.

(3) I le noatia ma le fai fuafua i le faafuaiupu (1), e mafai e le tagata e faatulagaina meatotino e faaliliuina atu ona faaagaaga mo ia lava malosiaga uma po o so o se tasi o malosiaga nei:

- (a) e faalēaogāina ai, suia pe teuteuina le mavaega tausī po o malosiaga ua faatulai mai i se tulaga atoatoa po o i se vaega i lalo o le mavaega tausī;
- (b) ina ia alualu i luma, tofia po o le talosagaina o tupe maua po o tupe faavae o le meatotino tau mavaega tausī po o, le tuuina atu o faatonuga mo le faia o so o se tulaga alualu i luma, tofiga, tupe totogi po o talosaga;
- (c) ia galue e avea o, po o le tuuina atu o faatonuga e noatia ai e uiga i le tofiaina po o le aveesea o se faatonu po o se tagata ofisa o so o se faalapotopotoga o lo o umia atoa po o se vaega e le mavaega tausī;
- (d) ia tuuina atu faatonuga e noatia ai i le tausī mavaega e uiga i le faatauina mai, taofia, faatau atu, faafoega, faaune atu, ofoina atu po o le faia o tau o le meatotino tau tausī mavaega, po o le faatinoina o so o se malosiaga po o aia tatau e faatulai mai i sea meatotino;
- (e) e tofia pe aveeseina so o se tausī mavaega, tagata e faamalosia, tagata e puipuia po o le tagata ua faamanuiaina ai;
- (f) ia tofia pe aveeseina se pule po o se faufautua e teufaafaigaluegaina meatotino;
- (g) ia suia le tulafono talafeagai o le mavaega tausī;

(h) ia faatapulaa le faatinoga o so o se malosiaga po o se pule faitalia a se tausī mavaega e ala i le manaomia e faapea, e faatoa mafai ona faatino malosiaga po o pule faitalia i le i ai faatasi ma le maliega a le tagata e faatulagaina meatotino e faaliliuina atu po o se tasi lava tagata ua faamaoti mai i le mavaega tausī.

(4) I le noatia ma le fai fuafua i le faafuaiupu (1), pe afai o se malosiaga ua taua i le faafuaiupu (3), ua faaagaaga po o ua tuuina atu e le tagata e faatulagaina meatotino e faaliliuina atu, o se tausī mavaega, o ia lea o lo o faatinoina malosiaga e le o galue e solia ai le tulaga faatuatuaina, ma e le o noatia mo tulaga aliaie mai o le galue ai faapena.

46. Malosiaga faaagaaga e tuuina atu i se tagata e puipuia - O le tagata e puipuia e i ai malosiaga o le tagata e puipuia o lo o i lalo o le fuaiupu 21.

47. Faatonuga ua faatonuina-(1) O le malosiaga e tuuina atu ai faatonuga faatonuina e mafai ona tuuina i se tulaga faaagaaga i se mavaega tausī:

- (a) i le tagata e faatulagaina meatotino e faaliliuina atu i lalo o le fuaiupu 45(3); po o
- (b) i le tagata e puipuia; po o
- (c) i so o se tagata po o tagata (e aofia ai le tagata e faatulagaina meatotino e faaliliuina atu ma le tagata e puipuia) e tusa lava pe faatinoina na o ia, tau le tagata lava ia, soofaatasi e ala i se vaega aupito toatele o tagata po o, e ala i faasinomaga i se palota e fai ai le faaiuga po o, i tagata e tusa ai o le faasologa o le tulaga faamuamua.

(2) Afai ua aiaia i se mavaega tausī le tuuina atu o faatonuga faatonuina, o le tausī mavaega e le:

- (a) o i lalo o so o se tiute tauve e faaagaaga po o le faaleleia o le tau aogā o le meatotino o mavaega tausī; po o
- (b) i lalo o so o se tiute e faeseeseina ai le teufaafaigaluegaina o meatotino o se mavaega tausī pe afai ua aiaia i se isi faiga e ese ai e faatonuga faatonuina; po o

- (c) e noatia i so o se tupe gau o le tau aogā o meatotino o mavaega tausī e faatulai mai i se faiga tuusao pe leai foi, e aveā ai o se taunuuga o le tuuina atu o faatonuga faatonuina.

48. Faatulagaga o Mavaega Tausī Faapitoa Faava o Malo a Samoa - E faatoa faaaogāina le fuaiupu 49 e oo atu i le 62, pe afai ua aiaia manino i le mavaega tausī ma ua faaalā manino ai le mavaega tausī o se Faatulagaga o Mavaega Tausī Faapitoa Faava o Malo a Samoa (SISTA).

49. Faamatalaina o uiga o upu-(1) I totonu o lenēi Vaega, ae vagana ua manaomia e le mataupu se isi uiga e ese ai:

“tagata ua tofia e sailia faamatalaga”, mo se mavaega tausī, o lona uiga o se tagata o ia lea ua tofia i le mavaega tausī e faia o ni valaau faauilavea;

“pisinisi”, mo se kamupani, e aofia ai le umia o sea po o isi aseta ma gaoioiga e le o ni gaoioiga faapisinisi;

“tulaga lamatia faapisinisi”, mo se kamupani, e aofia ai:

(a) so o se tulaga lamatia o lo o i ai i so o se pisinisi a le kamupani, po o so o se kamupani e fesootai i ai, pe afai e faafoeina i le faiga lea na faafoe moni ai; po o

(b) so o se tulaga lamatia lea e ono tulai mai e faaopoopo atu i so o se pisinisi o fuafuaina a le kamupani.

“kamupani”, mo sea filifilia, o lona uiga o se kamupani Samoa lea ua tuuina atu ai sea filifilia;

“sea filifilia” o lona uiga o sea i se kamupani Samoa ia ua tuuina atu i ai se faatonuga aloaia i lalo o le fuaiupu 51(1) ma ua faamamaluina;

“tausī mavaega tofia” o lona uiga:

(a) o se faalapopotoga ua tuufaatasia faaletulafono o se mavaega tausī;

(b) o se kamupani tumaoti o mavaega tausī ua tuusaunoa mai le manaomia o se laisene e tauaveina ai o pisinisi e aveā ai o se kamupani tausī mavaega i lalo o le Tulafono.

“faamatuu atu”, mo sea ua filifilia, e aofia ai:

- (a) le faatinoina o malosiaga e palota ai e oo atu ai po o e mafai ona oo atu ai i le faamaapeina o le kamupani po o le faalēaogāina o sea po o so o se aia tatau ua faaopoopo atu i sea; ma
- (b) le faia o so o se aia faaletulafono po o aia tutusa lelei i sea.

“tagata e i ai aia”, mo se mavaega tausi, o lona uiga:

- (a) o se tagata ua faamanuiaina ai i le mavaega tausi;
- (b) se mataupu autu i se malosiaga e faaogā ai le pule faitalia i luga o so o se tupe faavae po o tupe maua o le mavaega tausi;
- (c) se matua po o se tagata e vaavaaia faaletulafono so o se tamaitiiti o lo o aafia i le parakalafa (a) po o le (b);
- (d) se tagata e faamalosia;
- (e) se tagata e puipuia, seia vagana ai ua aiaia e le mavaega tausi i se isi faiga e ese ai;
- (f) se tagata e sailia faamatalaga ua tofia;
- (g) pe afai o so o se faamoemoe o le mavaega tausi ua faapitoa lava i foai faameaalofa, o le Loia Sili; ma
- (h) so o se tagata e faamanuiaina ai po o so o se isi tagata ua faapea ona tofia i lalo o aiaiga o le mavaega tausi.

“valaau faauilavea” o lona uiga o se valaau a se tagata e i ai se aia i lalo o le fuaiupu 55(1);

“tagata e vaavaaia faaletulafono”, mo se tamaitiiti, o lona uiga o se tagata ua aloaia faaletulafono e avea ma tagata e vaavaaia i so o se puleaga lea e i ai se sootaga taua o le tamaitiiti;

“tulafono faafoe o le tofi o faatonu” o lona uiga o tulafono faafoe o i ai nei o lo o faasinomia i le fuaiupu 54;

“mavaega tausi”, mo sea filifilia o lona uiga o le mavaega tausi lea o lo o umia ai sea filifilia;

“faaputugatupe o mavaega tausi”, mo se mavaega tausi, o lona uiga o meatotino mo le taimi o i ai nei i le noatia ma le fai fuafua i le mavaega tausi.

(2) I totonu o lenei fuaiupu:

- (a) o se faasinomaga i malosiaga e palota ai mo sea, e aafia ai se faasinomaga i malosiaga e faatonu ai le palotaina o sea o lo o umia e se sui filifilia;

- (b) mo se mavaega tausī, o se faasinomaga i se tagata e puipuia e aofia ai se tagata po o se komiti e ana le maliega lea e manaomia mo le faatinoga o so o se malosiaga;
- (c) ua faatatauina se kamupani e fesootai ma se isi faalapotopotoga pe afai -
 - (i) e faapea o le isi lea faalapotopotoga o lo o umia, i se faiga tuusao po o e ala i se sui filifilia, sea i le isi lea faalapotopotoga; po o
 - (ii) o lo o faafoeina tuusao pe leai foi e le isi lea faalapotopotoga; po o
 - (iii) e fesootai ma se faalapotopotoga lea e fesootai patino ma le isi lea faalapotopotoga;
- (d) e faatagaina se mafuaaga mo faasea e aafia ai le faafoega o mataupu a se kamupani, pe afai ua faamaoti mai faapea i le pepa faaletulafono o le mavaega tausī, ma o le fuaitau “mafuaaga faatagaina mo faasea” e ao ona faatatauina i lena lava faasologa.

50. Faamoemoe autu o le fuaiupu 51 - O le faamoemoe autu o le fuaiupu 51, o le mafai lea e se mavaega tausī o sea a kamupani ona faavaeina i lalo o le tulaga e faapea:

- (a) e mafai ona taofia sea i se tulaga le mautinoa; ma
- (b) e mafai ona tauaveina le faafoega o le kamupani e ana faatonu, e aunoa ma so o se malosiaga e faauilavea ai o faatinoina e tausī mavaega.

51. O sea filifilia-(1) Afai e faamalieina e se mavaega tausī tuutuuga o lo o i le faafuaiupu (7), e mafai i le mavaega tausī ona faatonuina e faapea o lena fuaiupu e faaogā:

- (a) i sea uma ua tuufaatasia i le faaputugatupe o le mavaega tausī; po o
 - (b) i so o se sea ua tuufaatasia i le faaputugatupe o le mavaega tausī e pei ona mafai ona faamaoti mai i le faatonuga.
- (2) I totonu o le faafuaiupu (1), “o sea o lo o tuufaatasia i le faaputugatupe o mavaega tausī”, e aofia ai sea:

- (a) ua faapea ona tuufaatasia i so o se taimi i le maea ai ona faia le mavaega tausī, e tusa lava pe na faaopoopo atu i le faaputugatupe o le mavaega tausī e ala i se faiga faaopoopo e faaleleia ai ua faia e le tagata muamua na faatulagaina meatotino e faaliliuina atu po o so o se isi lava tagata;
 - (b) ua maua mai i luga o se mataupu fou e le kamupani po o, i le faagasologa o le faafoeina po o le puleaina o le faaputugatupe o le mavaega tausī; po o
 - (c) ua maua mai i so o se isi lava faiga.
- (3) O se faatonuga i lalo o le faafuaiupu (1):
- (a) e lē tatau ona faia mo sea ua faaopoopo atu i le faaputugatupe o le mavaega tausī e se tausī mavaega o se isi mavaega tausī i le faatinoina ai o se malosiaga i le isi lea mavaega tausī seia vagana ai ua faatagaina i se faiga manino i le malosiaga lenei tulaga po o le isi mavaega tausī o se mavaega tausī Samoa ma o le tausī mavaega o le isi mavaega tausī, po o se toatasi o tausī mavaega o le isi mavaega tausī ua avea o se tausī mavaega tofia; ma
 - (b) e mafai ona -
 - (i) faailogofie sea ia e faasino i ai le faatonuga a le o le tulaga maoti po o e ala i so o se faamatalaga faalauaitele;
 - (ii) faamaoti ai se aso po o se tulaga ua tupu mai i luga o le tulai mai o, po o tulaga aliae mai i totonu, lea o le a faia ai le faatonuga, po o le a faamutaina ai le i ai o tulaga faamamaluina.
- (4) O le tulaga ua tupu mai ua faasinomia i le faafuaiupu (3)(b)(ii), e mafai ona aofia ai le auaunaga e uiga i le tausī mavaega o le mavaega tausī, po o so o se tasi o tausī mavaega o le mavaega tausī, pe afai e sili atu i lo le tasi (1), se faatonuga tusitusia (“o se faatonuga e faaosofia ai”) ua faia e sea tagata po o se komiti e pei ona faamaoti mai i totonu o le mavaega tausī, i le tulaga e faapea o le faatonuga o i lalo o le faafuaiupu (1), ua vave faamamaluina po o ua vave faamutaina le faamamaluina, i le a lava le tulaga e mafai ai.

(5) O le tagata po o le komiti ua faasinomia i le faafuaiupu (4), e mafai ona lē aofia ai po o e aofia ai le tausī mavaega o le mavaega tausī, po o so o se tausī mavaega o le mavaega tausī pe afai e sili atu i lo le tasi (1).

(6) O aiaiga o le mavaega tausī o le a fuafuaina ai pe o se faaiuga e faia pe leai foi, po o le taofia mai le faia, o le faatonuga e faaosofia ai faaletulafono ma, i se mataupu pe afai o tuutuuga o le mavaega tausī e le o taua manino ai se isi faiga e ese ai, o le a tatau ona i ai se manatu taulagi e faapea ai, o le faaiuga e faaletulafono.

(7) O tuutuuga ua faasinomia i le faafuaiupu (1) e faapea:

- (a) o le mavaega tausī ua faia e po o i luga o se tautoga tusitusia po o *e ala i se pepa faaletulafono*;
- (b) a itiiti mai e toatasi (1) le tausī mavaega o le mavaega tausī e avea o se tausī mavaega tofia i le taimi lea e faamamaluina ai le faatonuga ua tuuina atu i lalo o le faafuaiupu (1);
- (c) o aiaiga o le mavaega tausī e manaomia ai le faapea, a itiiti mai e toatasi (1) lava le tausī mavaega o le mavaega tausī e avea o le tausī mavaega tofia mo le a lava le umi e faamamaluina ai le faatonuga o i lalo o le faafuaiupu (1); ma
- (d) e le o faia le mavaega tausī ona o le faatinoga o se malosiaga ua faaee atu e se isi mavaega tausī seia vagana ai ua manino le faatagaina o lenei tulaga i le malosiaga, po o, i le taimi na faatinoina ai le malosiaga, o le isi mavaega tausī o se mavaega tausī Samoa ma o le tausī mavaega o le isi mavaega tausī po o se toatasi (1) o tausī mavaega o le isi mavaega tausī, ua avea o se tausī mavaega tofia.

(8) I le noatia ma le fai fuafua i le faafuaiupu (9), pe afai o se tagata o ia lea e faatulagaina meatotino e faaliliuina atu a se mavaega tausī o sea filifilia ma ua faamatuu atu meatotino faaopoopo i le mavaega tausī e se isi tagata, e ao ona amanaia le tagata muamua mo faamoemoega o lenei fuaiupu e avea o le tagata e faatulagaina meatotino e faaliliuina atu mo le mavaega tausī o meatotino faaopoopo.

(9) Afai o aiaia i le pepa aloaia faaletulafono o mavaega tausī e faapea e lē faaaogāina le faafuaiupu (8), ona faapea lea mo se mavaega tausī o lo o aofia ai meatotino ia ua tuuina atu e tagata e sili atu i le toatasi (1), o lenei Tulafono e faaaogāina e faapei ai na faia e tagata taitoatasi, e aveā o se mavaega tausī e ese ai mo meatotino ia ua ia tuuina atu.

52. O tiute tauave o le tausī mavaega e faasino i sea filifilia-(1) I le noatia ma le fai fuafua i le fuaiupu 56, e ao ona umia sea filifilia e le tausī mavaega i luga o se mavaega tausī ina ia tausī ai sea filifilia.

(2) O le tiute tauave o le tausī mavaega e taofia ai sea filifilia e faamuamua i lo se isi lava tiute e aputiputi ai pe faaleleia ai le tau aogā o faaputugatupe o le mavaega tausī.

(3) E aunoa ma le aafia ai o le faafuaiupu (2), e lē tali atu le tausī mavaega mo tupe ua gau e faatulai mai i se faiga tuusao pe leai foi, mai le umia o sea filifilia, e aofia ai tupe gau e faatulai mai i so o se tulaga aliae mai e faapea:

(a) o le leai po o le utiuti o tupe maua mai so o se sea filifilia;

(b) o le faaitiitia ai o le tau aogā o so o se sea filifilia;

(c) o so o se gaioiga e faia po o ua lē faia e faatonu o le kamupani, e tusa lava pe sa faia po o sa faatinoina i le agaga lelei;

(d) le faamaapeina po o le faataapeina o le kamupani;

(e) o sea i fesuiaiga o tau faamaketi;

(f) o avanoa ua lē maua e maua ai tupe faasili mai le toe teufaafaigaluegaina o tupe, e maua mai lea i sea filifilia; po o

(g) o noataga ma tupe alu a le kamupani, e aofia ai totogi ma tupe faaalū a faatonu.

(4) I totonu o le faafuaiupu (3), “kamupani” e aofia ai se faalapotopotoga e fesootai i ai.

53. Tapulaa o malosiaga o le tausī mavaega-(1) I le noatia ma le fai fuafua i le mavaega tausī ma le fuaiupu 54 ma le 55, e faaaogā le faafuaiupu (2) ma le (3) i se tausī mavaega o sea filifilia.

(2) O le malosiaga e palota ai po o isi malosiaga mo sea filifilia e lē tatau ona faatinoina e le tausī mavaega ina ia faauilavea i le faafoega po o le puleaina o so o se pisinisi a le kamupani, ma aemaise lava, o le tausī mavaega:

- (a) e ao ona tuuina atu le faafoega o le pisinisi ma isi faaiuga uma e uiga i le totoigiina po o le lē totoigiina o tufatufaga i faatonu o le kamupani; ma
 - (b) e lē tatau ona manaomia le faaaliga manino po o le totoigiina o so o se tufatufaga e le kamupani po o, le faatinoga o so o se malosiaga e ono mafai ona i ai i le tausī mavaega o le faamalosiaga o so o se faaaliga manino po o tupe totoigi.
- (3) E lē tatau i se tausī mavaega o sea filifilia ona:
- (a) faamaite pe lagolagoina so o se gaioiga a le kamupani e faia faasaga i so o se tasi o ana faatonu mo le solia ai o tiute tauave i le kamupani;
 - (b) le tauanauina o le tofiaina po o le aveesea o so o se faatonu;
 - (c) i le noatia ma le fai fuafua i le fuaiupu 56, le faataapeina o le kamupani; ma
 - (d) i le noatia ma le fai fuafua i le faafuuiupu (1) ma le (2), le talosagaina o le Faamasinoga mo so o se ituaiga faamama avega po o fofo mo le kamupani.
- (4) O le a lē tatau ona faaogāina lenēi fuaiupu e faatapulaa ai pe faasaina ai le faatinoga e se tausī mavaega o ia aia tatau, malosiaga po o faamanuiaga faa-tausī mavaega i lalo:
- (a) o le Tulafono; po o
 - (b) so o se aiaiga o mataupu a le faalapotopotoga a se kamupani lea e mafai ai e i latou e umia sea o lea kamupani ona asiasia, faia ni ata o po o le aveina o faamatalaga ootoo mai faamatalaga tau tupe ma faamaumauga a le kamupani po o so o se kamupani e fesootai i ai.

54. Aiaiga e faasino i faatonu-(1) E mafai e le pepa aloaia faaletulafono o mavaega tausī ona:

- (a) aofia ai tulafono faafoe mo le fuafuaina o le faiga e mafai ai ona faatino e le tausī mavaega le malosiaga e palota ai ma isi malosiaga e faatatau i sea filifilia, e uiga i le kamupani e tusa ai o -

- (i) le tofiaina o faatonu;
 - (ii) le aveesea o faatonu;
 - (iii) totogi o faatonu; po o
 - (iv) so o se mataupu ua taua i le faafuaiupu (2); ma
- (b) tuuina atu aiaiga e teuteu ai tulafono faafoe.
- (2) O tulafono faafoe mo le tofi o faatonu e mafai ona:
- (a) manaomia ai le tausī mavaega e faamautinoa e faapea, o lo o umia po o lo o i ai pea i se tagata faapitoa se tofiga o se faatonu;
 - (b) manaomia ai so o se tagata ina ia tofiaina i le tofiga o le faatonu i se aso i le lumanai po o ina ua faamaonia i se mea e tulai mai i le lumanai;
 - (c) manaomia ai le aveesea o se faatonu i ni tulaga faapitoa e aliae mai;
 - (d) noatia i manaoga o tulafono faafoe a le kamupani ma so o se tulafono tusia e talafeagai i le kamupani, ia faatonuina le aofai aupito i maualalo ma le aofai aupito i maualuga o faatonu o lo o umia tofi i so o se taimi lava;
 - (e) manaomia ai le tausī mavaega mo le tofiaina ma le aveesea o faatonu, ina ia galulue faalauaitele po o, i so o se tulaga faapitoa e aliae mai, e uiga i le faaiuga a se isi tagata po o se komiti;
 - (f) e aiaia ai mo le faaeina atu o tiute faaletulafono i se tagata po o se komiti ua faasinomia i totonu o le parakalafa (e);
 - (g) le aiaia mo le faavaeina, faaauauina, ma taualumaga a se komiti ua faasinomia i le parakalafa (e); po o
 - (h) ua aiaia ai mo le totogi o le tagata po o le komiti ua faasinomia i le parakalafa (e), ina ia totogiina atu mai le faaputugatupe tau mavaega tausī a le mavaega tausī.
- (3) I le noatia ma le fai fuafua i le faafuaiupu (9) ma le fuaiupu 55, e ao i le tausī mavaega i taimi uma ona faaogā ona malosiaga e faia ai palota ma isi malosiaga e tusa ma le tulaga e ono mafai ona faatagaina ai ia malosiaga, e faamautinoa ai:

- (a) e faapea ia i ai i le kamupani a itiiti mai o le fuainumera mauualalo o faatonu ina ia faamalieina ai manaoga o ana tulafono faafoe ma le Tulafono o Kamupani 2001; ma
- (b) e faapea, seia vagana ai o se mataupu e tuusaunoaina, o le faailoagofieina o faatonu o le kamupani, ia tausisia ai o tulafono faafoe o tofiga o faatonu, pe afai e i ai, o lo o faaaogāina i le taimi nei.

(4) O se tagata o le a avea ma po o e tumau pea o se faatonu o le kamupani, e tusa lava po o tulaga aliaie mai o tulafono faafoe o le tofi o faatonu po o se isi faiga e ese ai, e lē mafai, i lona tulaga o se faatonu:

- (a) ona nofo aitalafu i noataga faaletulafono po o isi noataga i lalo o le mavaega tausi; po o
- (b) le i ai o so o se noataga faaletulafono po o isi noataga i le tausi mavaega,

ae peitai e leai se mea i lenei fuaiupu e aafia ai so o se tiute tauave lea e nofo aitalafu ai lea tagata, i le avea ai ma faatonu i le kamupani.

(5) O se tagata o ia lea o lona tofiga e mafai ona aiaia ai i tulafono fafoe o le tofi o faatonu e aofia ai:

- (a) se tagata e faatulagaina meatotino e faaliliu atu po o se tagata e puipuia le mavaega tausi; ma
- (b) ni tagata se toalua ua faamautinoaina ma e ono mafai ona faamautinoaina.

(6) E lē noatia se tausi mavaega mo le puipuia, faamaoniga po o le lē teena o le tofiaina o se faatonu pe afai o lea tofiga o lo o tausisia ai tulafono faafoe o le tofi o faatonu.

(7) Afai e le o i ai ni tulafono faafoe o le tofi o faatonu, ma i se mataupu tuusaunoaina, e lē noatia se tausi mavaega mo le puipuia, faamaoniga, po o le lē teena o le tofiaina o se faatonu na filifilia e le tausi mavaega, pe afai:

- (a) ua i ai le faaiuga a le tausi mavaega i lona agaga lelei e faapea o le tofiga ua fesiligia o lo o ogatasi ma manaoga o le tagata e faatulagaina meatotino e faaliliuina atu; ma
- (b) e le o uunaia le filifiliga i se manao o le tausi mavaega ina ia faaititia ai tulaga lamatia o pisinisi, seia vagana i le tulaga lautele, pe afai

i se aotelega ua faia le faaiuga a le tausī mavaega i le agaga lelei e faapea, o le faaitiitiga o le a ogatasi ma manaoga o le tagata e faatulagaina meatotino e faaliliuina atu.

(8) I le faafuaiupu (7), o se mataupu ua tuusaunoaina, o se mataupu lea o lo o faapea mai:

(a) o tulafono faafoe o le tofi faatonu e le o faia ai se aiaiga i lea mataupu; po o

(b) o tulafono faafoe o faia ai aiaiga, ae peitai ua faia le faaiuga a le tausī mavaega i le agaga lelei e faapea, o le a lē talafeagai, lē tusa ai ma le tulafono, lē mafai ona faatino, po o ua manino le lē ogatasi ma manaoga o le tagata e faatulagaina meatotino e faaliliuina atu, e faamautinoa ai le tausisia o tulafono faafoe i lea mataupu.

(9) I le noatia ma le fai fuafua i so o se aiaiga manino i le tulaga e ese ai i aiaiga o le mavaega tausī, e leai se tiute tauave a se tausī mavaega e:

(a) galue ai i lalo o le faafuaiupu (3) seia vagana ai ua ia taliaina se faasilasilaga moni e faapea, ua faatulai mai tulaga aliaie e manaomia ai lea gaoioiga; po o

(b) le susesueina o le i ai pea o tulaga aliaie mai ua manaomia ai le gaoioiga i lalo o le faafuaiupu (3).

(10) Afai, i luga o so o se mataupu e aafia ai le tofiaina po o le aveesea o se faatonu, e faia e se tausī mavaega se talosaga i le Faamasinoga i lalo o le fuaiupu 81, ma o le Faamasinoga i le tuuina atu ai o ana faatonuga, e ao ona ia lē sailia auala e faaititia ai tulaga lamatia tau psinisi, seia vagana ai i le tulaga lautele, pe afai e faapea ua faia le faaiuga a le Faamasinoga e faapea o le faaitiitiga o le a ogatasi ma manaoga o le tagata e faatulagaina meatotino e faaliliuina atu.

55. Faauilavea a se tausī mavaega i le faafoega o tulaga aliaie mai faatonuina-(1) Mo se mavaega tausī o sea filifilia, afai e i ai se faasea a se tagata e i ai sana aia e uiga i le faafoega o mataupu a le kamupani, ma ua faatagaina

mafuaaga mo lea faasea, e mafai e le tagata e ala i se faiga tusitusia ona talosagaina le tausī mavaega ina ia faauilavea i mataupu a le kamupani e tagofia ai le faasea.

(2) E mafai i se pepa aloaia faaletulafono o mavaega tausī ona faamaoti ai se tasi (1) po o le sili atu o mafuaaga mo faasea.

(3) Ina ua mauaina se valaau faauilavea, e ao i le tausī mavaega pe afai ua faamalieina e faapea ua faamautuina le faasea, ona faia ia gaoioiga pe afai e i ai, e pei ona manatu le tausī mavaega ua talafeagai ai e tagofia ai le faasea i aia i le mavaega tausī ma o ia gaoioiga e mafai ona aofia ai mea nei:

(a) o le faia po o le mauaina mai o suiga i le tulaga faa-faatonu o le kamupani i lalo o ana tulafono faafoe ma le Tulafono o Kamupani 2001, ae peitai i se isi faiga e ese ai i so o se aiaiga e pei ona manatu le tausī mavaega ua talafeagai ai, ae peitai i lona faia ai, mauaina mai po o le faamautuina o so o se suiga, e mafai e le tausī mavaega ona faalēaogāina le fuaiupu 54(3)(b) pe afai e tusa ai i le manatu o le tausī mavaega ia faanatinati le faia ai faapea mo faamoemoega o le tagofiaina o le faasea; po o

(b) le mauaina mai o gaoioiga e faia e le kamupani ina ia toe faaola mai so o se tupe gau ua mafua i le amioga ua aliae mai ai le faasea; po o

(c) le sailia o sea fautuaga e uiga i le faasea ma le faiga o le faailoaina atu e pei ona manatu le tausī mavaega ua talafeagai ai.

(4) I le iloiloaina ai ma le faia o gaoioiga i lalo o le faafuaiupu (3), e ao i le tausī mavaega ona:

(a) amanaia -

(i) so o se manaoga o le tagata e faatulagaina meatotino e faaliliuina atu; ma

(ii) le faatinoga aupito lelei o galuega a le kamupani; ma le

(b) lē amanaiaina o tulaga lamatia tau pisinisi, pe afai -

(i) o mafuaaga mo le faasea o lo o aofia ai po o ua tulai mai so o se tulaga ua lē malilie faatasi i ai faatonu e uiga i tulaga lamatia tau pisinisi; po o

(ii) so o se manaoga o le tagata e faatulagaina meatotino e faaliliuina atu e manaomia ai le iloiloina o tulaga lamatia tau pisinisi.

(5) I le maea ai o le gaoioiga i lalo o le faafuaiupu (3), po o i le maea ai ona faia le faaiuga ina ia aua nei faia se gaoioiga, ua muta le noataga o le tausī mavaega e faauilavea ai seia vagana ua toe faia se isi valaau e faauilavea ai.

(6) O se mafuaaga mo le teena o le faia o se gaoioiga i luga o se valaau e faauilavea ai pe afai, e ese mai i so o se isi lava mafuaaga mo le teena:

(a) ua faia le talosaga i luga o mafuaaga taua tutusa ia na faia muamua ai; ma

(b) ua foliga mai i le tausī mavaega e le o i ai se mafuaaga e suia ai pe faia ai se isi gaoioiga i le faaiuga na faia muamua.

(7) Afai ua faamaoti mai i le pepa aloaia faaletulafono o se mavaega tausī se mafuaaga se tasi (1) po o le sili atu foi ua faatagaina, mo se faasea, o aiaiga nei e faaaogā:

(a) e mafai e se tagata e i ai se aia ona manaomia le tausī mavaega e tuuina atu so o se faamatalaga e uiga i mataupu a le kamupani ma so o se kamupani e fesootai i ai, e pei ona manaomia i se tulaga talafeagai mo lena tagata; ina ia iloilo ai pe o se valaau faauilavea ua tatau ai, ma e ao i le tausī mavaega ona faaaogā taumafaiga uma talafeagai, e tuuina atu ai faamatalaga, ma e ono mafai, pe afai e talafeagai ai mo lena faamoemoe, ia maua se sui o so o se faatonu faatasi ai ma se sui e patino i le tausī mavaega;

(b) afai o lo o i ai se tagata e sailia faamatalaga ua tofia, e i ai se tiute tauave o lea tagata e -

(i) faia ai ni saililiga talafeagai e uiga i le i ai o ni mafuaaga faatagaina mo faasea i se tulaga faifaipea e pei ona

foliga mai ua talafeagai ai i tulaga aliae mai, ae lē itiiti i lo le faa-tasi i le 12 masina; ma

(ii) faia se talosaga e valaau faauilavea ai i lalo o leni fuaiupu, ma tuuina atu i le tausī mavaega faatasi ai ma faamatalaga molimau o mafuaaga talafeagai mo le faasea, i so o se taimi lava e tulai mai ai e talafeagai i le tagata e sailia faamatalaga;

(c) afai e le o i ai se tagata ua tofiaina, e ao i le tausī mavaega ona faaaogāina taumafaiga talafeagai uma ina ia faamautinoa ai e faapea, i taimi uma, a itiiti mai ua tuuina atu i se tagata e toatasi (1) e i ai le aia o lo o i se tulaga atoatoa lelei pepa aloaia nei ma faamatalaga e uiga i le mavaega tausī, ae peitai e aunoa ma le aafia ai o so o se aia tatau a le tagata e i ai le aia i pepa aloaia ma faamatalaga, e ese ai mai leni parakalafa -

(i) se ata o le pepa aloaia faaletulafono o le mavaega tausī ma isi pepa aloaia o mavaega tausī;

(ii) le igoa ma le tuatusi o le tausī mavaega;

(iii) le igoa, le ofisa faamauina ma le nofoaga autu o le pisinisi a le kamupani;

(iv) igoa ma tuatusi o faatonu uma o le kamupani; ma

(v) le uiga moni o gaoioiga o faia nei a le kamupani.

(8) Pe afai o lo o i ai se tagata e sailia faamatalaga ua tofia, o le a tatau i le tausī mavaega ona faaaoga taumafaiga talafeagai uma e faamautinoa ai e faapea, ua tuuina atu i taimi uma, i le tagata e sailia faamatalaga ua tofia, o pepa aloaia ma faamatalaga e faatatau i le mavaega tausī, lea ua tuuina atu i totonu o le faafuaiupu (7)(c)(i) e oo i le (v).

(9) Afai e mafai ona faatino, o se tagata o ia lea ua tuuina i ai faamatalaga i lalo o le faafuaiupu (7)(c), e ao ona avea ma tagata i le manatu talafeagai o le tausī mavaega, ua ia mauaina, po o e ono mauaina, e ala i le tofiga po o se isi faiga e ese ai, se aia tutusa taua i nisi po o sea filifilia uma

po o tupe e maua mai po o, le matua po o le tagata e vaavaaia faaletulafono sea tagata, po o o ia lea, o le tagata e faamalosia i le tulaga o se mavaega tausī tau faamoemoe.

(10) O tupe alu ua faatupulaia i le tagofiaina o se valaau faauilavea po o, le iloiloga o le faasea lea e faavae ai, e aofia ai totogi o tausī mavaega pe afai e alagata, ma tau e totogi o so o se fautuaga:

(a) e totogi mai tupe o le faaputugatupe o mavaega tausī ma ana tupe tupe maua i ni tufatufaga e pei ona faia i ai le faaiuga a le tausī mavaega; ma

(b) afai o lo o i ai se faaletonu i tupe ua faataapeina, e mafai e le tausī mavaega ona -

(i) faia ia laasaga e pei ona avanoa ai i le tausī mavaega i lalo o tulafono faafoe a le kamupani ma le Tulafono o Kamupani 2001, ina ia faatumuina tupe ua pau o vaevaega mai le kamupani; ma

(ii) afai ua manatu ua talafeagai ai mo lenei faamoemoe, ia maua mai se sui o so o se tasi o faatonu faatasi ai ma le sui e patino i le tausī mavaega.

(11) E ao i le tausī mavaega, pe afai e mafai ona faatino, ona faamautuina le aveesea mai le tofi o se faatonu:

(a) ua tofia mo le faamoemoe i lalo o le faafuaiupu (7)(a) po o le (10)(b)(ii), pe afai ua ausia le faamoemoe na tofia ai le faatonu; po o

(b) pe afai e talafeagai le aveeseina mo le faamoemoe o so o se gaoioiga ua faia ai le faaiuga e le tausī mavaega e tusa ai ma le faafuaiupu (3), po o le noatia i lea gaoioiga, mo le faamoemoe o le tausisia o tulafono faafoe o le tofi o faatonu.

(12) O aiaiga o le mavaega tausī e mafai ona aiaia ai le totogi o le tagata e sailia faamatalaga ua tofia, ina ia totogiina mai le faaputugatupe a le mavaega tausī.

56. Malosiaga e faamatuu atu ai sea filifilia-(1) I le noatia ma le fai fuafua i le faafuaiupu (2) ma i pepa aloaia faaletulafono o mavaega tausī, e mafai e le tausī mavaega, i totonu o le faafoega po o le puleaina o faaputugatupe

o mavaega tausī, ona faatau atu po o le faamatuū atu o sea filifilia i se isi faiga e ese ai, ae peitai o le i ai o lenei malosiaga:

- (a) e lē faia ai se tiute e faasino i ai i le faatinoina o malosiaga mo le faamoemoe o le puipuia po o le faaleleia o le tau aogā o le meatotino o le mavaega tausī po o le iloiloīna o lona faatinoga mo lea faamoemoe; ma
- (b) e lē noatia ai le tausī mavaega, mo tupe pau e tulai mai i tulaga aliae mai o le lē faatinoina o malosiaga o i le fuaiupu 55(3).

(2) I le noatia ma le fai fuafua i le fuaiupu 58, e lē tataū i le tausī mavaega, seia vagana ai ua tuuina atu i se isi faiga e ese ai pepa aloaia faaletulafono o mavaega tausī, ona faatau atu po o le faamatuū atu o sea filifilia i totonu o le faafoega po o le puleaina o faaputugatupe o mavaega tausī e aunoa ma:

- (a) le maliega a faatonu o le kamupani po o se vaega toatele o i latou pe afai e sili atu i lo le toatasi (1); ma
- (b) o ia maliega, pe afai e i ai, e faia i le tulaga manaomia e pepa aloaia faaletulafono o mavaega tausī.

(3) O le malosiaga e faatau atu ai po o le faamatuū atu ai o sea filifilia i lalo o le faafuaiupu (1) e tataū ona faia i so o se faiga, ma i luga o so o se tuutuuga ma aiaiga, e pei ona manatu le tausī mavaega o lo o galue i lona tulaga faaletulafono, ua talafeagai ai.

(4) E lē faaogāina le fuaiupu 81 i le mavaega tausī i le tulaga e faapea ua faatagaina e le fuaiupu le Faamasinoga, ina ia faaee atu i luga o le tausī mavaega o so o se malosiaga o le faatauina atu po o isi tulaga e faamatuū atu ai.

57. Faamamaluina-(1) Afai, mo se mavaega tausī o sea filifilia, o lo o i ai se soliga o tiute tauave po o noataga e se tausī mavaega, e mafai e se tagata, i le noatia ma le fai fuafua i le mavaega tausī ona talosaga i le Faamasinoga mo se faamama avega.

(2) Afai ua faamalieina le Faamasinoga e faapea o le talosaga o i lalo o le faafuaiupu (1) ua mautu ona mafuaaga, ua tataū ona tuuina atu i ai le faamama avega e ala i le:

- (a) faia o so o se poloaiga talafeagai, ina ia maua ai, i se tulaga e mafai ona latalata i ai, le faaiuga lea ua manatu i ai le Faamasinoga, po o e tatau ona i ai, ua mauaina mo le mavaega tausi, o le kamupani, o ona faatonu ma i le tulaga lautele pe afai e le i i ai se soliga ua faia; ma
- (b) o le faia o ia tulaga, pe afai e i ai, o se poloaiga faaopoopo po o se poloaiga e faia i tulaga aliae mai e pei ona manatu ai le Faamasinoga, i tulaga aliae mai o le mataupu, ua talafeagai lea ona manaomia i le amanaia ai o le uluai faamoemoe o le fuaiupu 51 ua faatulagaina i totonu o le fuaiupu 50,

ae peitai e leai se poloaiga e ao ona faia i lalo o lenei fuaiupu e aafia ai so o se aia i meatotino, lea ua maua mai e le tausi mavaega i le agaga lelei, mo tau aogā e aunoa ma ni faasilasilaga o mea moni ma fesoasoani ai i mavaega tausi, po o mai le kamupani i le agaga lelei ma mo le iloiloga atoatoa, po o e aafia ai so o se aia e faapogai mai i lea aia.

(3) I le faafuaiupu (1), “o le tagata” o lona uiga:

- (a) o se tagata e i ai se aia;
- (b) o se faatonu o le kamupani; po o
- (c) se tagata o ia lea, i lalo o tulafono faafoe talafeagai o le tofi o faatonu, e mafai ona avea ma faatonu pe afai ua tausisia e le tausi mavaega ona noataga i lalo o le fuaiupu 54.

(4) E aunoa ai ma le faatapulaaina o le faafuaiupu (1) e oo i le (3), ae peitai i le noatia ma le fai fuafua i le faafuaiupu (5), pe afai, mo se mavaega tausi, o lo o i ai se soliga o tiute tauave po o noataga ua faaee atu e lenei Tulafono i luga o ana tausi mavaega, o le soliga o le a faatino loa i taualumaga i le va o tagata e pei o se soliga o mavaega tausi, lea e aofia ai faamatalaga molimau i se soliga ua mautinoa.

(5) Afai ua faavaeina ni taualumaga i le va o tagata mo se soliga o se tiute tauave po o se noataga, e tatau i le Faamasinoga, i le tuuina atu o so o se vaifofo, ona amanaia so o se faamama avega ua tuuina atu po o e ona avanoa i ai mo le soliga e uiga i se talosaga i lalo o le faafuaiupu (1).

(6) I le noatia ma le fai fuafua i le mavaega tausī ma le fuaiupu 54 ma le 55, pe afai o sea filifilia o lo o tausīa i se tulaga faatuatuaina o le faatinoga po o le lē faatinoina e se faatonu o le kamupani e le o se maufaaga lea mo se tagata e saili ai i le Faamasinoga ni faauilavea e uiga i mataupu o mavaega tausī.

58. Malosiaga o le Faamasinoga e poloaia ai le faamatuu atu-(1) Afai ua aliali mai i le Faamasinoga e faapea o le taofiofia o sea filifilia ua le o toe talafeagai ma manaoga o le tagata e faatulagaina meatotino e faaliliuina atu, e mafai e le Faamasinoga i luga o le talosaga a so o se tagata e i ai aia, ona poloaia po o le faamaonia o so o se faatauina atu po o so o se faamatuu atu o sea filifilia, ma o se faatauina atu po o nisi faamatuuina atu ua faapea ona poloaia po o ua faatagaina, e lē manaomia ai so o se maliega ua tuuina atu i le fuaiupu 56(2).

(2) I le faia ai o se poloaiga po o se faatagaga i lalo o le faafuiaiupu (1), e mafai e le Faamasinoga ona faaee atu, pe afai e i ai, ni tuutuuga ma ni aiaiga, mo le faatauina atu po o nisi tulaga e faamatuu atu ai, e pei ona ia manatu ua talafeagai ai.

59. E lē agavaa tagata e faamanuiaina ai-(1) E ui lava i so o se tulafono faafoe o faiga tutusa po o aga masani a le Faamasinoga, ma ae vagana ai e pei ona aiaia i le faafuiaiupu (2):

(a) e tusa lava pe o se tagata ua faamanuiaina ai o ia lea, e i ai se aia atoatoa i so o se sea filifilia; po o

(b) o tagata uma ua faamanuiaina ai o i latou uma ia o tagata e i ai aia i so o se sea filifilia,

e tataua ona agavaa i ai, e ui lava i le i ai ma le mautinoaina ma le tulaga o le mafai atoatoa, e valaauina ai mo po o se faatonu ai se faaliliuina atu o ia sea po o le faamutaina po o le fetuutuunai o le mavaega tausī e faasino i sea, pe afai, ma, i le a lava le tulaga o i ai lea faamanuiaga, e aunoa ma le solia o so o se tulafono faafoe o le tulaga faaauau pea po o le tulaga mamao ese, e le o aofia ai i pepa aloaia faaletulafono o le mavaega tausī.

(2) O le lē aofia ai i faamanuiaga o i le faafuaiupu (1) e leai se aafiaga, po o e lē faaauau pea ona i ai se aafiaga, i le maea ai o le faamutaina o le 20 tausaga po o sea vaiitimi puupu e pei ona mafai ona faamaotiina i totonu o le mavaega tausī talu ona faavae mai le mavaega tausī.

(3) Afai o se tagata o ia lea e mauaina sea filifilia, po o se aia i sea filifilia, o ia foi lea o se tagata e ala i le tulaga aloaia o le lē aofia ai i faamanuiaga, e leai se aia tatau i le taimi nei e maua ai sea po o lea aia, o lea tagata e aunoa ma le aafia ai o le fuaiupu 58(1), e umia ia sea po o lea aia e uiga i mavaega tausī ina ia faaliliu atu sea po o lea aia i le tausī mavaega, ma e tatau i le Faamasinoga ona poloaia lea tagata ina ia faapea ona fai i luga o se talosaga e faia e le tausī mavaega po o so o se tagata ua faamatalaina i le fuaiupu 57(3).

(4) E lē faaogāina le fuaiupu 45 i le mavaega tausī a o faagasolo le vaiitimi e lē aofia ai i faamanuiaga.

60. O le taulegavaaina o le tausī mavaega i le avea ai ma faatonu - O se tausī mavaega o sea filifilia e taulegavaaina, mai le avea ai ma po o i le avea ai o se faatonu o le kamupani.

61. Faamautinoaina o manaoga o le tagata e faatulagaina meatotino e faaliliuina atu-(1) E faaogā leni fuaiupu pe afai e talafeagai i lalo o leni Tulafono mo le Faamasinoga po o se tausī mavaega ina ia faamautinoa ai manaoga o le tagata e faatulagaina meatotino e faaliliuina atu.

(2) Afai o soifua po o o lo o i ai nei le tagata e faatulagaina meatotino e faaliliuina atu, e tatau i le tagata e faatulagaina meatotino e faaliliuina atu, pe afai e talafeagai ai i se taimi vave lava e mafai ona faatino ai, ona faatalatalanoa e tusa ai ma manaoga o le tagata e faatulagaina meatotino e faaliliuina atu.

(3) Afai ua maluu po o e le o toe i ai nei le tagata e faatulagaina meatotino e faaliliuina atu po o ua lē talafeagai ai po o ua lē mafai ai ona faatino le faatalatalanoaga ma le tagata e faatulagaina meatotino e faaliliuina atu, o le a tatau loa ona avea manaoga o le tagata e faatulagaina meatotino e faaliliuina atu e faapea:

- (a) o manaoga ia sa fesootai atu ai talu ai le tagata e faatulagaina meatotino e faaliliuina atu i le tausī mavaega; po o
- (b) pe afai e leai ni manaoga sa fesootai mai, o manaoga e pei ona mafai ona talitōnuina e le Faamasinoga po o le tausī mavaega i le agaga lelei e ono tulai mai, e avea o manaoga o le tagata e faatulagaina meatotino e faaliliuina atu, mai faamatalaga molimau o avanoa.

62. Faatapulaaina o tiute tauave o se tausī mavaega-

(1) O se tausī mavaega o sea filifilia e leai se matafaioi faaletulafono po o se tiute tauave o le vaaiga o meatotino a, po o le faafoeina o ni mataupu a le kamupani, ae vagana ai pe afai e galue, po o ua manaomia e galue, i luga o se valaau faauilavea.

(2) E aunoa ma le faaituau i le tulaga lautele o le faafuaiupu (1), o se tausī mavaega o sea filifilia:

- (a) e lē manaomia ina ia faia so o se saililiga e tusa ai o so o se mea moni o i ai nei lea o le a tatau ai, po o e mafai ai, tusa lava pe o i ai po o le leai o so o se isi lava faamatalaga, ona avea ma faavae o se valaau faauilavea;
- (b) e lē noatia i le logoina o so o se tagata e aia i ai e uiga i so o se mea moni lea e ao ona nofo sauni i ai, po o lea ua masalomia, e faatatau i le meatotino a le kamupani po o le faafoega o ana mataupu; ma
- (c) e le o faatupulaia noataga e avea ai o sē e suesue i se soliga e se faatonu o tiute tauave e ala i se mafuaaga o so o se mea ua lē faia e uiga i le vaega a le tausī mavaega ina ia faia ai se gaoioiga pe afai ua nofo sauni i ai le tausī mavaega po o ua masalomia e faapea ua i ai po o le a i ai se soliga, po o e ala i mafuaaga i so o se gaoioiga po o se mea ua lē faia i le tausisia ai o le fuaiupu 54.

(3) E mafai i se mavaega tausī o sea filifilia, e ala i aiaiga o le mavaega tausī, ona lē aofia ai po o le fesuai ai so o se aiaiga o le faafuaiupu (1) ma le (2) e faasino i na sea.

(4) O se tulaga o le lē aofia ai po o se fesuiaiga ua faia i lalo o le faafuaiupu (3), o le a tatau ona faatoa faamamaluina pe afai o lo o faailoa manino ai e faapea ua faia lea tulaga e tusa ai o lenei fuaiupu.

63. Tuufaatasia o se mavaega tausi o i ai se faiga faapaaga faatapulaaina - Afai o se meatotino tau mavaega tausi a se mavaega tausi Samoa ua o se faamanuiaga i le aia a se paaga faatapulaaina i totonu o se faiga faapaaga faatapulaaina, tusa lava pe puleaina e le Tulafono po o se tulafono a se atunuu i fafo:

- (a) e le o se tiute tauave o le tausi mavaega -
 - (i) le tuueseeseina o aia; po o
 - (ii) le iloiloaina o le teufaafaigaluegaina po o galuega a le faiga faapaaga faatapulaaina; ma
- (b) o malosiaga o le tausi mavaega e usitaia malosiaga o paaga lautele a le faiga faapaaga faatapulaaina; ma
- (c) e lē noatia le tausi mavaega mo so o se tupe pau i se faiga tuusao pe lē tuusao foi ua faia i meatotino tau mavaega tausi e mafua mai i le puleaina ma le faafoega o le faiga faapaaga faatapulaaina e paaga lautele a lea faiga faapaaga faatapulaaina.

VAEGA 7

O ITUAIGA O MAVAEGA TAUSI FAAPITOA

64. Mavaega tausi e puipuia-(1) E mafai i se mavaega tausi ona faia ai se noataga e faamutaina ai le aia a lē e faamanuiaina ai.

(2) E aunoa ma le faatapulaaina o le faafuaiupu (1), e mafai e se mavaega tausi ona ave le aia a lē e faamanuiaina ai, i totonu o tupe maua po o tupe faavae o le meatotino tau mavaega tausi i le noatia ma le fai fuafua i:

- (a) se tapulaa e uiga i le faaliliuina atu po o le faamatuu atu; po o
- (b) se faaitiitiga po o le faamutaina i le tulaga ua gaumativa lē e faamanuiaina ai po o ua noatia so o se tasi o ana meatotino e totogi ai ni tagi mo le tulaga manuia o ana tagata o lo o nofo aitalafu ai.

(3) O se mavaega tausi lea e noatia ai i lalo le aia a sē e faamanuiaina ai i le faatapulaaina, faaitiitiga po o le faamutaina i lalo o le faafuaiupu (2), ua o se mavaega tausi lea ua puipuia.

(4) O se aiaiga o se mavaega tausi e manaomia ai le aia a sē e faamanuiaina ai i meatotino tau mavaega tausi ina ia umia i luga o se mavaega tausi ua puipuia, ua tatau ona faauigaina e avea o se manaoga e faapea o le aia a lē e faamanuiaina ai ua noatia i so o se tapulaa, faaitiitiga po o le faamutaina i lalo o le faafuaiupu (2).

65. Mavaega tausi faameaalofa-(1) O se mavaega tausi ua faatatauina e avea o se mavaega tausi mo faamoemoega faameaalofa i lalo o lenei Tulafono, pe afai ua faia le mavaega tausi mo se tasi (1) po o le sili atu o faamoemoega ua taua, ma pe afai o le faataunuaina o so o se faamoemoe e mo le manuia o nuu ma afioaga po o se vaega taua o nuu ma afioaga, i le amanaia ai o le ituaiga ma le uiga o le faamoemoe po o faamoemoega:

- (a) o le faamama avega po o le aveesea atoa o le ola mativa;
- (b) o le faagasologa i luma o aoaoga;
- (c) o le uunaia o galuega tau faatufugaga, faasaienisi ma tapuaiga;
- (d) o le puipuia o le siosiomaga;
- (e) o le faagasologa i luma o aia tatau faale-tagata ma le saolotoga faale-faavae; po o
- (f) so o se tasi lava faamoemoega lea e faamanuiaina ai nuu ma afioaga.

(2) E mafai ona faatatauina se faamoemoe e avea o se faamoemoe faameaalofa e tusa lava pe faatinoina i fafo atu o Samoa po o i se isi atunuu ma e tusa lava pe faamanuiaina ai nuu ma afioaga i totonu o Samoa po o se isi atunuu.

(3) Afai e le o faailoaina i se mavaega tausi faameaalofa se faamoemoe faapitoa faameaalofa po o lē e faamanuiaina ai po o se faiga lea e mafai ai ona filifilia se faamoemoe faapitoa po o lē e faamanuiaina ai, e mafai e le Faamasinoga ona filifilia se tasi (1) po o le sili atu o faamoemoega faameaalofa po o ē e faamanuiaina ai e tusa ai o le faamoemoe o le tagata e faatulagaina meatotino e faaliliuina atu, i le tulaga e mafai ona faamautinoaina.

(4) I le noatia ma le fai fuafua i le faafuaiupu (5) pe afai o se faamoemoe faapitoa faameaalofa ua lē tusa ai ma le tulafono, ua lē mafai ona faatino, ua lē mafai ona ausia, ua feteenai ma faiga faavae faalauaitetele i totonu o Samoa, po o ua lē toe faaaogāina i lea tulaga, e mafua i le suiga o mea e aliae mai, ua lē mafai ai ona ausia le faamoemoe o le mavaega tausī:

- (a) e lē faalēaogāina ai le mavaega tausī i lona tulaga atoa po o i sona vaega;
- (b) e lē fesuiaia ai le mavaega tausī i le tagata e faatulagaina meatotino e faaliliuina atu po o lē e soloai ane e aveva ma ona sui i tulaga o aia; ma
- (c) e mafai ona faaaogā e le Faamasinoga le *tulaga talafeagai e sili ona latalata i ai* ina ia fetuutuunai ai po o le faamutaina ai o le mavaega tausī e ala i le faatonuina e faapea o le meatotino tau mavaega tausī o le a faaaogā po o le faasoasoa, i lona tulaga atoa po o sona vaega, i se faiga e ogatasi ma le faamoemoe o le tagata e faatulagaina meatotino e faaliliuina atu.

(5) O se aiaiga o i totonu o se mavaega tausī faameaalofa lea o le a taunuu atu i le faasoasoa o meatotino tau mavaega tausī i le tagata e lē faamanuiaina ai i se mavaega tausī faameaalofa, e faatumauina pea ona i ai i luga o le malosiaga o le Faamasinoga i lalo o le faafuaiupu (4) ina ia faaaogā ai le *tulaga talafeagai e sili ona latalata i ai* e fetuutuunai ai po o e faamutaina ai le mavaega tausī pe afai e na o le meatotino tau mavaega tausī e faaliliu atu i le tagata e faatulagaina meatotino e faaliliuina atu o lo o soifua pea o ia, pe a oo ina faamamaluina le aiaiga.

(6) E mafai ona faamamaluina se mavaega tausī faameaalofa e le tagata e faatulagaina meatotino e faaliliuina atu o le mavaega tausī, pe afai o lo o soifua pea, tausīa pea se taualumaga e faamamaluina ai lea mavaega tausī po o le Faamasinoga.

66. Mavaega tausī mo faamoemoega-(1) I le noatia ma le fai fuafua i aiaiga o le fuaiupu 22 ma e ui lava i so o se tasi tulafono e ese ai, e mafai ona faia se mavaega tausī po o

le faavaeina e ala i se pepa faamaonia faaletulafono e umia i lalo o lenei Tulafono mo so o se tasi o faamoemoega faapitoa, tusa lava pe o se faiga faameaalofa po o e le o aiaia ai e faapea:

- (a) o le faamoemoega ua talafeagai ai ma ua mautinoa le lava atoatoa ina ia avanoa ai le mavaega tausī ina ia faatinoina; ma
- (b) o le faamoemoega e lē ese mai ai i faiga faavae faalauaitele i Samoa po o e ese mai ai i Tulafono.

(2) E aunoa ai ma le faatapulaaina o isi aiaiga o lenei fuaiupu ma ae vagana ai e faapea o faamoemoega ua tusa ai ma le tulafono ma e lē ese mai ai i faiga faavae faalauaitele, o sini autu o se mavaega tausī tau faamoemoega e mafai ona faapea:

- (a) o tagata o so o se aofaiga;
- (b) o faamoemoega o so o se aofaiga po o ituaiga; po o
- (c) se tagata po o ni tagata ma se faamoemoega po o ni faamoemoega.

(3) E ui lava i le faafuaiupu (6) pe afai o sini autu o se mavaega tausī mo faamoemoega ua aofia ai se tagata, ua agavaa loa le tagata e faamamaluina le mavaega tausī mo faamoemoega e pei ona amanaia ai le tagata ae le o se faamoemoega.

(4) So o se pepa aloaia faaletulafono ua faia po o e molimauiina ai se mavaega tausī mo faamoemoega e mafai ona:

- (a) faamaoti ai se mea na tupu po o le aso lea na faamutaina ai le aveā o le mavaega tausī, o se mavaega tausī mo faamoemoega;
- (b) aiaia ai mo le faamaapeina o le meatotino o le mavaega tausī pe a oo ina faamutaina le aveā o le mavaega tausī, o se mavaega tausī mo faamoemoega; ma
- (c) ae vagana ai e faapea mo le a lava le umi o se mavaega tausī mo faamoemoega, e lē tuuina atu e tausī mavaega so o se tiute tauave -
 - (i) i se tagata ua agavaa i le meatotino pe a oo ina faamutaina le aveā o le mavaega tausī o se mavaega tausī mo faamoemoega; po o

(ii) mo so o se faamoemoega lea o le a faaaogā i ai le meatotino.

(5) O tuutuuga o se mavaega tausī mo faamoemoega e lē mo se foai faameaalofa, e mafai ona aiaia ai mo le faaopoopoga, fetuunaiga po o le aveesea o se faamoemoega e lē mo se foai faameaalofa, o le mavaega tausī mo faamoemoega po o mo le vavaeeseina o se faamoemoega e le o se foai faameaalofa, mai sini autu o le mavaega tausī mo faamoemoega.

(6) E tatau ona i ai i se mavaega tausī mo faamoemoega se tagata e faamamaluina ma e faaaogā le fuaiupu 22 i mavaega tausī uma mo faamoemoega.

VAEGA 8 NOATAGA MA FAIGA E FOIA AI

67. Tausi Mavaega-(1) I le noatia ma le fai fuafua i lenei Tulafono ma le mavaega tausī, e noatia se tausī mavaega mo se soliga o le tulaga faatuatuaina ua faia e le tausī mavaega, po o i lea tulaga ua malie i ai le tausī mavaega.

(2) O se tausī mavaega o ia lea ua noatia mo se soliga o le tulaga faatuatuaina e noatia mo:

- (a) le tupe pau po o le faaititia o tau aogā o le meatotino mo mavaega tausī, e mafua mai le soliga; ma
- (b) le tupe mama, pe afai e i ai, lea e tatau ona tuufaatasia i le meatotino mo mavaega tausī pe afai e leai se soliga.

(3) Afai e lua (2) po o le sili atu soliga o le tulaga faatuatuaina, e lē tatau i se tausī mavaega ona tuuina atu se tupe faasili mai le soliga e tasi (1) o le tulaga faatuatuaina e faasaga i le tupe pau e mafua mai i le isi soliga o le tulaga faatuatuaina.

(4) E lē noatia se tausī mavaega mo se soliga ua faia o le tulaga faatuatuaina:

- (a) a o lumanai ai le tofiaina o le tausī mavaega, pe afai o le soliga o le tulaga faatuatuaina sa faia e se isi tagata;
- (b) e se tausī mavaega o vaavaalua ai seia vagana ai -

(i) ua iloa e le tausī mavaega po o ua tatau ona ia iloa le faia o le soliga po o le faamoemoe o lē o lo o la vaavaalua faa-tausī mavaega e faia se soliga o le tulaga faatuatuaina; ma

(ii) ua nanaina ma le loto i ai e le tausī mavaega le soliga po o le faamoemoe po o ua lē mafai i totonu o se taimi e talafeagai ai ona faia laasaga talafeagai e puipuia ai po o e maua mai ai le meatotino tau mavaega tausī po o le puipuia o le soliga.

(5) Afai e lua (2) po o le sili atu tausī mavaega e noatia mo se soliga o le tulaga faatuatuaina, ua noatia faatasi tausī mavaega ma noatia taitoatasi foi.

(6) O se tausī mavaega o ia lea ua iloa se soliga o le tulaga faatuatuaina i lalo o le faafuaiupu (4)(b) e tatau ona ia faia laasaga talafeagai uma ina ia foia ai le soliga.

68. Tapulaa i luga o noataga o le tausī mavaega - tulaga saoloto mai tuuaiga-(1) E leai se mea i totonu o se mavaega tausī Samoa e faamama avega ai, e saoloto ai, po o e faasaolotoina mai ai se tausī mavaega, mai noataga mo le soliga o le tulaga faatuatuaina e tulai mai i faiga tau faasese a le tausī mavaega, o amioga lē pulea ua faia ma le loto i ai po o tulaga faatamala.

(2) O se tuutuuga o se mavaega tausī e faamama avega ai i se tausī mavaega, e uiga i noataga mo le soliga o le tulaga faatuatuaina, e lē mafai ona faamalosia, i le tulaga e faapea:

(a) e faamama avega i le tausī mavaega e tusa o noataga mo le soliga o le tulaga faatuatuaina sa faia i se agaga e lē lelei po o tulaga faatamala o le lē faatauaina o faamoemoe o le mavaega tausī po o aia a ē e faamanuiaina ai; po o

(b) sa faaofiina i ai e avega o se taunuuga o le faaaogā sese e le tausī mavaega o se sootaga faaletulafono po o sootaga agatapua i le tagata e faatulagaina meatotino e faaliliuina atu.

(3) E mafai e le Faamasinoga ona faasaoloto se tausi mavaega i le tulaga atoatoa po o se vaega o noataga mo le soliga o le tulaga faatuatuaina, tusa lava pe sa faia a o lumanai ai po o i le tuanai ai o le faamamaluina o lenei Tulafono, pe afai e aliali mai i le Faamasinoga e faapea o le tausi mavaega:

(a) sa galue ma le faamaoni ma talafeagai ai; ma

(b) ua tatau ai i se faiga amiotonu ona tuusaunoa mai -

(i) i le soliga o le tulaga faatuatuaina; ma

(ii) mo le lē mafai ona mauaina mai o faatonuga a le Faamasinoga i totonu o le mataupu lea na aliae mai ai le soliga.

(4) Afai ua faia e se tausi mavaega se soliga o le tulaga faatuatuaina ma le uunaia po o le talosaga atu po o i le maliega a sē e faamanuiaina ai, e mafai e le Faamasinoga, tusa lava pe o lē e faamanuiaina ai e laitiiti pe leai foi, po o se tagata o i lalo o tulaga e le i agavaa ai faaletulafono, ona umia uma aia po o se vaega o aia a le tausi mavaega, e ala i faamalumaluga i le tausi mavaega po o se tagata e tapaina e ala i le tausi mavaega.

69. Maliega, faamatuu atu po o le faasilasilaga a tagata e faamanuiaina ai-(1) E mafai e le tagata e faamanuiaina ai, mo sona noataga mo le soliga o le tulaga faatuatuaina ua uma ona faia, ona faasaoloto mai se tausi mavaega, po o le puipuia mai o le tausi mavaega e faasaga i le noataga, pe afai o lē e faamanuiaina ai:

(a) e i ai tulaga faaletulafono;

(b) e i ai le malamalamaaga o faamatalaga moni faapitoa uma; ma

(c) e le i tauanauina i se tulaga lē talafeagai e le tausi mavaega ina ia tuuina atu le faamama avega pe o le faamalumaluga.

(2) I le noatia ma le fai fuafua i le fuaiupu 68(1), e lē noatia se tausi mavaega i sē e faamanuiaina ai mo le soliga o le tulaga faatuatuaina pe afai o lē e faamanuiaina ai:

(a) ua malie i ai i le faatinoga na faia ai le soliga;

(b) ua faamama avega ai i le tausi mavaega mai noataga mo le soliga i lalo o le faafuuiupu (1); po o

(c) ua toe faasao feuiaiga na faavae ai le soliga ae vagana ai -

(i) o le maliega, faamatuuina atu po o le faasilasilaga a le tagata e faamanuiaina ai sa faaosoosoina e ala i se amioga le talafeagai a le tausī mavaega; po o

(ii) i le taimi o le maliega, faamatuuina atu po o le faasilasilaga, e le i iloa ai e lē e faamanuiaina ai ana aia tatau po o faamatalaga moni faapitoa o le soliga.

70. Puipuiga o le soliga o le tulaga faatuatuaina - I le tulaga e puipuia ai se soliga o le tulaga faatuatuaina, e mafai e le Faamasinoga ona faia so o se tasi o poloaiga ua taua e faapea:

- (a) ia faamalosia le tausī mavaega e faatino tiute tauave o le tausī mavaega;
- (b) ia tofia le tausī mavaega mai le faia o se soliga o le tulaga faatuatuaina;
- (c) ia tofia se tagata faapitoa faaletulafono e vaavaaia meatotino tau mavaega tausī ma faafoe le mavaega tausī;
- (d) ia faamalolo lē tumau le tausī mavaega; po o
- (e) ia aveesea le tausī mavaega.

71. Faiga e foia ai mo le soliga o le tulaga faatuatuaina - I le tulaga e foia ai se soliga o tulaga faatuatuaina lea ua tupu mai, e mafai e le Faamasinoga ona faia so o se tasi o poloaiga ua taua e faapea:

- (a) ia faamalosia le tausī mavaega e faatino tiute tauave o le tausī mavaega;
- (b) ia faamalosia le tausī mavaega e toe faaleleia se soliga o tulaga faatuatuaina e ala i le tofogiina o tupe, o le toe maua mai o meatotino po o isi auala;
- (c) ia poloaia se tausī mavaega e tali mai e tusa ai ma le soliga o le tulaga faatuatuaina;
- (d) ia tofia se tagata faapitoa faaletulafono e vaavaia meatotino tau mavaega tausī ma faafoe le mavaega tausī;
- (e) ia faamalolo lē tumau le tausī mavaega;

- (f) ia aveesea le tausī mavaega;
- (g) ia faaitiitia po o le teena o se tausī tau tupe i le tausī mavaega;
- (h) i le noatia ma le fai fuafua i le fuaiupu 86, ina ia lē aloaia ai se galuega a le tausī mavaega, ua faaee atu ai se noataga faaletulafono po o se tulaga faatuatuaina lelei i luga o se meatotino tau mavaega tausī, po o se meatotino tau mavaega tausī ua faailoa atu, ua sese ona faamatuu atu ma le toe maua mai o le meatotino po o ana tupe faasili;
- (i) ia tuuina atu so o se isi lava faamama avega talafeagai.

72. Tausī tau tupe pe afai e le o solia tulaga faatuatuaina - Ae vagana ai ua aiaia manino i totonu o le mavaega tausī:

- (a) o se tausī mavaega e nafa ma le mavaega tausī mo so o se tupe mama ua maua e le tausī mavaega, e tulai mai i le faafoega o le mavaega tausī, e tusa lava pe afai e leai se soliga o tulaga faatuatuaina; ma
- (b) pe afai e leai se soliga o tulaga faatuatuaina, e lē noatia se tausī mavaega mo tupe pau po o le faaitiitiga i le tau aogā o meatotino tau mavaega tausī po o mo le lē maua ai o se tupe mama.

73. Tagata e puipuia - E ui lava i le fuaiupu 21(9), e faaaogā fuaiupu ua taua, i noataga o se tagata e puipuia:

- (a) e faaaogā le fuaiupu 68(1) ma le (2) i se tagata e puipuia e pei ona ia faia i se tausī mavaega;
- (b) e faaaogā le fuaiupu 68(3) e tuuina atu ai malosiaga i le Faamasinoga e faamama avega ai i se tagata e puipuia e pei ona ia mafai ona faamama avega ai i se tausī mavaega;
- (c) e faaaogā le fuaiupu 68(4) pe afai ua faia e le tagata e puipuia se soliga o so o se tiute faaletulafono lea e mafai ona tuuina atu e le tagata e puipuia i so o se tasi e faamanuiaina ai e pei ona ia faia i se tausī mavaega o ia lea ua faia le soliga o tulaga faatuatuaina;

- (d) e faaaogā le fuaiupu 69(1) ina ia faapea ona mafai ai e sē e faamanuiaina ai ona faamama avega ai i se tagata e puipuia mai le solia o so o se tasi o tiute tauave faaletulafono e pei ona faaaogāina lea itu e faamama avega ai i se tausī mavaega mai le solia o tulaga faatuatuaina;
- (e) e faaaogā le fuaiupu 69(2) i se tagata e puipuia o ia lea ua faia se soliga o so o se tasi o tiute tauave faaletulafono e pei ona latou faia i se tausī mavaega o ia lea ua faia se soliga o tulaga faatuatuaina.

74. Tagata e faamamaluina - E ui lava i le fuaiupu 22(4), e faaaogā le fuaiupu 73 i se tagata e faamamaluina e faapei ai o faasinomaga o i le fuaiupu 73 i se tagata e puipuia, o faasinomaga lava ia i se tagata e faamamaluina.

VAEGA 9 FETUUNAIGA, FAALĒAOGĀINA, TULAGA LĒ MAFAIA, FAAMUTAINA, FEAVEAIGA

75. Fetuunaiga ma le faalēaogāina-(1) E mafai i se mavaega tausī ona aiaia manino ai e faapea:

- (a) o ana aiaiga e ono mafai ona fetuunai; po o
- (b) o le mavaega tausī lava ia po o se malosiaga e ono faatinoina i lalo o le mavaega tausī e faalēaogāina a le o le tulaga atoatoa po o i se vaega.

(2) Afai ua aiaia ai i se mavaega tausī e faapea e mafai ona fetuunai, o le malosiaga e fetuunai ai e lē aafia ai le malosiaga o le Faamasinoga i lalo o lenei Tulafono e fetuunai ai le mavaega tausī.

(3) O le fetuunaiga po o le faalēaogāina o se mavaega tausī po o se malosiaga i lalo o le mavaega tausī, e lē aafia ai so o se mea ua faia e tusa ai ma le tulafono e se tausī mavaega mo le mavaega tausī a o lumanai ai le mauaina e le tausī mavaega o se faasilasilaga o le fetuunaiga po o le faalēaogāina.

(4) I le noatia ma le fai fuafua i le mavaega tausī, pe afai ua faalēaogāina se mavaega tausī, a le o le tulaga atoatoa po o i se vaega, e umia e le tausī mavaega le meatotino tau

mavaega tausī ua aafia e ala i le faalēaogāina mo le tagata e faatulagaina meatotino e faaliliuina atu i le tulaga atoatoa, po o pe afai e malīu le tagata e faatulagaina meatotino e faaliliuina atu, e mo le sui patino o le tagata e faatulagaina meatotino e faaliliuina atu po o le esetete.

(5) E mafai e le Faamasinoga ona fetuunai se mavaega tausī:

- (a) e tusa lava pe afai e lē faauigalua, ina ia tausisia ai le faamoemoe o le tagata e faatulagaina meatotino e faaliliuina atu pe afai o lo o aiaia ai e faamatalaga molimau manino ma talafeagai e faapea o faamoemoega uma o le tagata e faatulagaina meatotino e faaliliuina atu ma le mavaega tausī ua aafia e ala i se mea sese o faamatalaga tuuina atu po o le tulafono, tusa lava pe o fuaitau po o faiga tau faaosooso;
- (b) pe afai, ona o tulaga aliae mai e le i fuafuaina e le tagata e faatulagaina meatotino e faaliliuina atu, o suiga o le a faalautele ai le faamoemoe o le mavaega tausī; po o
- (c) pe afai o le faaauuina o le mavaega tausī i luga o na aiaiga o lo o i ai nei o le a lē mafai ona faatinoina po o e lē aogā po o e faalavelaveina ai le faafoega o le mavaega tausī.

(6) E mafai ona faia se talosaga i lalo o le faafuaiupu (5), e le tagata e faatulagaina meatotino e faaliliuina atu, o le tausī mavaega, o lē e faamanuiaina ai po o lē o vaavaaia po o se sui o lē e faamanuiaina ai, o ia o se tamaitiiti, lē mafai ona galue, e le o mautinoaina, e le i fanau mai, po o e se tagata e puipuia e avea ma sui o so o se tasi (1) po o le sili atu po o ē uma e faamanuiaina ai.

(7) I totonu o leni fuaiupu, “tagata e faatulagaina meatotino e faaliliuina atu”, o lona uiga o le tagata faapitoa o ia lea sa tuuina atu le meatotino lea ua fai ma mataupu autu o le faalēaogāina.

76. Lē mafaia po o le faalēaogāina o aia-(1) I le noatia ma le fai fuafua i se mavaega tausī Samoa ma i so o se poloaiga lava a le Faamasinoga, o le meatotino tau mavaega tausī po o le aia i lalo o le mavaega tausī Samoa e umia e le

tausi mavaega i le tulaga faatuatuaina mo le tagata moni e faatulagaina meatotino e faaliliuina atu po o, pe afai e maliu le tagata e faatulagaina meatotino e faaliliuina atu, mo le sui patino o le tagata e faatulagaina meatotino e faaliliuina atu po o le esetete pe afai:

- (a) o le aia ua fesiligia ua faalēaogāina;
- (b) ua faaee atu le meatotino tau mavaega tausi i se tagata i se isi faiga e ese ai i lo se faamanuiaga atoa a lea tagata, ae peitai o tulaga faatuatuaina ia e umia ai e lea tagata le meatotino e le o faaalii manino po o e fesootai atu ia te ia;
- (c) e leai sē e faamanuiaina ai ma e leai se tagata o ia lea e mafai ona avea o sē e faamanuiaina ai i lalo o le mavaega tausi; po o
- (d) ua faamutaina le mavaega tausi i se isi faiga e ese ai i lo le fuaiupu 77.

(2) E mafai ona faia se talosaga i le Faamasinoga i lalo o lenei fuaiupu e so o se tasi o tagata ua taua i le fuaiupu 75(6).

(3) I totonu o lenei fuaiupu “tagata e faatulagaina meatotino e faaliliuina atu” o lona uiga o le tagata faapitoa o ia lea ua tuuina atu le meatotino tau mavaega tausi po o le aia i lalo o le mavaega tausi ua faasino i ai i totonu o le faafuaiupu (1).

77. Faamutaina - E aunoa ma le aafia ai o malosiaga o le Faamasinoga i lalo o lenei Tulafono, o se mavaega tausi e faamutaina:

- (a) pe afai ua faalēaogāina po o ua faamutaina le mavaega tausi e tusa ai o ona aiaiga;
- (b) pe afai ua leai sē e faamanuiaina ai po o se tagata o ia lea e mafai ona avea o sē e faamanuiaina ai i lalo o le mavaega tausi po o pe afai e leai se faamoemoe o le tulaga faatuatuaina o totoe ina ia ausia;
- (c) pe afai o le faamoemoe o le mavaega tausi ua lē tusa ai ma le tulafono po o ua lē talafeagai ona ausia; po o
- (d) i le noatia ma le fai fuafua i le fuaiupu 59, e ui lava i le mavaega tausi, i luga o maliega a tagata uma e faamanuiaina ai o lo o i ai,

o i latou ia ua faamautinoaina ma e leai se isi o i latou e laitiiti po o se tagata e le i agavaa e tusa ai ma le tulafono.

78. Feaveaiga-(1) I le noatia ma le fai fuafua i lenei Tulafono, o se mavaega tausī ua faavaeina po o ua faia i lalo o tulafono a se atunuu i fafo, e mafai, pe afai ua faapea ona faatagaina e sea tulafono mai fafo, po o le mavaega tausī ma ona tulafono e talafeagai ai, ona faamamaluina ma aloaia i totonu o Samoa e faapei ai sa faia i lalo o lenei Tulafono.

(2) I le noatia ma le fai fuafua i lenei Tulafono ma le mavaega tausī ma ona tulafono e talafeagai ai, o mavaega tausī Samoa ua aloaia le faia ma aloaia i lalo o lenei Tulafono e mafai ona faaliliu atu i ma avea o se mavaega tausī i lalo o tulafono a se atunuu i fafo.

(3) O se mavaega tausī a Samoa lea sa faaliliuina atu muamua i Samoa i lalo o le faafuaiupu (1) e mafai ona faaliliuina atu i ma i lalo o lenei fuaiupu, o le a avea ai o se mavaega tausī ma i lalo o tulafono a se atunuu i fafo.

VAEGA 10 MAVAEGA TAUSI I ATUNUU I FAFO

79. Mavaega tausī i atunuu i fafo-(1) I le noatia ma le fai fuafua i le faafuaiupu (2), o se mavaega tausī i atunuu i fafo ua pulea e, ma e ao ona faamatalaina i lalo o ana tulafono talafeagai.

(2) E lē mafai ona faamamaluina i Samoa se mavaega tausī i atunuu i fafo pe afai:

- (a) ua faamoemoe le mavaega tausī e fai so o se mea e feteenai ma le Tulafono;
- (b) ua faaee atu po o ua tuuina atu e le mavaega tausī so o se aia tatau ma faia le faatinoga po o le faamatuu atu o tulaga ia e ese mai ai i Tulafono;
- (c) ua faaalia manino e le Faamasinoga e faapea e lē tusa ma aga faa-tagata soifua po o e feteenai ma faiga faavae faalauaitete a Samoa.

VAEGA 11
FAAMATALAGA TAU MAVAEGA TAUSI

80. Tulaga agatapuia ma le tuuina atu o faamatalaga-

(1) I le noatia ma le fai fuafua i isi aiaiga o lenei fuaiupu, o le tausī mavaega o se mavaega tausī Samoa:

- (a) e tatau ona tausīa uma pepa aloaia ma so o se ituaiga faamatalaga e faatatau i le mavaega tausī i se tulaga agatapuia; ma
- (b) e lē tatau, seia vagana ai ua faatagaina e lenei fuaiupu, ona manaomia le tuuina atu po o le faailoa atu i so o se tagata o so o se pepa aloaia po o se faamatalaga e faatatau i lea mavaega tausī.

(2) E tatau i se tausī mavaega, pe a maua o se talosaga, ona tuuina atu faamatalaga sao, e uiga i le tulaga ma le aofaiga o meatotino tau mavaega tausī ma le faafoega o le mavaega tausī:

- (a) i le Faamasinoga;
- (b) i le tagata e faatulagaina meatotino e faaliliuina atu, o le tagata e faamamaluina po o le tagata e puipuia le mavaega tausī, seia vagana ai ua i ai i le tausī mavaega le mafuaaga e talitonuina ai e faapea o sea tagata ua faia se talosaga i lalo o se tulaga fai faamalosi; po o
- (c) pe afai ua faatagaina i lalo o le mavaega tausī -
 - (i) i so o se tasi o ē faamanuiaina ai e i ai se aia ua faaee atu i ai i totonu o le mavaega tausī; po o
 - (ii) i so o se tagata e faamanuiaina ai ua faamaoti mai i lalo o le mavaega tausī e ave ma tagata e taliaina faamatalaga mo ē e faamanuiaina ai; po o
 - (iii) i se foai faameaalofa e faatatau i le igoa o i totonu o le pepa faamaonia o mavaega tausī e pei o sē e faamanuiaina ai i lalo o le mavaega tausī.

(3) I le noatia ma le fai fuafua i le faafuaiupu (2), o se tausī mavaega po o se isi tagata e lē manaomia e faailoa atu i se isi tagata e lē agavaa i ai faaletulafono i lalo o le faafuaiupu (2) so o se pepa aloaia po o se faamatalaga lea e faailoa atu ai:

- (a) ona manatu pe faapefea ona ia faatino po o sa faatinoina ana galuega tauave ma malosiaga e pei o se tausī mavaega;
- (b) o mafuaaga mo so o se faaiuga ua faia i le faatinoga o ia galuega tauave ma malosiaga;
- (c) so o se faamatalaga auiliili ia e faavae ai po o e mafai ona faavae ai le faaiuga;
- (d) so o se vaega o le faamatalaga tau tupe a le mavaega tausī; po o
- (e) so o se tusi o manaoga ua tuuina atu e le tagata e faatulagaina meatotino e faaliliuina atu, po o so o se tasi o ē e faamanuiaina ai, po o so o se isi lava tagata.

(4) I le noatia ma le fai fuafua i le faafuaiupu (5) ma e ui lava i le mavaega tausī, e mafai e le Faamasinoga, i luga o se talosaga a se tagata:

- (a) ona faaaliga manino e faapea, i totonu o tulaga aliae mai faapitoa o le mavaega tausī, e le o tuuina atu ai i ona tuutuuga i le tausī mavaega le tulaga e lava atoatoa po o e talafeagai ai i ē e faamanuiaina ai po o so o se tasi o i latou; ma
- (b) e tusa ai o le faaaliga manino, e faalatele ai pe faatapulaaina ai le aia tatau a so o se tasi po o i latou uma e faamanuiaina ai i faamatalaga e faasino i le mavaega tausī; po o
- (c) le faia o so o se isi lava poloaiga e pei ona ia manatu ua talafeagai ai.

(5) O se tagata e pei ona faamaninoina i lalo o le faafuaiupu (6) e tatau ona faaaliga i le Faamasinoga e faapea o faamatalaga ua faaaogāina ua talafeagai lea po o i se tulaga faavavevave:

- (a) mo le faamatuuina atu i se tulaga talafeagai o so o se mataupu i luma o le Faamasinoga;
- (b) mo le puipuia o le aia a so o sē e faamanuiaina ai; po o
- (c) mo le faafoega lelei po o le faamamaluina o le mavaega tausī.

(6) I totonu o le faafuaiupu (3) “o le tagata”, mo se talosaga, o lona uiga o se tausī mavaega, tagata e puipuia, lē e faamamaluina po o so o se tasi o ē e faamanuiaina ai o le mavaega tausī po o tagata o galulue faaletulafono e avea ai ma sui ma i luga o lona lava igoa.

VAEGA 12
MALOSIAGA O LE FAAMASINOGA

81. Talosaga i ma malosiaga o le Faamasinoga-(1) E mafai e se tausī mavaega ona talosaga i le Faamasinoga mo so o se faatonuga, manatu faaalua, fautuaga po o so o se tasi lava poloaiga e pei ona faia e le Faamasinoga, e faatatau i le faiga lea e mafai ai e le tausī mavaega po o e mafai ai ona faatino i le tulaga fesootai ma isi lava mataupu e faatatau i le mavaega tausī.

(2) E mafai e le Faamasinoga:

(a) ona faia se poloaiga e faatatau -

(i) faia o se poloaiga e uiga i le faatinoga po o i le faafoega o so o se mavaega tausī;

(ii) i le tausī mavaega o so o se mavaega tausī, e aofia ai se poloaiga e faasino i le faatinoga o so o se galuega tauave, malosiaga, pule faitalia po o le tiute tauave o le tausī mavaega, le tofiaina po o le aveesea o se tausī mavaega mo so o se mafuaaga, o le totogiina o le tausī mavaega, o le amio a le tausī mavaega, o le tausia ma le tuuina atu o faamatalaga tau tupe talafeagai, ma tupe totogi, tusa lava pe totogi atu i le Faamasinoga po o i se isi faiga e ese ai;

(iii) so o se meatotino tau mavaega tausī, e aofia ai le faia o so o se poloaiga e pei ona faaee atu, faaagaaga, faaaogāina, faasoasoina atu, ua taofia po o le toe faaolaina mai o le meatotino tau mavaega tausī;

(iv) o sē e faamanuiaina ai po o so o se tagata e i ai se fesootaiga ma le mavaega tausī e pei ona fuafuaina e le Faamasinoga; po o

(v) sē e faamamaluina se faamoemoe tau mavaega tausī, e aofia ai se poloaiga, e tusa ai o le faatinoga o galuega tauave ma malosiaga o le tagata e faamamaluina, o le aveesea o se tagata e faamamaluina

mo so o se mafuaaga, ma o le tofiaina, o totogi tau tupe po o amioga a le tagata e faamamaluina;

- (b) faia se faaaliga manino e tusa ai o le tulaga aloaia po o le faamamaluina o se mavaega tausi; po o
- (c) le soloia po o le fetuunai o so o se poloaiga po o se faaaliga manino ua faia i lalo o lenei Tulafono, po o le faia o so o se poloaiga fou po o se isi poloaiga po o se faaaliga manino.

82. Totogiina o tau - O tau ma tupe faaalu o ma tulaga faafuaseia i se talosaga i le Faamasinoga i lalo o lenei Tulafono, e ao ona totogi atu mai meatotino o le mavaega tausi po o le tauaveina ma totogi i so o se isi lava faiga po o e so o se isi lava tagata e pei ona poloaia e le Faamasinoga.

83. Uiga moni o aia a se tausi mavaega - Ae vagana ai o le tausi mavaega o se mavaega tausi o ia foi o se tagata e faamanuiaina ai o le mavaega tausi mo le aia a le tausi mavaega e avea ai o se tagata e faamanuiaina ai:

- (a) o le aia a se tausi mavaega i le meatotino tau mavaega tausi e faatapulaaina i lea tulaga e pei ona talafeagai ai mo le faatinoga lelei o le mavaega tausi; ma
- (b) o le meatotino tau mavaega tausi e le o avea ma vaega o le esetete a le tausi mavaega.

84. Tulimataia o meatotino o se mavaega tausi - E aunoa ai ma tulaga faaituau i noataga patino a se tausi mavaega, e mafai i meatotino tau mavaega tausi, ia ua faaee atu po o ua tagofia i le solia ai o tulaga faatuatuaina, po o le meatotino lea ua faaliliuina atu, ona tulimataia ma ia toe maua mai, seia vagana ai:

- (a) ua lē mafai ona toe faailoagofieina; po o
- (b) ua i aao o -
 - (i) lē ua faatauina atu *i le agaga lelei* mo tau aogā e aunoa ma se faasilasilaga o le solia o tulaga faatuatuaina; po o

(ii) se tagata (e ese ai na i lo se tausī mavaega) na maua mai ai le aia tatau e umia ai e ala mai i lē na faatauina atu i le agaga lelei.

85. Gaumativa o tausī mavaega - Afai e gaumativa se tausī mavaega, o tagata o nofo aitalafu ai i le tausī mavaega e lē toe faia o se tulaga e faasaga i le meatotino tau mavaega tausī, seia vagana ai ua i ai se tagi a le tausī mavaega e faasaga i ai po o se aia tau faamanuiaga o i ai.

86. Puipuiga mo tagata e feutagai ma tausī mavaega-

(1) O sē e faatauina atu *i le agaga lelei* mo le tau aogā e aunoa ma le iloa o le solia o tulaga faatuatuaina:

(a) e mafai ona feutagai ma se tausī mavaega o se meatotino tau mavaega tausī, e faapei ai o le tausī mavaega, o lē ua faamanuiaina ai i le meatotino tau mavaega tausī; ma

(b) e lē aafia ai i mavaega tausī lea e umia ai meatotino tau mavaega tausī.

(2) O se tagata o totogiina atu po o ua vave totogi atu se tupe i se tausī mavaega e le o manatu e faapea:

(a) o lo o manaomia le tupe;

(b) e lē sili i lo le tulaga manaomia le vaega ua faatulai mai; po o

(c) le feuiaiga tau tupe po o le faaaogāina o tupe o lo o talafeagai lelei.

87. Tapulaa ma mea ua faatonuina-(1) E leai se vaitaimi faatapulaaina po o mea ua faatonuina ai se gaoioiga ua aumai e faasaga i se tausī mavaega:

(a) mo so o se faiga tau faasese lea ua avea ai le tausī mavaega ma vaega auai po o sa tau faaoleole; po o

(b) ia toe maua mai i le tausī mavaega o meatotino tau mavaega tausī po o tupe faasili o meatotino tau mavaega tausī -

(i) o umia e po o ua faaee atu i le tausī mavaega po o o lo o i le vaavaaiga po o le faafoega a le tausī mavaega; po o

(ii) sa muamua ona mauaina e le tausī mavaega ma faaliliu atu i tulaga e faaaogāina ai e le tausī mavaega.

(2) I le noatia ma le fai fuafua i le faafuaiupu (1) ma le (3) o le vaitaimi lea ua maua ai le tulaga lē faatuatuaina e mafai ona aumaia e faasaga i se tausī mavaega e:

(a) tolu (3) tausaga mai le aso lea na muai iloa ai e lē na tagi, le soliga; po o

(b) pe afai, o lē ua tagi, o se tamaitiiti po o se tagata e le o agavaa faaletulafono, i le taimi na solia ai tulaga faatuatuaina e -

(i) tolu (3) tausaga mai le aso na muai iloa e lē o vaaia o ia, le soliga; po o

(ii) tolu (3) tausaga mai le aso na faamutaina ai le avea ma tamaitiiti o lē na tagi, po o se tagata e le i agavaa faaletulafono,

i le a lava le tulaga e muamua mai.

(3) I le noatia ma le fai fuafua i le faafuaiupu (1), o se gaoioiga ua faia i luga o le solia o le tulaga faatuatuaina, e lē tatau ona faia e faasaga i se tausī mavaega i le tuanai ai o le vave faamutaina o le ono (6) tausaga e mulimuli ane ai i le aso o le soliga.

88. Mavaega tausī e faatulagaina lelei-(1) O se tagata o ia lea ua mafua mai ai se tupe mama mai se soliga o tulaga faatuatuaina, po o ia lea ua maua mai se meatotino i le soliga o tulaga faatuatuaina, ua faatatauina e avea o se tausī mavaega o le tupe mama po o le meatotino seia vagana ai ua faapogai mai le tausī mavaega po o ua ia maua mai i le agaga lelei e aunoa ma se iloa o le soliga o le tulaga faatuatuaina.

(2) O se tagata o ia lea ua avea o se tausī mavaega e ala i tulaga aloaia o i le faafuaiupu (1) e tatau ona faaoo atu le tupe mama po o meatotino i le tagata e talafeagai ona agavaa i ai.

(3) O lenei fuaiupu e lē aofia ai so o se tasi lava tulaga e aliae mai lea e tulai mai ai le faatulagaina lelei o le mavaega tausī.

VAEGA 13 AIAIGA ESEESE

89. Tulafono Faatonutonu-(1) E mafai e Le Ao o le Malo, i le faia i luga o le fautuaga a le Kapeneta, ona faia

tulafono faatonutonu ina ia faamamaluina ai po o mo faamoemoega o lenei Tulafono aemaise ai lava ia faia tulafono faatonutonu mo mataupu e manaomia le faatonuina i lalo o lenei Tulafono.

(2) E mafai ona faia tulafono faatonutonu i lalo o le faafuaiupu (1) e faatonutonu ai faaletulafono mavaega tausi i vaitaimi pupuu.

90. Teuteuga faatupulaia-(1) Mo le Tulafono o Lafoga o Tupe Maua 2012:

(a) i totonu o le fuaiupu 66(1) -

(i) i le faaiuga o le parakalafa (f), ia suia le faailoga “piriota” i le faailoga “semi kolona”; ma

(ii) i le tuanai ai o le parakalafa (f), ia faaofi le parakalafa lenei e faapea:

“(g) o tupe faasili faavae ua tuusaunoaina i lalo o le faafuaiupu (1)(zb) o le Vaega A o le Faamatalaga 2.”; ma

(b) i totonu o le faafuaiupu (1) o le Vaega A o le Faamatalaga 2 -

(i) i le faaiuga o le parakalafa (za), ia suia le faailoga “piriota” i le faailoga “semi kolona”; ma

(ii) i le tuanai ai o le parakalafa (za) ia faaofi le parakalafa lenei e faapea:

“(zb) o tupe maua ma tupe faasili faavae (e ese ai i lo tupe maua e le o tuusaunoaina po o tupe faasili faavae ua faatonuina e tulafono faatonutonu ua faia i lalo o le fuaiupu 106 o lenei Tulafono) o itu nei ua taua i lalo o le Tulafono o Mavaega Tausi 2014 -

(i) o se tausi mavaega o se mavaega tausi mai fafo e faamanuiaina;

(ii) o se kamupani, i le noatia ma le fai fuafua i le faaparakalafa (iv), lea o lo o avea ma kamupani mai fafo, ma

e tusa ai ma lea tulaga, o le tausī mavaega o se mavaega tausī mai fafo e faamanuiaina ai i se faiga tuusao pe lē tuusao foi ma e agavaa ai i faamanuiaga e 95% po o le sili atu o sea e tuuina atu; po o

(iii) o se faiga faapaaga faatapulaaina, e tusa ai ma lea tulaga, e agavaa le tausī mavaega o se mavaega tausī mai fafo e faamanuiaina ai i se faiga tuusao pe lē tuusao foi, ma e agavaa i faamanuiaga e 95% po o le sili atu o tupe tului a le paaga faatapulaaina i totonu o se faiga faapaaga faatapulaaina; po o

(iv) o se kamupani Samoa ua tuufaatasia faaletulafono, e 95% po o le sili atu o sea ua tuuina atu, ia e umia i tulaga e faamanuiaina ai, e le tausī mavaega o se mavaega tausī lea e faatatau i ai le fuaiupu 48 e oo i le 62 o le Tulafono o Mavaega Tausī 2014.”;

(c) i totonu o le faafuaiupu (2) o le Vaega A o le Faamatalaga 2, ia faaofi le faamatalaga ua taua i totonu o lona tulaga sao o le faasologa o mataitusi o le pi faitau faa-Peretania:

““mavaega tausī i atunuu i fafo e faamanuiaina ai” e i ai le uiga tutusa i lalo o le fuaiupu 2 o le Tulafono o Mavaega Tausī 2014.”.

(2) I totonu o le fuaiupu 6(2) o le Tulafono o Kamupani Faava o Malo mo se Faamoemoega Faapitoa 2012 mo “mavaega ua faamauiaina i lalo o le Tulafono o Mavaega Faa-va-o-malo 1988” ia suia e faapea “mavaega tausī i atunuu i fafo”.

91. Soloia, aiaiga tau soloaiga ma aiaiga faasaoina-(1)

Ua soloia Tulafono ua taua, i le noatia ma le fai fuafua i faafuaiupu (2) e oo i le (4):

- (a) o le Tulafono o Mavaega Faa-va-o-malo 1988;
ma
 - (b) le Tulafono o Tausi Mavaega 1975.
- (2) I le amata faamamaluina ai o lenei Tulafono:
- (a) so o se mavaega tausī faava o malo ua faamauina i lalo o le Tulafono o Mavaega Faa-va-o-malo 1988 e faaauau pea mo se vaitaimi e 12 masina e faapei ai o se mavaega tausī i atunuu i fafo i lalo o lenei Tulafono e ui lava o le a soloia; ma
 - (b) so o se mavaega tausī o i ai nei ua faia i lalo o le Tulafono o Tausi Mavaega 1975, e faaauau pea e faapei ai sa faia i lalo o lenei Tulafono.
- (3) So o se mavaega tausī faava o malo ua faamauina o i ai nei, e tatau i totonu o le 12 masina mai le amata faamamaluina o lenei Tulafono, ona tausisia manaoga o se mavaega tausī i lalo o lenei Tulafono.

FAAMATALAGA*(fuaiupu 30)***TIUTE TAUAVE O LE VAAIGA**

1. Teufaafaigaluega - O le tiute tauave o le vaaiga e faatatau i se tausī mavaega:

- (a) pe a oo ina faatinoina malosīaga lautele o le teuina faafaigaluega po o so o se tasi lava malosīaga o le teuina faafaigaluega, i le a lava le tulaga ua faaee atu i ai; po o
- (b) pe a oo ina faatinoina se tiute tauave i lalo o le fuaiupu 31(6) e oo i le (10).

2. Sui sooupu, tagata ua tofia ma tagata e vaavaaia-

(1) O le tiute tauave o le vaaiga e faatatau i se tausī mavaega:

- (a) pe a oo ina ulufale i totonu o faatulagaga ia e faatagaina ai le tagata i lalo o le fuaiupu 32 e faatino galuega tauave e pei o se sui sooupu;
- (b) pe a oo ina ulufale i totonu o faatulagaga ia e tofia ai se tagata i lalo o le fuaiupu 33 ina ia galue e pei o se tagata ua tofia;
- (c) pe a oo ina ulufale i totonu o faatulagaga ia e tofia ai se tagata i lalo o le fuaiupu 33 ina ia galue e pei o se tagata e vaavaaia;
- (d) pe a oo ina ulufale i totonu o faatulagaga ia e i lalo o so o se isi lava malosīaga, i le a lava le tulaga ua faaee atu ai, ua faatagaina ai se tagata e faatino galuega tauave e pei o se sui sooupu po o ua tofia e galue e avea o se tagata ua tofia po o se tagata e vaavaaia;
- (e) pe a oo ina faatinoina ona tiute tauave i lalo o le fuaiupu 35 (iloiloga o sui sooupu, tagata ua tofia po o se tagata e vaavaaia, faapena ma isi).

(2) Mo le faafuaiupu (1)(b) po o le (c), i le ulufale ai i totonu o faatulagaga lea e faatagaina ai se tagata e faatino galuega tauave po o ua tofia ai e galue e pei o se tagata ua tofia po o e aofia ai se tagata e vaavaaia, aemaise ai lava:

- (a) le filifilia o se tagata o ia lea o le a galue ai;

- (b) fuafuaina o so o se aiaiga lea o le a ia galue ai;
ma
- (c) pe afai ua faatagaina le tagata e faatinoina galuega tauave o le faafoega o aseta, o le saunia o faamatalaga tau faiga faavae i lalo o le fuaiupu 32(13) ma le (14).

3. Inisiua - O le tiute tauave o le vaaia e faatatau i se tausi mavaega pe a oo ina faatinoina so o se malosiaga i lalo o le fuaiupu 42.

4. Tulaga e lē aofia ai i tiute tauave o le vaaia - E lē faaaogāina le tiute tauave o le vaaia, pe afai, po o i le a lava le tulaga e aliali mai ai, mai le pepa aloaia faaletulafono o mavaega tausi e faapea, o le tiute tauave, e le o faatatauina ina ia faaaogā.
